

ASO TOFI, 22 IUNI 2017

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua toe amatalia nei Taulumaga ma galuega a le Fono Aoaofa Fitolafono.

Ia e momoli atu le faafetai ma le faamalo i le paia i le afio o lau Afioga i le Palemia ma le Sui Palemia faapea foi le Kapeneta, ia aemaise le mamalu o lenei Palemene, e faapena foi le lagolago mai o Faauluuluga o Matagaluega ma Faalapotopotoga a le Malo, e mafai ai ona taoto nisi o tiute ma feau, ia ae faataunuu le tatou galuega, ae a le tapuaiga a Samoa. Ia tau ina ia manuia le tatou Fonotaga i lenei aso.

O le tuuina atu o Lipoti a Komiti Faa-Palemene.

TUUINA ATU O LIPOTI A KOMITI FAA-PALEMENE

Na tolaulau e le Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma T.T.51(5).

1. P.P. 2017/2018 Nu.53, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P. 2016/2017 Nu. 142, Lipoti a le Komiti o Toefuataiga o Tulafono a Samoa i le Tausisia Faaletulafono e Samoa o le Feagaiga mo le Faamutaina o so o se Faailoga Tagata e Faasaga i Tina ma Tamaitai (CEDAW), Lipoti Faaiu (17/16).

**TULAFONO TAU FAAOFI O LE FAATATAUINA O TUPE 2017/2018
– felafolafoaiga i luga o le faitauiga faalua**

FOFOGA FETALAI: E tolopo le felafolafoaiga i le po anapo o lo o saunoa le sui usufono mo Palauli le Falefa.

O le mea la lea ou te tapa ma le faaaloalo lau Afioga i le sui usufono mamalu e faaauau lau saunoaga.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga i le Fofoga Fetalai. Ua e toto foi le niu i le tuaoi i lo tatou vatapuia ma lo tatou Matai o i le lagi. Faafetai foi ua maleifua mai le Taitai o le Malo le Afioga i le Palemia ma le Kapeneta, aemaise foi i Afioga i Minisita Lagolago, ia ma lenei itu.

O lea foi ua tilotilo atu ia sulu o le tino i le afifio mai o Faauluuluga ma Pulega o Matagaluega, ia aemaise foi ia le tatou Failautusi o le Fono ma le Sui Failautusi ma le aufaigaluega, faafetai i le avanoa mo le faaauauina.

Ae le i faia sau faamatalaga i le lisi o mea ia sa gata ai lau, sa ou faapea e afio mai se tasi o sui o le matou Komiti o Tupe, le Afioga ia Olo. Sa ou tilotilo lava ma le totoa anapo i le folasaga e uiga i le SACEP ia ma le Matagaluega o le Soifua Maloloina.

Ou te faamalulu atu, ou te tali atu i le tulaga faasui Taitaifono o le Komiti o Tupe Maua ma Tupe Totogi. O le SACEP, o le faaauauina, e leai se tupe fou o avea i ai. E \$5miliona le tupe faameaalofa e 5 tausaga talu ai na aumai ai. \$8milionaUS na faaune mai i tuutuuga mama. O le faaauauina o le SACEP, toe 9 masina lea e totoe, e faamutaina ia le vaega lea i le faaiuga o Mati o le tausaga fou. O lona uiga afai e maitau mai, ia na o le 9 lava masina e faaauau ai ae leai se tupe faaopopo, na o le faamaeaina o galuega sa fuafua mai i le afuafuaga mai o lenei polokalame. E avatu le faamalo i le Afioga i le Minisita i lona maemae e faaauau ai lenei polokalame manaia, e fesoasoani ai i le aufaigaluega. O nisi faamatalaga, ia faamalulu atu i le Maota, ona e fai sina ogaoga o nei alagatupe. O le mea foi lea ana faapea e i ai i le taimi o le matou fonotaga ia le Afioga i le sui usufono, e malamalama i le faamalamalamaina o nei tulaga. E faamalulu atu i lau Afioga i le Taitai o le Malo ma le Kapeneta, ona o le tulaga na i ai.

E oo foi i le tulaga o le Soifua Maloloina, e 4 vaiaso talu ai sa ou asiasi ai ma talatalanoa ma le Pule, ia ma nisi foi o le aufaigaluega i lou lava fia malamalama i a latou galuega, ae taunuu ai ma le shipments o nofoa. O nofoa foi ia e ave ai tagata, o le tele ia o nofoa, ou te le iloa la po o fea le nofoa malepe lea e.... ia e faamalulu atu i lau Afioga i le Minisita....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai....

FOFOGA FETALAI: Tulai mai lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mafuaaga foi lena na matou le tutulai atu ai, ona matou te iloa o mataupu faapenei, e oo lava i ai sailiiliga a la outou Komiti, ae o uiga na o le lalolagi lea tatou te i ai. Po o fea tatou te i ai, pe tatou te i le falemai, e oo lava i le salu otaota, e i ai foi lona ia mitamitaga i lona tamaliiaga.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauiga faalua**

O lona uiga o lea mea, afai o ta ita o le sui usufono lea ta te alu atu taoto i le falemai ma laulau ai lou sui usufono ma ia aumai ni mea silisili mo oe, e le mafai lava ona le oso le ita. Aemaise pe a e laulauvavale i tagata o lea e tautuaina le atunuu i le falemai. E ono tupu la mea faapena, ona alu lea e loa lea saili mai le mea e aupito sili lava ona faaletonu, ona aumai loa lea tuu i le mai. Ia ae ou te fiafia ua le toe tutulai atu matou e tau na mea, o la e lava ma totoe le faaaupegaina o le tatou falemai e le Minisita ma lana aufaigaluega.

O le tulaga foi lena, na ona ou toe faaopopo atu e i ai le tatou Tulafono foi lea o mea e fia faasao, e na o le tasi lava le taimi e 100 % ai le mea e fia faasao, o le taimi e sese ai faasao loa le tagata. O le Tulafono la, e le na o matou, ae o le Tulafono foi e aofia ai ma outou. O le mea la lea ia outou lea i le Komiti, a sasi loa le Komiti le sui o le Komiti, ia faasao ane foi e outou. E mataga ona matou tutu atu ona faasao lea o se sui usufono e faaletonu, aua faasao atu loa le sui usufono e faaletonu, e mataga uma ai outou o lo o i totonu o le Komiti.

O le mea lena na ona ou toe faamanatu atu, o le tatou Tulafono Tumau o mea e fia faasao e auala uma ai lava tatou, ae o le mea foi lea o le avafatafata, ma le vafealoaloi ma taofi ai le mea e tatau ona fai, o iina e toe tele ai mea e tau fufulu.

Lau Afioga i le Fofoga Fetalai, ia o se toe faaopopo atu lena i leni taeao.

FOFOGA FETALAI: Malo, faafetai. Ia tulai mai le sui usufono.

Afioga Hon FAUMUINA TIATIA FAAOLATANE LIUGA: Faafetai. Ia e avatu foi se tuualalo i Afioga i Minisita, e tatau foi ona paleni le avega o nei faamatalaga i luga o alaleo. E tatau foi ona outou silasila totoa i ai i le tulaga e tatau ai ona fai se finagalo o le Malo, ia ae o finagalo sa faaalua e le Afioga i le sui usufono, e le i faaalua i i se i vagana o le interview lea lea na ou faalogologo ai i le po anapo. Faafetai i lau Afioga.

Lau Afioga i le Fofoga Fetalai, ia lau Afioga i le Minisita mo Tina ma Tamaitai, Atinae o Nuu, Afioga ma Agafesootai, ia e toe faamanatu atu le faamaeaina o le matou vai tumaoti. E le o toe tele se mea o i ai, ia ae se i tagai ane, toe lava o nai paipa ma nai aiga laitiiti o lo o totoe, ia ona faamaeaina lea. E tuuina atu ai ma le faaaloalo lau Afioga Faimalotoa, ia ma lau Minisita Lagolago ia Tofa, ia se i lua silasila ane i le tatou galuega lea e fia faamaeaina.

O le tulaga i le Minisita mo Faalapotopotoga a le Malo, e i ai si au... i le vaega lea....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaioi: Lau Afioga i le Fofoga Fetalai...

FOFOGA FETALAI: Malie le sui usufono mamalu, se i tulai mai le Taitai o le Malo.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Ae le i faaauau le sui usufono mamalu, masalo o le itu lea e taua tele mo mea o vai tumaoti.

E le mafai ona galo ia te au le omai o le isi nuu ma talanoa mai o le latou vai e toe manao e fai le latou vai tumaoti. A o vai ia e alu i ai le Malo, o vai e faamama. Ia ona fai mai lea o le sui, e tusa lava pe palapala ma mamai ai, ae fai atu pea ona o le taugofie.

O le mea moni lava, i le agai atu i le lumanai, o mea uma lava ia e fai e le Malo, o le mea e tatau ona fai, o le agai atu ina iu lava ina leai ni vai tumaoti. Aua e oo loa i le taimi e toe faafou ai, e le taugofie, e taugata. A o vai o lo o avatu e le Malo, o vai o lea e treat, ina ia aveesea ai mo siana, lea e tele ai ia faamai ia e mamai ai ia tatou. Pei o le mea ou te faaaoga ai le avanoa lenei, na ona faamanatu i le toatele o tatou tagata, ona e tele lava ina le malamalama i mea nei o vai, e le taugata ia vai ia. E ala la ona taugata, o le avatu o le tamai pili ona nofonofo ai lava lea e le totogia. Ma le isi mea, na ala ona fai vai ia, ma fai mea nei o mita, o le taofiofia o le soona faaaoga o le vai. Pei o le tulaga lena e taua ai le toe oo o mafaufauga i mea nei o vai tumaoti, e lelei lava ona faaaoga polokalame ia o le faaaoga o vai a le Malo.

O le vai foi a le isi o matou nuu e faaaoga le vai tumaoti, o le matua tele lava o le 1 maopopo, e tiga lava ona alu le vai, ae faapena ona le faaleleia, ia ma e oo foi lava i le totogia o tupe pe \$10 o le tele lava o aiga e le totogia, e le lelei ona vaai.

FOFOGA FETALAI: Malo faafetai, ua manino le faafofoga mai a le atunuu. Ia se i tulai mai le sui usufono mamalu e saunoa.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai, faafetai foi i lau Afioga i le Palemia, lea ua maua ma ua malamalama, ma o se faavae mautu ma le aoga mo le soifua maloloina ma le faasaoina o punaoa i le manava o le eleele, faafetai.

Lau Afioga i le Minisita o lo o fitoitonu mo Faalapotopotoga Tumaoti, e i ai nai tuualalo ma fautuaga i le tulaga lava lea e te silasila i ai mo le faasaoina o ni tupe mo a tatou galuega fai aemaise lava i le vaega lea o Faalapotopotoga Tumaoti o Fefaatauaiga. E i ai lo matou ma e i ai foi lou taofi e tatau ona toe silasila pe a maea ia piliota lea e i ai o Board of Directors, pe le tatau ona faasau i lalo i le 7 i le 5. Ia aua o lea e tele foi a tatou Boards lea i ai o le matua lelei lava, o lea e tai toa 5. E i ai foi isi vaega ia e tuu sao i ai e le Malo ia tupe e faagaioi ai a latou Faalapotopotoga, e tatau foi ona faalaitiiti atili i lalo o le 3. Mo se faataitaiga o le vaega o le SSFA, ia ma le vaega o Fatugao. Ia e pei o tau maoae na o lea e i ai, ia ae se i silasila pea i ai lau Afioga pe le o se mea talafeagai le tulaga o le toe faaitiiti o Faatonu o nei Boards, ia aua e tasi lea o nei tau faapopo ai le tau i tupe alu a le tatou faalapotopotoga.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le isi vaega lau Afioga, e i ai faalapotopotoga lea ua tuu i lalo o le trading bodies e tatau ona e toe silasila i ai o le vaega lea o le SIFA, vaega o le UTOS ma le DBS. O le SIFA, o lea foi e tele lona sao, e \$15miliona e aumai i le paketi. O le UTOS o le mea na faavae ai ia maua e tagata lima vaivai le avanoa e fai ai sea i faalapotopotoga tumaoti a le tatou Malo. O le tau taofiofiga o le a nei iunite, ua taumafai foi e tala i tua tupe, ona o le tele o faalavelave ma le ituaiga mea la lea a faapea o le a totogi ni sao o lenei foi faalapotopotoga i le faagaioiga o le tatou tamaoaiga, e ono afaina ai foi o latou lagona. O le DBS e sao, o le trading body, ae ese lona atinae, atinae lona tamaoaiga i le itu o faatoaga, atiae le tamaoaiga i le itu o pisinisi tumaoti. O lana ia lea matafaioi ae a saili ai loa ni tupe mama, o lona uiga o le a tuu i luga interest ina ia taumafai ai ma atili ai ona tapunia le tele o ni pisinisi o le a faapena ona aafia ai.

FOFOGA FETALAI: Toe lua minute o le sui usufono.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai, e faamauina le agaga faafetai i le Minisita mo Tupe Maua, e to lou pulou i lau Afioga i lou mataalia ma lou le fefe ai ona o lou fiafia i le divine mercy lena e puipui ai oe e le Atua. E manaia le mea ua ova lau targets sa fuafua mai mo le 2016/2017, a o lea foi ua tele le fuafuaga mo le tausaga fou, o ou mama na. E toeitiiti lava atoa le tusaga lea sa e folafola, ae ou te iloa e ova lava, aua o lea e foai pea e le Atua le tamaoaiga i ou aao. Ia faafetai foi o lea ua amata ona manaia le tatou falepuipui ua tau le o i tua pagota ona o le lelei o le faafoeina, faamalo galue, faamanuia leAtua i lau Afioga ma lau Minisita Lagolago. E manaia foi le lua tag team, e fai foi ma o e oti kamupani na ina ia tele ai ni tupe e maua mo lo tatou tamaoaiga.

Sala, o le tatou tusigaigoa lea na uma atu nei, na o le 195,000. Ou te le o iloa po o sao pe leai, ae ou te iloa lava e tasi lena mea na tuu ai oe i ina o le lelei o lau numera. I le faitau faalemafaufau ma Lipoti a le Matagaluega o le Soifua Maloloina, e 5,000 pepe e fananau i le falemai, e le taulia ai pepe la e fananau i tua, e 500 tagata e maliliu, e le taulia ai tagata la e maliliu i tua. E 1,100 le quota, 500 isi tagata e o ese atu. O lona uiga, e tatau lava ona totoe se 2500 e faaopopo i tausaga uma i le census. I le matou tilotilo faalemafaufau, ua tatau ona 250,000 le tatou faitauaofai i le taimi nei., O le taua o le sao o nei faamaumauga e fua i ai iuga fai a le Malo ina ia matua sao atoatoa, ma ou te iloa lelei lou naunau e faalelei mea e te finagalo e fai.

Faafetai i lau Afioga i le Minisita mo le Soifua Maloloina, e tatau lava ona faa-fast track le tatou merging o le Ministry ma le Auaunaga faale soifua maloloina. Lau Afioga e taua le faa-fast track leaga e afaina ai lagona o tagata. E tatau ona iloa e le tagata lona lumanai ma le mea e agai i ai, ae afai e umi ona tosotoso e faapena foi ona tele tagata o le a mamai ai ona toe tele foi lea o moega e faaoga, talu ai le tuai ona faatino le vaega lea.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

FOFOGA FETALAI: Faaiu mai le saunoaga a le sui usufono ua uma lou taimi. Manaia le saunoaga, ae ona o le taimi uai

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai mo le avanoa. Ou te faafetai atu i le tatou Maota i le Afioga i le Palemia ma le Kapeneta ma lena itu, e fai le matou tiute o le tuualalo, fautua, ae a i ai foi se taimi ua laavale ai se tala, ia faamagalo mai. E moni lava le taumafai atu ae afai ua lape se faamatalaga i lau Afioga i le Palemia ma le Kapeneta, o outou mama na, ia faamagalo matou. O lenei foi itu e lagolago atu, ae a oo i le taimi e faasoa ai le tatou \$200,000, ia aumai se vaega a le Itu Agai. Faafetai.

FOFOGA FETALAI: Malo faafetai saunoa, faafetai malele. Ia, ou te tapa le olioli mai a lau Afioga i le Matua Anoamaa Sisifo.

Tofa Hon LAUOFO FONOTOE NUAFESILI PIERRE LAUOFO (Anoamaa Sisifo): Faafetai i lau Afioga i le Fofoga Fetalai ua maua so matou avanoa. E manatu lava i lenei taeao o lea ua eetai le sa o manu ae ulito le vaa o mala. Ua tatou oaoa foi i faleseu ae aeaie i falemua. Ua malo afua ailao ua maua i lenei foi taeao fou ua momoli mai e le Atua lo outou soifua, faapea foi so matou ola o lea ua maea ona momoli e lau Afioga i le Fofoga Fetalai lapalapa o Malo. O le faafetai ma le viiga i le Atua e le faaitiitia la i sa matou tala, faamalo le soifua i lau Afioga i le Fofoga Fetalai faapea foi le Palemia, Sui Palemia ma le Kapeneta, faapea foi Afioga i Minisita Lagolago faapea foi lenei itu o le tatou Malu i le afifio o sui usufono mamalu o le Maota. E faapea foi le mamalu o le Ofisa ma Faauluuluga o Matagaluega ae tainane le tapuaiga a Samoa o lo o faafogafoga mai. Ae o le a faapuupuu so matou sao i le Tala o le Tupe i lenei foi tausaga faaletupe o le Tala Faatatau Autu o le Tupe 2017/2018.

O le a muamua se lagona e tusa ai foi ma lou itumalo lau Afioga i le Fofoga Fetalai, o lena ua taoto atu talosaga, ae le o ni talosaga fou foi. E pei lava foi ona maua i le saunoaga a le Palemia ananafi, o lauga lava ia ua sefulu tausaga o fai. Ia o lau lauga ua ova atu i le 10 tausaga ae o le a toe faamanatu atu pea.

Ia o nai taligalu lava i nai nuu laiti o le matou itumalo i Fusi o Salelesi faapea ma Eva ua manaomia le faaleleia. Ua tele tausaga o faatalanoaina i poloketi foi nei a le Siosiomaga. Ia e faapea nai taligalu i afioaga ia o lo o lavea i lalo o le vaaiga a le LTA ona o le fia puipua o alatetele ua afaina i le sami e i ai afioaga ia o Luatuanuu ma nai isi afioaga laiti i le la itu o le itumalo pei ona silafia e lau Afioga i le Minisita mo Galuega.

O le matou auala lea e agai i Sauniatu, masalo ua tolu tausaga o matou feutagai ai ma le isi poloketi, o le tala lata mai toe lava o le faasalalau mo tauofoga foi nei a kamupani. E oo mai le aso, ua ou le iloa po o fea le mea ua fai i ai, ae tau ina faamanatu atu le tulaga lena o si o matou auala, ma o lena foi ua taoto atu i le tusi na avatu mafuaaga. Atonu o lena foi e silafia e le itumalo o le a ou le toe agai i ai mo le faasaoina o le taimi.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

E momoli atu le faafetai i le Afioga i le Minisita o Tupe e tusa ai o le Tala Faatatau Autu o Tupe i leni tausaga faaletupe o le amatatia i le aso 1 Iulai. E faamauiina le agaga faafetai i se faamanuiaga mo tatou pisinisi foi nei e faatauina atu oloa i fafo. O lea ua maua i lau saunoaga i le Tala o le Tupe, o le a faaitiitia i le 50% lafoga i polofiti i kamupani ia o lo o faatauina atu oloa i fafo. I lau la tilotilo atu ma lau maitau, o se faiga ua tatau ma talafeagai foi i leni vaitau, ua tatau ona siitia tulaga o tatou oloa e auina atu i fafo, ona o lea ua maitauina nisi foi suiga i totonu o le atunuu. Aua i lau vaai ma lau maitau, a tuutuu i lalo le tulaga lena o le pasene o lafoga, 50% mai polofiti po o tupe faasili, ua tele foi tupe a nai faipisinisi nei e faaaoga i nisi vaega o pisinisi po o pisinisi fou. O le mea e tupu, o le a faaopoopo avanoa faigaluega e maua ai ni galuega fou i totonu o le tatou atunuu. E talafeagai lelei ma leni vaitau ona o mea ia e tulai mai e pei o le Yazaki i le tapunia o le Yazaki. O lona uiga ua le toe maua na avanoa faigaluega. A o se taumafaiga i lau vaai atu lea e taumafai i ai lau Afioga o se taumafaiga lelei i lau vaai, ae sili atu ona lelei pei o lou suafa Sili pe a toe tuutuu teisi ifo i lalo i le 25% le lafoga i tupe faasili ia ina ia tele pea le tupe avanoa mo ni atinae fou e faatino e faipisinisi nei.

O galuega lava le mea lea e pei e agai i ai ma taulai i ai lau vaai. Tele tupulaga i leni vaitau e iu mai aoga, ae o lo o taumafai pea, taumafai pea le tulaga o tatou galuega. Lona uiga e taua ona push le tatou export. Aua o lea ou te vaavaai atu o le kuata mulimuli o le tausaga faale-kalena na tea atu nei tau mai ia Tesema 2016 e \$23miliona le tatou tupe e maua mai le export, \$23miliona. O se tulaga lelei ma i le le toe maua ai la o le export a le Yazaki ua tatau ona i ai tatou faiga faapenei. E momoli atu ai le faamalo ma le faafetai i lau Afioga aua o lea foi e maitau atu i tatou foreign reserves, o lea pe \$260miliona, lona uiga e kava ai le fa masina o tatou imports, o lena e lelei. Sa i ai isi masina ua tuanai atu i na tausaga ua tuanai nei sa ausia le lima masina e kava i tatou foreign reserves i tatou imports.

A o se tulaga lea a o le talosaga ina ia toe faaopopo nisi fuafuaga faapea ina ia atinae le tatou export, aua o le tele o tatou exports, o faaeleeleaga ma fua o faatoaga. O le tulaga foi la lena e tele ai le fesosoani i tatou faatoaga, aua foi i latou o lo o galulue i le faatinoga o tatou faatoaga aua le faatauina atu i fafo o fua o faaeleeleaga.

E taua le mea lea ona o lau vaavaai atu, masalo foi o lena sa silasila i ai lau Afioga, i le tulai mai o le faigamalo fou lea a Amerika ua tulai mai, ua tu lava e le Peresetene fou lea e i ai nei i lalo tax o kamupani a Amerika, masalo po o le afa pe 33% ea sa i ai tax a kamupani ae tulai mai loa tipi i lalo pe 15% ea la e ua i ai. O le mea la ua tupu pei o lea ua faataitai atu ai ma isi atunuu, pei la o lau vaai, ua tatau loa ona tilotilo tatou i se tulaga faapea. A o lea e tau maua atu i faamatalaga, a ia o la e silasila le tatou Malo i se tulaga faapea e toe restructure le tatou taxes. Ma o le taua o le mea lea i lou talitonuga, e tatau foi ona attractive le tatou business environment, aua o lea tatou te tauva ma isi atunuu o le Pasefika i le faatosina mai o tagata foi nei foreign investors, tagata faipisinisi mai fafo aua le atiaeina o le tatou atunuu.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O tulaga na i lau vaai i ai e taua ai vaega ia o lo o taumafai i ai. E pei foi la o lea ua ou tilotilo atu i le saunoaga a lau Afioga i le Tala Autu o le Tupe, o le a aveese

mea foi ia o tax rates ma tax on base, ia o se faiga lelei foi lena, o lena foi fesoasoani sa maua, o le a le toe faaauua polokalame na aumai sao ia le lafoga i totonu o le Malo ia aua lau faasoa, ina ia mafai ona faatino nisi o atinae a lo tatou atunuu. O le mea lea ou te talanoa au i lau vaai au i le tulaga lea faataatia ma faataoto mai le Tala o le Tupe, o au faiga faavae lautetele ia, o le mafuaaga lena o lou talanoa atu, ou te lagolagoina ia tulaga ia ou te vaavaai atu i ai ma ou faitau atu ai, e momoli atu ai le faamalo ma le faafetai.

Ae i ai mo atinae ia e tatau lava ona taumafa e faanatinati lea foi e aumai le atinae lea o le Waterfront Project, ua tatau ona faagaoioi lena atinae ua leva foi ona tau. O lea foi sa maua i le isi vaitaimi faapea o lo o maua se fesoasoani a le Malo o Niu Sila i nai seleni e amata ai ona tapena le faamoemoe lea. Ia a o na vaega uma e faamoemoe foi i le tele o tagata tafafao maimoa mai i Samoa. E pei o le tulaga lena se i toe silasila ifo i le tatou vaalele, ia po o le a se tulaga o i ai, aua e tatau ona vave maua se tali, o lea sa maua i faasalalauga i saunoaga foi a le Afioga i le Palemia i luga o leitio, o lea o le a faamuta le tatou feagaiga foi lea ma le.....ia masalo o se isi tulaga lelei o le a tulai mai e faafiafiaina ai foi le aufai faletalimalo, le aufai taxi, le aufai pasi ma le aufai rental cars ia ma isi uma mau pisinisi o le atunuu. Ae faamalo galulue.

O le tulaga lea ua ou matauina i lau saunoaga lau Afioga i le Minisita o Tupe, e pei se lafoga po o le saofaga le tauga o le tupe, o lea a faaee i luga o telefoni feaveai. E malie lava i lau faalogo le saunoaga a se tasi o sui usufono mamalu ananafi i le tele o faafitauli lea e tulai mai i le faaaogaina o mea nei o telefoni feaveai, aemaise lava i tupulaga talavou. Atonu la o le agaga o lau faiga faavae po o le Tulafono lea e fuafua ina ia maua ai se tupe faaopoopo mo le Malo. A o le isi itu lena o lea ou te talanoa atu ai au, e ala ai ona ou lagolagoina le tulaga lea e te aumaia, ona atonu o le a tuuitiitia ai le faaaoga le tatau o mea nei o telefoni feaveai, e le gata o telefoni lava nei e talanoa, ae o mea nei o texts. Aua pei foi ona silafia, e i ai foi polokalame ia a fai telefoni e fai ai free text, o le tele lea o fesootaiga o talavou i mea nei, o lea e tulai mai ai isi faafitauli, aemaise tupulaga aoga. Afai la o se fuafuaga lea e...aua o lea e le o maua pe fia se pasene lea e te finagalo i ai, ae pau le mea lea e manino mai i lau saunoaga, o le a faaee se saofaga po o se lafoga foi i le isi tauga i luga o mea nei o telefoni feaveai. Ua faamalo faafetai i lena tulaga. E tele pisinisi fou i totonu o le tatou atunuu, o lea pei ona matauina ma silafia.

Ua matauina i lau vaai, ua televave ia le tulaga o pisinisi ia o tatou uso ia mai Asia, ae ua amata ona tau le vaaia nisi o pisinisi tatou ia Samoa. Ona ou asia le tele o faleoloa ma ou matau ma ou vaai i se tulaga foi lele o le l fetauti o le tulaga o tauvaga faapisinisi, o le mea lea e agai i ai lau faamatalaga o le fair competition.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ona fesili ai lea o lou mafaufau i le tatou Tulafono lea sa pasia po o le a se tulaga o i ai, le Competition and Consumer Protection, po o ua tau faagaioi lena Tulafono pe leai, ae pe ua sui foi se fuafuaga a lo tatou Malo, i le tulaga i le faaogaina o wholesale ma retail ma isi faiga foi ia faatauva e taotaomia ai ia faiga faatauva, mo mea o ituaiga aga faapisinisi e taotaomia ai tulaga ia ma afaina ai lea o isi pisinisi, ae manuia ai lava na o isi pisinisi. Ia se i silasila ifo lau Afioga i le Minisita e ou le vaega tonu lea ma le Tulafono lea i lau Matagaluega, e i ai lou taofi ua tataua ona faagaioi faatino le Tulafono lea. I le vaega lava lea e tasi o tatou fanua, o lea e silafia e 80% o fanua o le atunuu o fanua faale-Aganuu, 10% pe 12% pe a o fanua umia saoloto, ia a o le isi vaega lena e totoe ai pe 10%, ia o fanua a le Malo. O lea ua matauina, o fanua lava ia umia saoloto, o lea ua tele ina faatau, aemaise lava le aufaapisinisi malolosi ia mai fafo. O lau talosaga i le Malo, pe le fai ma silasila i se faiga foi lea e tau fuafua le faatauina nei umia saoloto, aua e le tele, o le mea lea e tupu, ua matua alu i luga le tau o fanua. O lona uiga i lau vaai mamao i le lumanai, e ono tulai mai le taimi e le toe gafatia ai e tatou i Samoa le tau o nei fanua. O fanua ia e i totonu o le taulaga ua faitau fia miliona, ia vagana pisinisi tetele ia e omai e faapena, aemaise la pei e foliga mai o le a tau aafia atu ai ma fanua foi ia e nonofo ai le tele o tagata o le atunuu fanua umia saoloto, o le a alu ai lava i luga ma le tau o na fanua, e le toe taugofie. Ae o lau fautuaga i le Malo, se i silasila ifo, pe leai se isi faiga se i tau taofiofi ai i le tulaga lea. O lau asiasiga i le Motu lea i Sasae i o tatou uso le Faigamalo i Sasae, e tau faatau mai ai e le isi ou uso i Tutuila le fanua ia au, ou fai atu i ai, ia ou te le fia faatau le fanua aua e le mafai ona ou faatau. Ailoga ou te agavaa e faatau se fanua iinei, e le o au o se Amerika Samoa. Fai mai, e leai o Samoa. O le matou tulafono na o Samoa lava e mafai ona faatau fanua, o le mea lena e te vaai mai ai, e nofo lisi uma Korea ma tagata uma lea e iinei i Tutuila. Ia o au la pei ua faateia au i lea tulaga, ia e le faatau sau fanua aua e leai sau tupe, ae pei foi lele o le tala ua aumai, ia se i silasila ifo pe o le a se tulaga, ia silasila i ia tulaga faapea, pe mafai ona tatou faia, aua o la e fai mai latou, e agavaa i lalo o le tulafono ma le faavae o le Malo o Amerika. Ou fai atu, o e manaia foi la na, se i silasila ifo la i ai.

O le isi itu o fanua faale-Aganuu, ia masalo e oo mai lava le gataaga o tatou o lava i Mulinuu e sue le pule o nei mea o fanua faale-Aganuu, a o le mea e taua o le tatou faasinomaga, o lo tatou tofi mai le Atua, ae se i silasila ifo i ai ona o lea ou te tilotilo atu i ai i le tele o komiti, o lea komiti fai le latou lipoti, lea komiti fai le latou lipoti e aumai i le Malo fautuaga, pe faapefea se faiga foi lele e faaogaga ai i se tulaga foi lele e tau tatala ai le atinaeina o le atunuu, aua o lea e tele le taofiofi foi lele ona o mea nei o pule ma tulaga faapena o fanua faale-Aganuu. A o lau fautuaga i le Malo, na ou tau foi i le isi lipoti ua fai sina leva ua galo ia au ae ou te i o le lipoti foi o le 1993, ua ou tilotilo atu ua ou toe manatua le Lipoti lena lena foi komiti sa Taitaifono ai le Afioga i le sui usufono ia Samau Timani, ou faitau atu i ai, e manaia foi nai fautuaga a lena lipoti ó ma le anoanoai o isi mau Lipoti e fai i le mataupu lava lea o tatou fanua nei.

22 IUNI 2017

**Tulafono Tau Faaoifi o le Faatatauina o Tupe 2017/2018
– felafolafoaiga i luga o le faitauga faalua**

O lau fautuaga i le Malo, se i silasila ane o lena e i ai si faitotoa lena na tuu e o tatou tuua i totonu o Tulafono Faavae. Pe ua le tatau ma talafeagai i lenei vaiata, ia silasila ane i ai, le fuaiupu 109 e aiga lava ma le fuaiupu 102, pe i ai se faiga i ina ae tofi se komiti foi lea e tuufaatasi se fesili, ae ave se fesili i le atunuu, po o le fea le mea e i ai le finagalo fulisia o le atunuu i se way forward po o le fea e tatou te agai i ai, ia faataoto ai se polokalame ma se auala, se direction e tatou te agai i ai i le lumanai. A tigaina le Malo, sau lea komiti ma lea komiti ma lea komiti, alu ai ma tupe, ae o lea lava e le iloa tonu po o fea e tatou te agai i ai, a o lea e i ai le avanoa lena mai le Tulafono Faavae. Se i silasila ifo, pe le ua talafeagai ona faaoga aua e ave faafesili i le isi Faiga Palota lea e lumanai, ave faatasi ai pe ave faafesili i le atunuu. O fea o taoto ai le finagalo o le atunuu, ia ona tatou iloa lea po o fea le mea e tatou te tapena agai i ai. O le tulaga lea ou te talanoa atu ai i lena mataupu, ou te talitonu o se mataupu maaleale, e le faigofie le mataupu ae ua tausaga o taumafai le Malo e tau saili se auala. Atonu o se auala lea ua ou faatu atu e au ia, ia pe talafeagai pe leai, ae tatou vaavaai i ai ina ia maua ai se isi laasaga i luma atu e tatou te agai i ai.

Lau Afioga i le Fofoga Fetalai, e le o faaitiitia i lau vaai le faafitauli lea e tupu mai totonu o le taulaga o lea foi sa saunoa ai lou uso le sui usufono mamalu mai le itumalo o Palauli le Falefa i totonu o le taulaga, o le mea e....e manaia le finagalo aua o le faaiuga o le faaiuga a le Minisita o Aoga po o fea e agai i ai. Ou te manatua lava le vaiata i ai a o ou galue foi i le Malo, e i ai le taimi na Fono ai le Palemene a o Palemia le Afioga Tofilau, ou sau foi lea nofonofo mai tua pei o Faaluuluga foi o Matagaluega, na talanoa ai foi le mea lea e le o se mea fou, sa tau ai foi la tamaiti faatau ula i totonu o le taulaga i lena vaiata a o le i tele ni mea ia o afitusi ma mea vili taliga, se i tulou ma isi mau oloa ia e faatau solo. Fai mai le tali a le Minisita sa i ai i lena vaiata, aua le faia tamaiti, tuu pea tamaiti e o e faatau ula, o tamaiti nei a matutua atu, o isi faipisinisi iloga ia o le atunuu o le a tulai mai, ioe, o le tali lena a le Minisita. Ou te nofonofo mai lava i tua ma ou faapea, e ese foi le maoae o lea tofa, e aua le o i le aoga ae o e faatau ula. Ou te manatua la vaiata i ai, e i ai lava si tamaiti i lena faatau ula, e masani ona faatau ula i tua o le RSA ma taamilomilo ai i le taulaga i ia aso, na ou masani mai lava isi tama a o talavou lava e sau mai le faaitu le la, o la e soisoi le Afioga i le Minisita mo Aoga, masalo e silafia e Loau, e oo mai lava i le taimi lenei, o lea e fai ma ma feiloai ma fetau i Apia, ua matua lava si tama, o la lava e faatau ula, e oo mai lava i le aso o la e faatau ula. E pei la o le tulaga lea, a, aua o lau Afioga i le Minisita mo Aoga e te silasila totoa i vaega ia, po o a ni polokalame aoga, o polokalame e atili faaleleia ai taleni ia pe afai o le tau o taleni ia i tamaiti lea e i ai, ia pe taofi mai i ia mea ae o e aoga. I lau vaai o le mea e manaomia, e manaomia se specific direct action i aiga o tamaiti nei, ioe, o lona uiga e tatau ona i ai se task force e o e faatalanoa matua.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

E i ai le isi aso na ou i Apia, ou vaai atu lava isi tama lea, pei o nai ona alo lea e faia le mea lea e tutu lava la le toeaina i luma o le isi faleoloa ou alu atu lava lea ma talatalanoa ma ou fesilisili atu i ai, ma ou maua ai, o le toeaina o lea ua nofo i se vaimea o Vaimauga ea po o Faleata ua faatea mai ma le latou nuu. O lona uiga, e i ai tagata faapena ua nonofo i Apia ma a latou fanau ua le mafai ona toe foi i tua i o latou aiga, o lea la e tulai mai ai le faafitauli. E le o le faafitauli o le faatauina o oloa i lau vaai. O le mea lea ou te vaai i ai, o le o faatau oloa ae fai ai ma isi uiga ma aga faasolitulafono, o le faafitauli lena o lea ou te vaai i ai....

FOFOGA FETALAI: Toe lua minute o le sui usufono, manaia le saunoaga a le sui usufono, e faailoa atu toe lua ou minute.

Tofa Hon LAUOFO FONOTOE NUAFESILI PIERRE LAUOFO: Faafetai i lau Afioga. O le tumutumu lea na uma atu nei o le Sisigafua, ou te i Apia i luma o le isi faleoloa ae fai atu tuliga a le sikulati ma le tamaitiiti e faapea, o tamaiti ia. Na ona alu atu lava o le tamaitiiti moulu i le tumutumu o tagata ia tu loa ma le sikulati ua le iloa po o fea le tamaitiiti. Ae sau le sikulati ou fesili atu i ai, o le a alii le mea ua tupu? Oi se oso atu lava le laitiiti lena ma le ato a si tina matua lea e nofonofo mai i i, ioe. Ia ai o si tina matua faatoa nofo ifo i lalo e malolo foi lele i le aasa foi o le la ma le vevela o le aso, e faatoa tuu atu lava i lalo lana ato ae oso loa ma le laitiiti lea. O ituaiga uiga la ia o lea e tulai mai i mea faapea ma le anoanoai o isi mau faafitauli o lea ou te maitauina, ae ona o lea ua saunoa mai le Afioga i le Fofoga Fetalai a o lea o le a faaiuiu atu nai au mataupu ia ona ou nofo ai lea i lalo.

Lau Afioga i le Fofoga Fetalai, o tulaga na i tamaiti nei, o lona uiga e tatau ona matua saili aiga, matua e o i ai e faatalatalanoa. O le a le fesoasoani lea e manaomia ina ia ave ni polokalame foi ia e maua ai ni galuega e saili ai galuega a matua ae tuu tamaiti e o i le aoga, ia faaaoga tamaiti ia atamamai. Aua a o e fai ni polokalame e aoao ai tamaiti e o e fai mea ia ae le o i le aoga, ia talofa e, o lona uiga o le a matua tumu le taulaga i tamaiti valea, e le o i ni aoga ae o lava e fai nei mea. E pei o le tulaga lena lau Afioga i le Minisita mo Aoga, se i silasila ifo i ai i le vaega lea.

Lau Afioga i le Fofoga Fetalai, ua ou manatu e tele nisi mea ou te fia tautala i ai, a, ae pei o le tulaga lea o nai mataupu na ua ou taua i le lauga i lenei aso, ae ia manuia tele le alo atu o le tatou Manu Samoa i le taaloga i le aso a taeao. Ia tatou tatalo ma tatou tapuai, ia manuia ma malo le Manu Samoa sei faafiafia tasi ia le Taitaifono o le Komiti o le Iuni Lakapi. Ioe, ua ta alofa atu foi i le Afioga i le Taitaifono, o ta vaai atu i le taaloga foi lea ma le Olopeleki lea na uma atu nei, ia le malulu o Aukilani ae tu mai si toeaina ma maalili mai luga i o, ae ou vaai atu, o la e maalili mai ai ma Faumuina Liuga i ona autafa. Ia ona o ta alofa lava lea i ai, ia ona ou faapea ifo laia, ae, se o le ala faaletonu lea o le tatou au. O le o fua o nei toeaina e le i lakapi muamua, e o e loke ia mea o lakapi, a ua le se i malolo laua ia i inei, ioe.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, masalo o le mea e le i aumaia e le sui usufono. Ua iloa foi o mea faapenei, e le o mea tatou te faalogo i ai, e moni, ae o mea tatou te le o faalogo i ai. O lona uiga o lana tatalo lea na fai, talosia ia faiaina le Manu Samoa, e mataga ai le toalua lea. E le afaina la pe a ana faapea e na o au, ae lea o lea sa matou i ai ma Le Ao o le Malo. Talofa i si Ao o le Malo, e ui lava ina e le o taua, ae lea ua matua fetuu e le sui usufono.

FOFOGA FETALAI: Se i tulai mai le sui usufono pe sao le Palemia.

Tofa Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai, ia e pei na o le Palemia ma Liuga lea na ou iloa atu i TV, ou te le i vaai atu i se Ao o le Malo, e pei o le tulaga lea na mafua ai ona ou taua o laua suafa. E faaiu atu ai la i lau fautuaga....

FOFOGA FETALAI: Faamanatu atu i le sui usufono, sa i ai ma Lealailepule.

Tofa Hon LAUOFO FONOTOE NUAFESILI PIERRE LAUOFO: Ou te le i maua Leala i le TV, ae o lona uiga, o le ala tele lena o le sikoa a le Olopeleki, o lea sa i ai ma Leala.

Ae o lau fautuaga i le vaega lea, e faatalasua lava ae ou te alofa tele i le Afioga i le Taitaifono o le Komiti o le Iuni Lakapi. Ua matua foi lona soifua, ma ua tele foi lona aoga. Ia ae ua ta vaai atu foi ua tau le atoa lona malosia i isi taimi. Ae o lau fautuaga, e lelei lou see mai i i, e alu atoa lou taimi e taitai ai lo tatou atunuu, ae tofi atu le Minisita o Aoga, Taaloga ma Aganuu e alu atu e Taitaifono i le Komiti lea. Leaga o le Minisita o Aoga, Taaloga ma Aganuu, o tama o le Manu Samoa. Manu Samoa e aupito i tautaua lava lea o le 1991, lea e i ai la ia Loau Sola.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai....

FOFOGA FETALAI: Se i toe tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea lea e leaga ai mo le talanoa o le tagata e le i lakapi, e le i iloa foi le galueaia o mea faapenei. Ae e te le i alu i totonu o le Asosi o le Iuni Lakapi a Samoa, e tataua ona i ai sau Iuni, ona faatoa mafai lea ona e auala i totonu.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

A e auala la i totonu, e le mafai ona e nofo lava oe ma tofi. E tofi oe i le fono foi lea faaletausaga e i latou, e pau lava lea o le tagata e agavaa i le mea lea. Ou te le o fai atu o au, ae o le mea lena e faavae ai le latou faaiuga. E le tofia la e au, ae tofi e latou o la latou te iloa o la e i ai le aoga o le tagata.

Ia o le mea la lea, ou te fautua ai i le sui usufono, e sili foi ona e alu oe e fai sau Iuni Lakapi ina ia e oo mai ai i totonu, ona e iloa ai lea o mea e fai. E le nofo lava au ma tofi au. Ae o lau tatalo foi ia ou see ese ma ia mea ua ou matua, o le fatu o au o le matua malosi lava. E le iloa pe malosi atu ai loʻu fatu i lou fatu.

FOFOGA FETALAI: Ia se i tulai maia, o le fatu o le toeaina e pei o le fatu o le liona.

Tofa Hon LAUOFO FONOTOE NUAFESILI PIERRE LAUOFO: Leai o lau Afioga i le Fofoga Fetalai, leai o mea o fautuaga faataatia atu, e leai mo manatu e faatupu manatu. Ae afai foi e leai, e leai, e leai se mea o afaina ai.

O le matua lelei lava o lau Iuni lakapi la e i ai. E fai laugatogi a le matou iuni i le vaiaso lea lau Afioga, o lea o le a aumai lau tusi valaaulia, afio atu, tatou faatasi. O le Iuni foi lenei, e feololo lava nai Manu Samoa lea e i ai, Ia lau Afioga i le Fofoga Fetalai, ia agalelei le Alii i le Palemia ma le la itu o le malu, ia faapena foi lenei itu o le Maota, ia faapea foi ia Faauluuluga o Matagaluega, ma le tapuaiga a Samoa ia faapena ona alofagia e le Atua, maua pea le soifua laulelei, ia aua le atinaeina o le tatou atunuu ma le agai i luma. Ia o le matou faamatalaga lea ma le faaaloalo, ia manuia le Fono.

FOFOGA FETALAI: Malo, faafetai ua faaiuina ma le manuia le saunoaga a se tasi sui sinia, sui usufono matua foi o lea itu o le Malo ia o le Palemene, ia ma ua avanoa foi lumamea nei o le Palemene mo se isi sui usufono e faaaau le saunoaga.

Tulai maia, se tasi o sui usufono o le toe ulutaia o lea itu, le Afioga o le sui o usufono mo Aleipata Itupa i Lalo, lau Afioga i le Matua Tafua.

Afioga TAFUA MALUELUE TAFUA (Aleipata Itupa i Lalo): Lau Afioga i le Fofoga Fetalai, ua uma ona ou faatulou i le Maota, ma le sasao mai o le Taitai o le Malo faapea le Kapeneta, Minisita Lagolago faapea foi le mamalu o sui a usufono, o Faauluuluga o Matagaluega, faapea foi Matagaluega Tumaoti o le Malo. Ia faapea foi le Failautusi o le Fono, ma le Sui Failautusi ma le Matagaluega. Faatalofa atu i le paia ma le mamalu o faafogafoga mai, aemaise si ou itumalo o Aleipata. E le tele ni manatu o le sui usufono, ona o lea e tuliloa le saunoaga a le Palemia ananafi.

Ia tuu atu ia, o mea tuai lava nei sa pisapisa ai foi i lea Paeaiuga ua uma atu, ia lea na ona faamanatu ma taugologolo. E lelei lava le taugologolo, tuitui atu ia tatala mai.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Pei o le vaega muamua lea o le a ou faasolosolo atu i le Minisita mo Fesootaiga, Faamatalaga ma Fesootaiga Vavave Faaneionapo le Afioga ia Afamasaga, faafetai lava mo le saunoaga manino sa e saunoa mai o lea ua manino le matou TV i Aleipata aemaise Amaile ma Tiavea atoa ai ma Samusu ma nisi o nuu o le itumalo. Ia se i faola le matou TV i le weekend aua o le Aso Faraile lea na tea nei, sa ou matamata ai i le sky a lo matou faifeau EFKS. E tai lata lava i le 100 tagata o le matou nuu sa matamata ai i lea taaloga, ia e faaataata lafoga foi le saunoaga a le Afioga ia Lauofo, ia ae uma loa le malologa ua toe sosoo siko e 2 a Niu Sila ou faamavae loa ou alu loa i le fale ou te malolo. Ua ou le fia, ua ou ai niumea ua ou le fia matamata i le taaloga. Ia atonu o ni lagona foi lea o nisi tagata, leaga o lea ia tatou alo i luma, o le Aso Faraile nei, atonu o le a famalieina ai le mamalu o le atunuu. O le tatou taaloga ma Uelese, o le Minisita o le...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai....

FOFOGA FETALAI: Ia se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Ae le o le faalavelave i le saunoaga a le sui usufono ae ou te momoli atu le faamalo. O ituaiga saunoaga ia e maua ai le faalototele o tatou tamafanau, o tatou tama la, la e taaalo, la e taaalo ma le agaga saili malo. O lo o tui o latou tino, ona o le maualuga i ai latou le Fua a Samoa. E toatele a tatou tama lelei la e taaalo i le Olopeleki, ae le i fia omai e tauave le tatou Manu Samoa. O nei foi tama, e i ai foi o latou aiga i Samoa nei, ma o lo o tuu atu le latou malosi e sii lava i i luga le igoa o Samoa.

E i ai lava le eseese o taaloga o le mafuaaga lena, e tele ia le mau faafitauli o faafeagai ma tatou. O le faafitauli o le tau faapotopoto mai maopopo mai o latou, faafitauli o le eseese o Iuni la e taaalo ai. O lona uiga o lea mea, o le ituaiga tauvaga lea e taaalo ai ia Iuni o le Saute, o atunuu uma o le Saute, Niu Sila, o le itu i Saute o le ekueta, e i ai Niu Sila, Ausetalia ma Aferika i Saute, o lea foi e alu atu ai ma tatou. E taumafai e fetogiai solo le polo, fepasiai le polo, e moomia ai latou e fit, toe saosasoa.

O le ituaiga taalo lea e taalo ai ia aulakapi i le Matu, taofiofi le polo, e pei e lilifa tele latou i tagata e mamafa ae le saosasoa, e le fit. O le mea la lena e tele ai le faafitauli lea e faafeagai ma tatou, o le tau aumai o tama nei e faia le tatou au toatele lea e o mai mai Matu. E faigata tele i le tatou coach ona tuufaatasi i le taimi puupuu. O lea foi a outou silasila atu i ai, e tele mau au e koleni ai le au lea a le Liona, ona faatoa fetai ai lea ma le Olopeleki.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O tatou o tamai au, e faigata ona tatou avanoa i luga, a maua se tatou avanoa, o le a le mea lea e tupu? Na ona o atu taaalo loa, e leai se tapenaga, ona o le faaletonu tele o tulaga ia o faiga o tonu fai a le aulapopoa ia e pulea taaloga a le lalolagi. Ae o lea e taumafai ia tatou tama, ua pau le au a Uelese, ua pau le au a Aialani, ua faiaina le au a Sikotilani, ua faiaina Ausetalia, ua faiaina Italia. Ua toe laititi lava au ia lea e le i malolo, ae i ai lava le 1st, e i ai lava taimi muamua e pauu ai tama ia. O lea la e taumafai, e taumafai lava nai tama, o le mea lena e ala ai ona matou o e faalototele, ina ia tilotilo mai tama ia te au, ma Le Ao o le Malo, ma latou e mafai ona auai, o matou nei e suia le Palemene lenei o Samoa, e suia e fai ma sui o le tapuaiga a Samoa i ona tulaga faalupe. Ina ia toto i fatu o tama ia lototele, ia lototele ma lotomalosi ia tauave le Fua o Samoa.

Lau Afioga i le Fofoga Fetalai, e ui lava ina faaataata lafoga a tatou upu, ae tele lava le l malamalama i le mea e ala ai ona tau napo tele tatou e faataua a taaloga mo a tatou fanau. O tatou fanau mo le taimi lenei, e toatele tele, e le maua uma ni galuega. O le mea lea ia tatou taumafai e faaagai i taaloga ia saili ai le lumanai o manuia o tatou.

Lau Afioga i le Fofoga Fetalai, o le mea lea ou te faafetai ai i uluai saunoaga a le sui usufono, o saunoaga ia e moomia e tatou i le taimi lenei. E faalototele ia tatou fanau i le taumafai atu aemaise o le taaloga lea i le aso a taeao.

FOFOGA FETALAI: Malo faafetai, ua tele le taua o le saunoaga a le Palemia, e le gata i totonu o le Palemene, ia ae faapea foi le tapuaiga mai a Samoa, o lo o taufesilisili, ia o lea ua manino au o fala. Ua logo i le tuli foi le tata i le tulaga o le lagi malofie, ia ma ua manatu o se saunoaga faalaeiau ia faapena foi ona faaosofia ai le tapuaiga a le atunuu, ina ia aua nei o tatou mafuli tele i le tulaga o le manatu mama ona o le faaiuga o taaloga, ia ae tatou te faamoemoe pea i le Atua ia foai le malosi i alo ma fanau o le atunuu, latou te tauaveina ai le fua o le atunuu. Ia e manino ma malamalama faafetai atu i lau Afioga i le Palemia, maua lenei avanoa e faafofoga mai Samoa ia aemaise o le Palemene ina ia tuufaatasi o latou finagalo ma o tatou lagona e tatpu te molimoli lapalapa o malo ma tatalo i le Atua, e fesoasoani mai ia aua le taaloga i le aso a taeao. Ia tulai mai le sui o Aleipata Itupa i Lalo e faaauau le saunoaga.

Afioga TAFUA MALUELUE TAFUA: Faafetai i lau Afioga faapea foi le saunoaga manino a le Palemia po o le Taitaifono a le tatou Iuni Lakapi. Ia o nai manatu vaivai lava o si toaina Aleipata e unai ma faamalosi ai i le tatou au. E le gata i lea, ia a oo lava i le taimi e silasila mai foi ua lanumoana uma le paka i itu e 2 o le tatou fale matamata, ia atonu foi e faaosofia ai moegaluaga i finagalo ma manatu o si o tatou au taumafai.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Pau lava lau Afioga i le Taitai o le tatou Iuni Lakapi na ona faaopoopo atu, malie lau Afioga, leai e le tuumamaina lau Afioga i Le Ao Mamalu o le Malo, ma lau Afioga i le Taitaifono faaopoopo i ai ma le Minisita mo Aoga, Taaloga ma Aganuu, o ia foi sa avea ma Manu Samoa, atonu foi e atili ai ona silasila ma maimoa i ai tama taaalo, ma atili ai ona malolosi pe a silasila i le Minisita mo Aoga Taaloga ma Aganuu. Ae o le a ou see ese ma le vaega lea ma le faaaloalo.

O le tulaga i le Minisita mo Fesootaiga, Faamatalaga ma Fesootaiga Vavave Faaneionapo, ou te le iloa pe masalo naí .

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalaií .

FOFOGA FETALAI: Tulai mai le Palemia faamolemole.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e pei lava e le i maua mai e le sui usufono o lea sa matou auai uma ma le Minisita mo Aoga, Taaloga ma Aganuu. E manaia foi lana saunoaga sa fai. O le mea lea o lo o i ai lava Mose ma le Auperofeta latou te fuafuaina mea taua faapea.

FOFOGA FETALAI: Tulai mai le sui usufono.

Afioga TAFUA MALUELUE TAFUA: Ia o lea ua ou manatua sa taua eí .ou te le i vaai foi i se isi. Faamalulu atu i lau Afioga ou te le i vaai ia oe. Ae ui i lea, o lea sa e maluluina ai foi ma oe ia i lea po. Ae o le a ou see ese ma le vaega lea. Tatou tapuai ia ma nofo tatalo ia manuia le taumafaiga a le tatou au i le Aso Faraile.

Se i faaopoopo atu lava le vaega lea i le Afioga a le Minisita mo Fesootaiga, Faamatalaga ma Fesootaiga Vavave Faaneionapo. E momoli atu foi le agaga faafetai i lau Minisita Lagolago, aua sa folafola mai lava e lau Minisita Lagolago o le a tu malosia e faaola ma lelei le fesootaiga o le Televisi i tua ia matou. Ia faafetai atu ma le faaaloalo.

E momoli foi le agaga faafetai i le Ofisa o le Regulator, talu ai ona sa auala atu ai foi le faamalosiua e vaavaai Televisi ia a tatou. A faapea e le i oo atu le Televisi i tua ia matou, ia e tatau foi ona fai i ai se lapataiga aua o lena e i ai le malosia ia te oe, e aveese ai le laisene pe a le soo lo tatou atunuu. Ae faafetai tele i lau Afioga i le Minisita.

Oo mai lea i le Minisita mo Faamasinoga ma Pulega Tau Faamasinoga, lau Afioga ma le faaaloalo sa ou faalogologo lava foi i lauga a nisi o sui usufono ananafi, talanoa lava le mataupu lea, tasi lea alagatupe tele a lo tatou Malo o lo o maua mai i tagata tafafao maimoa mai fafo.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

E pei foi ona saunoa nisi ananafi ma tali foi le Palemia. E taua tele le mea lea sa taua i le faaotaota i le taulaga, faapea foi ma tagata, ou te vaiaia pea nisi e o malaga atu i taavale e le na o matou i tua, e atoa uma lava le atunuu. E alu lava pe taumafai se apainu, pe taumafa se taumafataga ona tiaia lea o le ipu plastic po o le apainu. Ia e togi lava i fafo i le auala, ao lea la sa ou fesili ananafi i le sa avea ma sui komesina o leoleo. E i ai le Tulafono la e i lalo o le Police Act, o lea la ou te talosaga atu ai i lau Afioga i le Minisita mo Faamasinoga ma Pulega Tau Faamasinoga, se i taumafai foi lele e faaopoopo nisi nifo se tele o le Tulafono, o lea foi e faafofoga mai le Loia Sili a lo tatou Malo. E tataua ona iloilo totoa e i ai le Tulafono a Sigapoa ma isi atunuu tumama a le au Asia. E palasi tulou le otaota i le auala, instant fine loa. E manaia pe a aumai se tatou Tulafono faapena e teuteu e aumai e pasia e le Palemene. Ona so o se taavale a la e tiaia le lipisi tulou a o la e molimau se tasi. Na ona aumai lava issue loa i ai le faasalaga. E le gata e maua foi le tupe maua a lo tatou Malo, ae faapena foi ona fesoasoani i le faamamaina o le atunuu. Masalo o le faatolu lenei ona ou lauga i le vaega lea. Ma le faaaloalo lava e tuualalo atu ai i lau Afioga, silasila ifo i lea Tulafono pe mafai ona toe faamalosi ae faatino lava e le vaega lea o le LTA faapea foi ma le Matagaluega o Leoleo.

Oo mai lea i le Afioga i le Minisita mo Aoga, Taaloga ma Aganuu, faafetai lava mo le finagalo faaalua o lau Afioga sa ta feiloai foi ananafi, na ou tusi atu i se tasi o faiaoga a si o matou nuu na malaga i Niu Sila, ai lava pe na alu e tau apu ma si ona aiga ma ave si ana fanau ma le faamoemoe e o atu nonofo mau i o. Ae te i ua le faanoi mai, na uma loa annual leave le toe sau, o lea la ua malolo. Masalo ua ono masina talu ona foi mai ae sa sue se galuega. Talu ai o le acute shortage po o le 1 lava o matou faiaoga mai tua lea sa ou tuualalo atu ai i lau Afioga. Ae faafetai masalo lea ua i ai le fuafuaga e faaauau. Mo le silafia e lau Afioga i le Minisita, o le tulaga o lo o i ai le matou aoga lea o le Primary School i Saleaamua, e lua faiaoga lea o lo o i ai nei ma le pule aoga, ae 160 tamaiti aoga. Faamolemole lau Afioga ua uma ona ou tuualalo atu, ae lelei foi le faalogologo mai o si o matou itumalo, o lea lava e tuu mumusu atu i lau Afioga ma le faaaloalo. E 160 tamaiti aoga ma ona tupu ae na o le lua faiaoga ma le pule aoga la o lo o i ai nei. E faapena foi i le matou Kolisi lea i Aleipata o Vaisuli College o lo o i ai foi le í e le o lava a matou faiaoga ma le faaaloalo.

Ona ou oo mai lea i le Afioga i le Minisita o Tupe, masalo faafetai lava, e leai se tala tele e faia i le tatou paketi o lea e tilotilo atu lava e leai se eseese tele o le tausaga na tea nei ma le tausaga lenei. A tilotilo i le tupe lea e faagaioi ai lo tatou atunuu, e ese mai le tatou paketi, masalo e tai lata i le \$1.5pilionia o lo o faaamilo i totonu o le taulaga ma le atunuu, lea e faagaioi ai le tatou tupe faagaioi mo le lautele o le atunuu. O le taua la o lea faamoemoe, o le tele o seleni ia e le o faamaumaua, e le gata e omai ma o tatou aiga pe a tutupu faalavelave, e lafo mai e nai fanau. e aumai i nai uo ma e masani pe a malaga mai.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ae pei ona saunoa le Palemia, e tasi lea alagatupe tele a tatou, o tatou tama taaalo. E le o faamaumauina ae o le matua tele lava o le seleni i le faamanuiaga o lo o maua mai i o tatou aiga. O le faataitaiga o nisi o alo foi ma fanau i Niu Sila, o le isi alii e í .pe toalua ea tama Saleaaumua lea o lo o taaalo, e taalo le isi i le Reds lea na sau i le taaloga lea na uma nei ae o le isi alii e pei lava o se tama Lalomanu. O le tama la lea na ma fetau ma lona tama ua lua nei masina talu ai i Aukilani, ae mimita mai le tamaloa i lana taavale fou lava pei lava se Ford Ranger ea. O lana tala, Tafua e leai ni au tupe ae o le tupe na aumai i si ou atalii na sau lava i lana konekarate lakapi faatau loa lana taavale fou. O faamanuiaga ia e ese lo ta fiafia i ai, e le lau maua foi faamanuiaga faapea. Ave le faaamua ma le faamanuia ma le faamalo i nei alo o le atunuu. Ae sao ai le saunoaga a le Palemia, o le mea lea e tupu e tele tele tama lelei lava atamamai ae ua le fia o mai e taaalo i le Manu Samoa, ona e pei lava o la e silasila latou i le tele o seleni e maua mai le All Blacks, o au ia a Ausetalia ma nisi foi atunuu e pei o Egelani sa taaalo ai nisi alo ma fanau o le tatou atunuu. O le faamanuiaga e sasaa mai faauaga mai le lagi faamanuiaga e aumai i alo ma fanau ona o lenei foi matata o le taaloga o le lakapi.

Faafetai i lau Afioga i le Minisita o Tupe, ou te lagolago i le tulaga o lo o i ai le tatou Tala i le Tupe. E pei lava o lea e i le va o le \$850miliona ma le \$900+miliona lalo ifo laititi o le piliona le tatou paketi. O lea foi e matau ma le totoa o lea e maua mai nai fesoasoani grant ia e fesoasoani malosi i le tatou paketi. E pau lava le mea, ia tatou ave aveā. Talosia ia le manaomia sau supplementary e pei ona saunoa nisi o sui usufono ananafi. Atonu o lena ua lava le uta ma le tofa aua le faasoasoina o le tatou tupe.

Ona ou oo mai lea i le Minisita mo Tina ma Tamaitai, Atinae o Nuu, Afioga ma Agafesootai, e momoli atu foi le faafetai i lau Afioga. O lo o vaai lava ma le manino ia tulaga uma o le faagasologa o lau Matagaluega. E momoli atu foi le agaga faafetai ma le faamalo, e pei ona ou tuumumusu atu i lau afioga ananafi, ua maea le faafitauli sa i ai i nisi o nuu o le itumalo, ua uma ona teuteu lea faafitauli. Ae faafetai foi mo le fesoasoani faafetai mo le lagolago mai.

O le afioga i le Minisita mo Tupe Maua, e leai o oe o le tama Atua e le tau selu atu foi. Faafetai i le galuega faafetai foi i le í .. e pau lava sina ou popolega lea e i ai lau Afioga e pei ua tele nai au Tulafono lea e aumai ae foliga mai o le sii lava ia maua se seleni. Ae na ona tuualalo atu, silasila totoa lau Afioga i le tatou Tulafono lea e faaofi mai o lafoga a nai faifeau. E pei ona saunoa nisi o sui usufono ananafi, e le tele i ai sau tala. E pau lava le mea ou te tuualalo i lau Afioga, silasila totoa i lea vaega o le Tulafono. A fai ni ai o lau Paeaiiga, o se faataitaiga o le a avatu o le faifeau foi lea a matou i tua, afai o le alofa na o le \$1,000+ i le masina, o lona uiga na o le \$12,000 pe i lalo ifo o le \$15,000. O lona uiga e le tau totogia se lafoga a le faifeau lea. Pe o le sao lea o lau tilotilo i lau Tulafono?

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ae faafetai foi i le Minisita o Tupe ua uma ona ou faafetai i ai, ona o le vaega lea o tatou totogi foi lea e \$15,000 i lalo e le totogia se lafoga. O le sao ea lea o lau faitau i ai lau Afioga? Faafetai o lena e luelue mai lou ao. O le manaia la o le vaega lea, ua le toe totogi lafoga le vaega lea, afai la o le tele o faifeau la e i ai nei e pei o matou i tua e sea sea oo i luga le \$20,000 ni alofa o faifeau i le tausaga. Aua o lona uiga la e le tatau foi ona totogia ni a latou lafoga. Aua a manino i ai, e pei o le mea o la e vaelua le income a le faletua ma le faifeau. E na o ni nai manatu e avatu i lau afioga e fesoasoani i lau Tulafono. O nisi vaega lea sa taua e nisi ananafi o la e totogi lafoga a faifeau la e galulue nei, o la e fetau, aua o la e galulue o la e maua le latou income. O se tuualalo lea i lau Afioga, ae faafetai mo lau taumafaiga, e saolele lava lau silafaga o lea e manaomia ni tupe mo le tatou atunuu. Ia taumafai e sele mai e pei o le vaega leaí .

FOFOGA FETALAI: Malie le saunoaga a le sui usufono ae toe lua minute. Se i tuu atu le avanoa i le Minisita mo Tupe Maua.

Afioga Hon Tialavea Fea Leniu Tionisio Hunt (Minisita mo Tupe Maua): Faafetai i lau Afioga i le Fofoga Fetalai, e leai foi se manatu e faalavelave i le saunoaga a le sui usufono ona o la e fesili sao mai. O lena e sao le manatu, a le oo lava le tupe maua i lafoga i le Aso Sa a le faifeau i le \$15,000 i le tausaga e le totogia se lafoga. Ae e le lavea la le faletua e na o le faafeagaiga lava. E le vaeluaina foi le alofa e aumai sao lava le tupe o lo o avatu ona totogi mai lea o le lafoga. A le au i le \$15,000 e leai foi se matou galuega e fai atua i ai. Ae e tatau ona faatumu mai form i masina taitasi ma logo mai le ofisa i le aofaiga la e i ai. Ae se i oo mai le Tulafono ona toe fai atu lea o se manatu.

FOFOGA FETALAI: O le mafuaaga lena, e manatu le Nofoa e faamanatu atu e le i i ai se tatou Tulafono a o lea tatou talanoa. Ae manaia le saunoaga a le sui usufono e faatupu manatu i le lumanai. Ae tulai mai e faaii mai le saunoaga.

Afioga TAFUA MALUELUE TAFUA: Lau Afioga i le Fofoga Fetalai, o le agaga lena o lea e faaeteete ai foi se gagana e avatu, ae leaga mo le silafia e lau Afioga o lea e i ai le \$2miliona lea e taua i totonu o le tatou budget. O le mea la lea e pei e foliga mai ua muamua le taavale solofanua tulou, ae mulimuli atu le solofanua e toso le taavale. O le ala tuualalo atu lea ma le faaaloalo. Ae ui i lea o le a ou see ese ma le vaega lea, i te i ua uma lou taimi e le íí .ae faafetai lava.

O le Minisita mo Faatoaga ma Faigafaiva, se talofa se i le uso, e tasi lava na lauga foi le tagata ananafi i le manu ainiu. Faamolemole lau Afioga i le Minisita, ua mafatia matou i tua i le manu ainiu, e fai lava sina tigaina i le vaega lea. E i ai si ou tamai toganiu la e fai i autafa o le auala, masalo pe a ma se sefulu nai niu ua faatamaia e le manu ainiu.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Sa ou alu atu foi i le Matagaluega i se tasi o au uo i le tolu tausaga talu ai. Na fai mai lava nai tama e alu atu le asiasiga ae masalo po o le 2018 e alu atu ai se asiasiga pe a ou laki, ae faamolemole se i silasila ane i le vaega lea. Ona ou oo mai lea i le Minisita oí

FOFOGA FETALAI: Faamanatu atu i le sui usufono mamalu, e maua foi isi avanoa tai lua tai sefululima minute.

Afioga TAFUA MALUELUE TAFUA: Ua uma lou taimi lau Afioga?

FOFOGA FETALAI: Ua leva ona ou faamanatu atu le lua minute ae faaii le saunoaga.

Afioga TAFUA MALUELUE TAFUA: Faafetai i lau Afioga, e leai e faaaloalo tele au i lau Afioga i le Fofoga Fetalai. Ia saga ulavale lava se isi i le Fofoga Fetalai e tasi le term ae o lau Afioga masalo pe o le lima lenei o Paeaiga o e Fofoga Fetalai. Ma le faaaloalo tele.

O le a faapuupu'u atu, lau Afioga i le Minisita mo Galuega, Felauaiga ma Atinae Eseeese, faafetai foi, e i ai lava le taimi foi lele a fai tusi e i ai le upu faapea pe a faaii i lalo le parakalafa mulimuli o le tusi. Ia thanking you in anticipation for the work that is yet to be done. O lea ua e saunoa mai o le a faatino, ae o la e faafogafoga mai le nuu lea o Satitua, o upu a nisi o toeiina ia te au. Ou te vaai maualalo lava i le matou nuu lea o Satitua, ae faamolemole o le auala i le aoga lea e le atoa se kilometer pe na o se afa kilometer le alu atu i le main road i tua. E masalo a faapea o ita o se loi ta te pologa i le ae o le auala, e pei o le mauga o Vaea le vaai a le loi i omoomo o le auala. Ma si a matou aoga o Saleaamua Primary School e le atoa se 400 mita le umi, ae a timu e matua palapala lava le aoga lea i le alu i tua i le faleaoga.

Masalo na o le pau ia o nai mataupu, ae faafetai atu lava i lau Afioga i le Fofoga Fetalai. E momoli atu foi le agaga faafetai i le Palemia ma le Kapeneta aemnaise le mamalu o sui usufono, Minisita Lagolago.

O le tulaga foi lea i matou faiaoga pei ona ou taua, lau Afioga i le Minisita mo Aoga afai o lena e agavaa foi ia o Minisita Lagolago po o Minisita Lagolago a le Malo, e maua le taumafa i tua pe a outou affio atu i aoga i nisi aso pe a outou o atu aua o lena e i ai a outou taavale. Ia ma le faaaloalo lau Afioga i le Fofoga Fetalai faapea foi sui usufono nei, ia manuteleina le tapuaiga a le aufaigaluega a le Malo ua tatou faatasi ai, Faauluuluga o Matagaluega eseese ma faalapotopotoga tumaoti, aemaise foi o si ou itumalo i Aleipata, manuia le tapuaiga. Faafetai.

FOFOGA FETALAI: Malo faafetai saunoa, faamalo foi malele i lau Afioga i le sui usufono mamalu mo Aleipata Itupa i Lalo lau Afioga i le Matua lau Afioga Tafua.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ia, ua avanoa foi le Palemene mo se isi saunoaga. Tulai mai lau Afioga i le sui usufono mamalu le sui usufono mo Faasaleleaga Nu.2.

Afioga PAU SEFO TAUMATA PAU (Faasaleleaga Nu.2): Faafetai mo le avanoa. Ou te muai faatalofa atu i le paia o le Maota i le afio o lau Afioga i le Fofoga Fetalai, afio lau Afioga i le Palemia, Tamaitai ma Alii Minisita o le Kapeneta, faapea foi Miinsita Lagolago ma lena itu o le Maota.

E faatalofa atu foi i lea Itu o le Maota i sui usufono mamalu uma i tamaitai ma alii faapea foi Faauluuluga o Matagaluega maualuluga o le Malo ma sui o Matagaluega, le Tamaitai Pule ma le Ofisa o le Fono Aoaio Faitulafono ua mafai ona tatou faatasi i lenei taeao. E ao foi ona ou faatalofa atu i le tapuaiga a Lana Afioga Mamalu, O Le Ao o le Malo ma Samoa aoao, i lau Afioga i le Fofoga Fetalai.

Ma o le avanoa foi lenei se i ou faatalofa atu i si ou itumalo, faafetai mo tatalo, malo le tapuai. Ae tapuai maia se i momoli so tatou sao i le Tala o le Tupe pei ona i luma nei o le Laulau a Fono i lenei aso Fono. Ae le i amataina lau folasaga e ao ona ou tatalo atu i lau Afioga mo lau faatagaga mo se isi 30 minute ina ia atoa ai lou itula, atonu e talafeagai ma le malu o le taeao. Ma o le a amata atu loa i le taimi nei lau folasaga ma lou faaaloalo lava.

Ua maea ona saunoa ma momoli mai le Tala o le Tupe e le Afioga i le Minisita o Tupe i le taeao ua sola, ma o lo o taulimaina nei le Tala o le Tupe lea, atonu o le tele foi o nisi sui usufonoí a o le mea muamua, o lo o manino lava le aumaiga o le Tala o le Tupe, o lo o i ai le faaupuga faapea, Agavaa tutusa ma le talafeagai. O le manaia ia o lea faaupuga pe a mafaufau loloto i ai i le aumaiga e le Afioga i le Minisita le vaega o le faaupuga, e loloto, e ui ina laitiiti le Tala o le Tupe ma le tamaitai tusi lea, a o le fatu lea o se faigamalo, o tupe. O lo o faapea mai ai foi, faamalosi le faavae ma tapena mo a taeao. E lua lava mea ia e aumai i le Tala o le Tupe lea, e le soona alu solo, ae a mafaufau loloto i ai, o le manaia ia. O lea e faapea mai muamua, Galuega taua e ao ona faatino i le taimi lenei. Muamua lena, o le manaia ia. Ae so o se Tala lava o le Tupe e aumai e tilotilo lava i vaegatupe o lo o faagaoioi ai se pisinisi po o se faigamalo. Tupe Maua masani, lea e i ai le siitaga laitiiti i luga, e ui e le o tumau, e le o pau, a o lea lava e i ai le siitaga i o e faameaalofa mai fafo. O lea foi e i ai le siitaga i luga, o lona uiga e savali lelei lava, e laalaa i luma le faigamalo, ae pau lava o lea, o lea e fai mai le Tala o le Tupe, tali o tatou manaoga. O lona uiga a faaitiitia o tatou manaoga, ou te iloa ua talafeagai le Tala o le Tupe.

Ona ou manatua ai lea o le tala a le Tootoalii, leaga ma te mafuta, na ma mafuta mai lava faatoa fitu ou tausaga, ona ou tilotilo loa lea i nai atinae laiti, fai mai loa lea o le toeaina ia te au, ou te manatua lava, òe fia magavai na e te iloa? ò Ou fai atu, ò Na o le tolu. ò Fai mai, o le a le tele o le tanoa lena o le a e tago e faatumu i le tolu magavai? ò O totonu tusa e tolu futu. Fai mai, e le tumu. Fai mai loa lea ia te au, toaga e toe fai se isi magavai. A tumu nei, ma e le tumu lava. Aisea? Aua foi o le manao, po o le a le taumafai o le faigamalo e faatumu le tanoa lea, e manao lava, e manao lava, e le tumu.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Leaga e faatupu le manao, faatupu le manao, o aso uma. E fiu lava la. Ae ala ona tumu, a lea e aumai i le faaupuga, fai sao e agavaa e fai le sao. Tatou te agavaa e fai le sao ina ia faatumu le tanoa lea. Ou te iloa e tele magavai o le atunuu ua tapue ai le mea lea, faatumu, ae le faamalieina ai le manao, e mananao uma lava i ai. Ae a faaitiitia le manao, lea lava ua fai mai, faaitiitia le soona faaalu o seleni. A o le suegata ia o le seleni, fiu tatou e sue. Ae faulalai loa le seleni faaalu loa, lea ua lapatai mai, vaega ia e aumai e tolu, lea e aumai, numera tasi, numera lua, numera tolu. Faitau lelei i ai i o tatou manao ia e aumai, aua e le mafai ona fai atu i o ae faasoasoa mai, lufilufi lima lelei. Malo lava i le afioga i le Minisita o lo o aumaia le taiala lea lea foi ua aumai le isi vaega lea e iva ma faamama, lea foi ua leai se lafoga o le VAGST, faaitiitia i le isi siitaga. O le vaega lea i le taimi lenei e tatau ona mafaufau atili i ai. O lona uiga, o le Malo lava a manao e sii le VAGST pe uma lenei tausaga, leaga o lea e le o maoti mai po o le a le umi. O lea foi e le o taua mai i i ina ia taumafai atinae o lo o i ai nei ina ia faatino vave. A o le fesili, o a atinae o lea e aumai i i? O a atinae e mafai ona mafuli i ai le atunuu e o e faatino? Tau mai se i o e faatino. Aua o le mea lea e i ai nei, tatou te le iloa po o a ituaiga atinae nei. A tatou toe foi la i le tanoa lea lea ua fia sefulu, ua ova magavai e tafe mai ai, tafe mai, o lea lava e tafe, tafe mai aumai i le tanoa, a o le manao lava lea o lea e auma, tagi, O le fesili faigata la lena, lea foi e aumai malosi i le Tala o le Tupe ia faaitiitia, faaoga tatau lelei tupe, faaoga fuafua i lea taimi ma lea taimi, ae aua le soona faaogaina. O le mea la lea e umi atu ai se faamatalaga i le Tala o le Tupe, ia faamalo faafetai. O lenei itumalo a o faalogologo mai, e matua lagolagoina lava e lenei sui usufono le Tala o le Tupe ua tuuina mai e le Afioga i le Minisita.

Ona ou agai mai ai lea i nisi o vaega o fautuaga e pei foi o lea ua faamatuu le vaegatupe tele i le Ofisa o Aoga. O lea foi e aumai le Tala i le Tupe, ia faamuamua le Ofisa o Aoga ma le maota gasegase po o le soifua maloloina. Taatia la le soifua maloloina se i ou oo atu mulimuli i ai. O le popolega o le sui usufono i le vaega lea i le seleni ua fuafua mo le aumaiga lea o faiaoga foi nei ua litaea se i silasila i ai le Matagaluega po o talafeagai, aua o isi ia ua ave i ai le faamanuiaga ma saunoa foi i ai nisi i le aso e maua ai latou faamanuiaga ona o loa lea e atiae o outou aiga ma nuu. Lona uiga ua tele lea taimi ua fai ma mea ua galo ai aoaoga, a o le vaitaimi lenei o aoaoga ua televave tele. Pe mafai la ona toe tulituliloaina mai e asiasi aoga le vaega lea ua misii e latou, po o le a foi o le isi mea ua mamai po ua tapena i ai le asiasi aoga i le tulaga lea, po o maua le soifua lelei ma malosi. E aoga foi o lea sa tatou faalogologo i le saunoaga a le Palemia i mea nei o telefoni, pe mafai ona i ai se suiga faapea ia alu le tamaitiiti aoga i totonu ua leai se telefoni. O lea foi na alu le tatou au lea lakapi lalo i le 20 tausaga, e sao lava le saunoaga a le Afioga i le Palemia, o mea ia e ono tutupu mai.

O le mea la lea, se i silasila totoa i ai le Matagaluega aemaise foi le Afioga i le Minisita i vaega ia o le a fuafua e toe faafaigaluegaina asiasi aoga, pe talafeagai le toe aumai, ae o lea foi o le a tuu le latou matafaioi o le o e tautua aiga. O lea foi o le a toe aumai. Afai e lelei, ia lelei, a o manumanuga na.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le isi vaega i le Matagaluega lava lea o Aoga, se i silasila totoa, leaga sa ou fesili foi i le Semina talu ai, masalo o le tausaga lea pe i ai se mea e ono taofia ai ona toe aumai fanau mai Salafai iinei, ona e fai lava sina faaletonu, aua e fia tausaga e leai lava se mea foi lele mo se fesoasoani e taofi ai le fanau mai o. Aua o lona uiga e eseese aoaoga, aua ua faatupulaia lava le faigata ma le taugata o le tapenaina mai o fanau aoga iinei, o le isi vaega, e leai ni o latou aiga, e omai nofo lisi iinei. O le manumanuga, o la e faapea o latou matua o la e o i le aoga, ae le o o i le aoga, o la e tafafao uma i tai, maua le moliaga, falepuipui. O le ala ala foi lena ua toatele ai Tafaigata i le falepuipui ona masalo o le 60% o Salafai lea e maua le solitulafono ona faatoatele ai lea, a ia faaititia lea vaega. Ia ave sao lava ia tumau pea le fautua o matua i a latou fanau, maua se aoga lelei e aooga lelei ai a latou fanau. Lona uiga o i e tataua ona faatu lelei ai i le taulaga lea i Salelologa.

O tulaga ia ina ia foia ai le feoai aemaise foi o le seleni o le a tele ona faaalu i le feoai ma le puipui o le fanau ina ia ola ma tilotilo foi i tu ma aga a le nuu e fafau mai ai le ala lea i le tautua.

FOFOGA FETALAI: Ou te faamalulu atu ma faamalie atu i le sui usufono mamalu o lo o saunoa, talu ai o lea ua tatou toai taunuu i le tatou malologa masani, o le a faaauau le saunoaga a le sui usufono pe a tatou talii mai.

Ou te faasilasila atu o le a faataatia ese Galuega a le Fono Aoao mo lana malologa masani.

Na faataatiaese Taulumaga a le Fono Aoao Faitulafono mo lana malologa masani i le itula e 10:45 i le taeao ma toe amatalia i le itula e 11:29.

Na toe faaauau Felafolafoaiga i luga o le faitauga faalua o le Tulafono Faaofi o le Faatatauina o Tupe 2017/2018.

FOFOGA FETALAI: Ou te faasilasila atu ua toe amatalia Taulumaga a le Fono Aoao Faitulafono.

E faia le malologa o lo o saunoa le sui usufono mo Faasaleleaga Nu.2. Ma ou te tapu lau Afioga i le sui usufono mamalu e faaauau le saunoaga.

Afioga PAU SEFO TAUMATA PAU: Faafetai i lau Afioga i le Fofoga Fetalai ua toe talii mai sui usufono mamalu ona ua maea le faasiliga malosi, ua maea foi le palegaauau aua le faaauauina o le Fonotaga i lenei aso.

O lo o tumau pea le vaega e fia faaopopo i le Afioga i le Minisita ma le Matagaluega o Aoga. O le isi vaega pei o le Tulafono lea o lo o tau fuafua mai pei o tamaiti ia pei ona taua e isi sui a usufono.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Mo lou silafia lau Afioga, o le isi vaega lea e amata ai ona maua le tautua o tamaiti nei tai 4 tausaga tai 5 tausaga e o atu e tilotilo ma vaegatupe foi e tusa ma le faatinoina o galuega i le faatauina o nai oloa e maua i nisi kamupani ina ia faaitiitia ma maua ai seleni aua e le gata i nisi o aoga, o latou uso aemaise foi o lafoga o faifeau, aua o le isi foi vaega lea e aoga e iloa ai e le tamaitiiti ona faitau le mea lea o le seleni, aua a faitau nei, e muamua lava iloa faitau, faapea atu e fia, e \$2, e \$2.50sene, e le umi lava ona tago le tamaitiiti lea i le \$10 ae fai le sui, o i ina e iloa ai, e ese le aoga o le aoaoga muamua lea o le tai 4 tai 5 tausaga, aua e le mafai, a o foi i aoga faifeau, e le maua lava le mea lea, aua o lea o le a latou tilotilo i le mea o le tupe, e vave ia ona pick up. O i ina foi e atamamai ai e o ai i le aoga fai mai numera ona atamai lea ma toese, o i ina e tatou te iloa ai o le toe fuafua lea Tulafono aemaise foi le atinaeina o le pisinisi. Aua a tatou fesili nei, e faapefea ona teu lau tupe lea? Ia ae leai se atotupe e o ma tamaiti nei e uu, e.....e faapoga, ua ta masani ai i le faapoga ae milo, a. O lona uiga a atamamai tagata nei e lelei le aoina o le tupe, e lelei foi i le taofiofi, ma matutua ae lava ma taofiofi lava le tupe e le soona faaalua taipei o mea nei e tagisa atu i le Malo ae soona faaalua, aua le soona faia leaga e faigata ona tapue mai, e pei lava o le Tanoa lava lea e fai atu e alu agai i ai lou mafaufau, ae ou te iloa foi o le Afioga i le Minisita sa oo foi i ai, o le mea foi lona e palota uma ai Ae le ia aua ua aoga fai le faasinomaga, o e toto lopa tau lopa ma faatau, o lona la e maua ai sina avanoa i le tulaga faapea.

Ona oo mai lea ou te faafetai i le Afioga i le Minisita e tusa o le tali mai o le fa lenei o Paeaiga o ave lava le talosaga a lenei itumalo, o le fa nei o Paeaiga, o lea o le a savali le 20 tausaga, o lea ua faatinoina le faleaoga lea na fesoasoani ai le Malo o Saina isi ou nuu lea o Sapapalii, faafetai mo Paeaiga i lona vaitau. O le malae lea i le pitonuu lea o Fatausi, e le i leva ona umusa, faafetai tele lava i le Afioga i le Minisita, ae sa ou avea i le 2001 lea e ia te au faamaumauga o lau lauga na ave ai. E pau lea o le nuu e 10 Manu Samoa na e omai ai. O lea sa faataatia ai, atonu e i ai se taimi, e le tagisa lenei itumalo o lea ua faatino, faafetai i le Afioga i le Minisita, o lou ai lea mo Safotulafai aua le faatinoga, o le matuai lelei lava o le faasolosologa o Matagaluega. A lelei lava mataupu foi ia e ave faapula i le tai 20 tausaga, o le manaia ia. O lea faatoa tali mai nei le Afioga i le Minisita, ia o lea ua 20 tausaga ua tali mai lava i le mea na ou manao i ai, ae faamalo faafetai.

Ona ou toe oo atu lea i le Minisita e ona le Lipoti lea o le Tala o le Tupe, ia e toe faapoopo atu lau faafetai tele lava. A silasila i mea nei o lo o tagisa atu lava, o auala galue. Se i taumafai ona fai ni asiasiga i nei auala galue, pe na o le auala galue e o e tafafao ai. A maitauina Salafai ia Safotulafai ma Faasaleleaga Nu.2, e tau talo atu lava luma e tau lava i Tuasivi, o le mea moni lava lona. Afai foi la o lea e fuafua se malaga a le Malo i le Aso Toonai, o atu loa tutu i le auala laupapa lea i Sapapalii amata atu ona faitau, e fitu maketi la e tutu ai.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le mea la lea, se i silasila totoa i ai i soona ave ave nei auala galue ae leai se faatinoga. Faafetai i lo matou nuu, aua o le mea lea e i ai na o le omai o le itumalo i lea pito o Asau aua e leai maumaga, leai ni maumaga e na o toga moli lava ma toga koko, a o le talo, ia lea? E na o Faasaleleaga lava e maua ai le talo. O le mea la lea e....

FOFOGA FETALAI: Malie le sui usufono mamalu, o lea ua tulai mai le sui usufono mo Vaisigano Nu.1.

Tofa Lopaoo Natanielu Mua (Vaisigano Nu.1): Lau Afioga i le Fofoga Fetalai, e leai e le o Safotulafai ma le afioaga, ia ae e le pule ai latou o la e pule ai le Malo, a o o la e tele lava le....e le iloa po o ai le tagata o lo matou itumalo la e omai faataua latou talo i luma o lo latou nuu. Lau Afioga i le Fofoga Fetalai ma le faaaloalo.

FOFOGA FETALAI: Malo faafetai mo le faasaoga. Ia tulai mai le sui usufono e toe lua ou minute.

Afioga PAU SEFO TAUMATA PAU: E le vaeluaina le faatonuga mai le Nofoa. E te silafia foi sa tatou malolo aua le faasiliga malosi, o lea foi na tomua atu lava lau talosaga ae le teena, afai lava o lou finagalo lea, faamolemole e toe faaopoopo le isi ou afa itula le mea lea ona e aoga mo le lautele.

FOFOGA FETALAI: O le a faapena ona fai, o lou taimi lea na lavea ai ma le taimi o le tatou malologa. E ui i lea, ia fuafua mai lava, afai ua lata ina maea, ia o le tulaga lena lau Afioga e
Ia tulai mai le sui usufono mo Anoamaa Sasae.

Afioga Alaiasa Muagututi'a Moefaauo Malagaitutogiai Sepulona Moananu (Anoamaa Sasae): Lau Afioga i le Fofoga Fetalai, o lea ua maitau atu e tele mataupu a le sui usufono o lo o sausaunoa nei, ia ae ua tele foi ana faitioga i le Matagaluega o Aoga, ae ui lava i lea, e a pe a toe faaopoopo sina 5 minute o le saunoaga a le sui usufono. Ma le agaga faaaloalo.

FOFOGA FETALAI: Malo. Ona o lea ua manatu lava le Nofoa e tuusaunoa ia le sui usufono mamalu o le sui usufono foi e le o malosi lelei o le a pule mai lava ia e fai feavatai foi le tatou galuega.

Afioga PAU SEFO TAUMATA PAU: O lau pule lea. Faafetai mo le avanoa, o le a ou le agai i le sui usufono lea, aua o se isi lava e faalavelave, o lona uiga e mautinoa e sao lava lau faaupuga lea e fai atu.

22 IUNI 2017

Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua

Faafetai i le Tala o le Tupe e toe faaopoopo atu i ai, o lena foi ua avatu se lagona o lenei itumalo, e pau lava lenei o le itumalo i Faasaleleaga atoa e tau talo atu lava luma o lumafale, sa ou faatonua e le toe ave a i i le maketi, aua o i ina e ta loa le 2:00, ona omai lea o nuu mamao ona tigaina loa lea o matou e faaopoopo tolu tau talo ae ave. Ou fai atu loa lea i ai, faatau i luma o le lumafale, a le uma toe ave i tua, toe oo taeao toe omai i ai. O lea e 7 maketi o lo o i ai nei.

Ona oo atu lea i le Tamaitai Minisita mo Punaoa Faalenatura ma le Siosiomaga. E talosaga atu o lo o i ai vai e tua i ai lo matou itumalo e 7 vai o lo o i ai, ae aoga vai na e matamata i ai tagata tafafao maimoa mai fafo, e taipei lava o le vai lea e i o i Piula. Faamolemole se i fai i ai se fesoasoani, e tolu si matou nuu lea o Sapapalii, ae fa vai ina ia faaoga o e le gafatia ona tologi le pili o le vai, o i lea e maua ai le tomaaga e fesoasoani ai mo le tausiga o nai aiga tau atiae.

Ia lau Afioga i le Minisita mo Faatoaga ma Faigafaiva, malo mo le sailiga, o lau matafaioi lava lena o le sailiga o tatou maketi. Silasila ae i le talo lea e mafua ai ona maua le mago lea e i e fai ma mago vave le talo po o le a le mea e faapea ai, ae se i silasila i ai leaga o le talo lea e toto nei o le ¼ e i lalo o le palapala, a. O i ina la lona uiga o le ono masina lea e fai ai le tupu o le talo i luga, o lena e afaina ai se i silasila i ai i le la ma le vevela. A silasila i ai i le talo lea mai Fiti e susu lava, o lona uiga e i lalo o le palapala, se i silasila i ai. O le isi mea lea ou te vaai i ai e vavae lava mo tiapula foi lea e ave, ae pei o le isi mafuaaga lena, se i silasila i ai i le vaega lena pe le o le mea lea e mafua ai ona vave mago le talo, leaga o lea e 6 i le 7 masina o lo o tietie le talo, i au suesuega faasaienisi, o i ina ou te iloa ai o lo o lape le Afioga, ae se i silasila i ai, leaga o lea ou te avatua na ou totoina vaai atu lea, e 2 lava masina e le mago le talo lea i lalo o le...a o lea, se i iloa mai tapena, e oo atu i Niu Sila ua....

O nisi saunoaga pei o le niu. O lea e tatou te masani i le totoina o le niu e o tatou tuua, o lea ua tatou iloa nei le faamai. Ae o lau suesuega ma ou faia le mea lenei o le toganiu faataitai, e toto tolu, e 20 au pupuniu lea e i ai nei, leaga foi o mea nei o fua o faatoaga e feusuai, o lona uiga a tutasi lava le niu lea, e alu alu lava i luga alu alu lava sau ua laititi le fua, pepe, ae a talanoa niu ia e tolu i luga o launiu, ou te tautino atu lau Afioga, o i ina e maua ai talanoa, a afaina le isi niu i le manu ainiu, talanoa ae loa le isi niu, ia vaai oe o le a faatamaia oe. Ia vaai la i ai, ia vaai e i ai le aulosoloso lea, o le launiu e latou te euina i lalo le manu ainiu lea, ia o mea ia e le soona tutupu tetele. Ae a alu le pikiapu e aumai, e tasi lava le pikiapu uma lelei fua o le niu lea i lalo o niu ia e tolu. Ae a fua foi i le toto aua a toto niu e tolu tai tasi, ia e oo atu i o i le fia mita, ae a toto niu ia e tai tolu, tolu, tolu, tolu, ia toetiiti masalo pe fia ni taga popo e maua ai. Ae tuu atu pea i le Afioga i le Minisita, aikia, e aikia tele le Afioga i le Minisita i mea faapena, ae faufautua i ai po o ua oo i ai sana suesuega, e tasi lena au suesuega i le taimi na ou faigaluega ai i le Ofisa o niu.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

FOFOGA FETALAI: Malie ia le sui usufono, o lo o tulai mai le faauilavea a le Afioga i le Minisita mo Faatoaga ma Faigafaiva.

Susuga Hon Laauli Leuatea Polataivao Fossie Schmidt (Minisita mo Faatoaga ma Faigafaiva): O le mea e fia faamalamalama lau Afioga. O le agaga o lenei Matagaluega ina ia apoapo fautuaga ma faitioga a sui usufono mamalu. O lea e iinei le Afioga i le Ofisa Sili o Pule, e taua tele le faamanatu, faatoa ou faalogo lava lea i ni niu e fetalanoaai lau Afioga. O le ala lea o le talosaga atu i le Afioga i le sui usufono, pe mafai ona faailoa mai lenei metotia taua ona o lea e feagai tatou ma le faafitauli tele lenei, o le manu ainiu. Ae manaia le aumai uma o fautuaga a le sui usufono mamalu, se i ave se i tau togafiti pe na o Faasaleleaga lava e maua ai niu nei e talanoa lau Afioga. Ma lou faaaloalo.

FOFOGA FETALAI: Malo. Ia masalo ia ai o poleni foi nei e feusuai lava i le ea. Se i saunoa mai le sui usufono mamalu po o le a le sao?

Afioga PAU SEFO TAUMATA PAU: O vaega uma lava ia e avatu, ua mou atu le isi tamaoaga tele lea a le atunuu o le niu, e le toe foi mai le niu lea, e pau lava le alu i luga o le niu, ia o le faalalo, ae a talanoa, vaai oe o lena o le a tupu i luga, ia toe soso atu, faapaleni lelei, ae ala ona ou fai atu, e tele le taimi e tae ai le popo, pe 20 i niu taitasi, ae le tumu, ae a tolu ni pupuniu tutu tolu faapea, e alu atu lava i le pikiapu toe foi mai faapea. Ae tau ina tuu atu i le Afioga i le Minisita ma le Matagaluega e tatou te suesue agai i ai aua le tamaoaga i le tanoa lava lea e tau fia faatumu. O lea ou te fai atu ai, aua o le manao lea e i ai, o lena ua fai atu.

O le isi vaega lau Afioga i le Minisita lava lea, o le Minisita lea e matua lau lava i ai e mafai ona fai e augofie, a fai atu lava e oso i o i Papua i le mea lea, e oso lava taeao toe sau ma le tali. O le manupapalagi lea, ua tatou fiu lava e fai se vaega foi lea i manupapalagi ina ia faatuputeleina pea. Ae fautuaina le Afioga i le Minisita ma le Matagaluega, se i aumai ni polokalame faapea i i, ua soona faaaoga sese o le manupapalagi lea, ioe, ua soona faaaoga sese i nisi mea e le talafeagai ai, e tapei lava o le tamaitiiti faatoa fanau mai, ae alu atu le faifeau fai mai e faalalo le manu e tasi. O mea ia e tataua ona tatou puipui i ai, o la e i ai nai tamai pe o se pisupo 3lb e fai ai se taitai a le faifeau, a o lea ua aumai lenei manu tele, ona o le manatu faatagata, ae le se i fuafua aua e tatou te fiu lava, e tatou te fiu lava e alu le vaegatupe e aumai ai se lafumanu, ae tataua ona fai se latou polokalame i se vaega ina ia tau faaitiitia le soona faaaogaina. O le faataitaiga la a faapea e 10 ia manu e faaaoga i se faalavelave i maliu, afai e 10 maliu i le vaiaso ae 10, ia e selau, selau, selau. O le mea la lea ia se i leaga o le manu e tai tasi lava i le tausaga, e lelei ona faasolosolo foi lele ma tilotilo i ai vaai se isi atunuu e sau ai e tasi le manu ae sau ai le fa manu. May your experienced e tataua ona tilotilo i ai le Matagaluega, ae fai i lona taimi mo le siisii i luga mo le atinaeina o le mea lea.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

FOFOGA FETALAI: Malo faafetai. Masalo ua e silasila atu le sui usufono mamalu e le o toe malolo le tusitusiga o faamaumauga o lau saunoaga e le Afioga i le Minisita mo Faatoaga ma Faigafaiva. Ma e i ai le manatu o le Nofoa, ia faaiu maia le saunoaga o lena ua....

Afioga PAU SEFO TAUMATA PAU: Ia se ou te manatua ai lava le toeaina foi lele o Noa, ma o mea uma nei na ao uma e Noa, e leai se manu na faapea e ave toatasi, leai na o uma lava manu i totonu ina ia fuafua mo le fetuutuunai mamao o le tagata lenei o Noa. Aua o lea ou te vaai atu nei, aua o sui usufono uma lava tatou, afai foi ua....o lea ou te fai atu o au e sau foi i le aiga lena o sa Noa, a o le mea lea e fai atu, tapenapena. Fai mai le mau lea, mo a taeao, mo a taeao le mau a le Afioga, o tatou lava na tatou usitai i ai, a? Ae faaitiitia le soona faaalu, a. A tele mea e tatou te mananao ai, tuu atu, o le faigofie ia, po o le a lava le mea e faaputu faaputu na ona sau lava o le maliu, alu, alu, a? O le mea lea ia faaitiitia.

Lau Afioga i le Minisita mo Galuega, Felauaiga ma Atinae Eseeese, o le na, o lena ua uma ona avatu lau tusi, e musu e toe lau atu ua 20 tausaga lea, na ona ou sau lava ou toe alu, toe sau ou te alu, toe sau ou toe alu, ou fai atu i lo matou itumalo, fua lena o le ave au i le Faamasinoga, ave au i le Faamasinoga, ae aumai i le taimi lea, na ou alu matuai toe laga, e leai ni mea fou, e leai ma se fou o avatu, ua avatu i lau Afioga o lena ua ia te oe, ia fai se ta asiasiga pe a uma le Tala o le Tupe e faamautinoa e le o le matou itumalo, o lea ua e....

Lau Afioga i le Minisita mo Punaoa Faalenatura ma le Siosiomaga po o lau Afioga foi i le Sui Palemia, ia e sili ai lou alu atu e ta te talatalanoa lelei ia ma tau mai se taimi e fai ai se ta asiasiga, ia ona faapena lea ona fetuunai, ou te iloa e te alofa tele ia Pau o lea e mai, ia ae o lo o taumafai mai e fai ni manatu o lo matou itumalo.

Lau Afioga i le Taitai o le Malo, ia faamalo. O le fatu lena e i lau Afioga e maimau e pe ana e taua le pa lea semamanu e faafatu uma ai le Manu Samoa, e malosi. Ae momoli atu lau faafetai i lau Afioga i le lagolago i le tama fusu lea o Lupesoliai Sefo Parker, faafetai tele lava o le manaia ia. O le fusuaga lua, e pau le mea ua ou faanoanoa ai, o le aualii lea na o i le taamilosaga muamua tutu mai totonu o le maea, ua ou fiu e vaai, ua ou fiu e vaai, o lona uiga pei e mafaufau mama faapea te i ua faaletonu le tatou tama. Na ou fiu e vaai po o ai le tagata, a o le fusuaga lona lua e na o Samoa lava lea, ae ua fiu le tamaloa foi gale po o fea le Samoa po o fea le Samoa. Ae ui o lea, ia faafetai lava i lo oulua auai mai, e pau lava le mea o le fusuaga muamua lau Afioga i le Minisita, sa tau sue mai le mouth guard a le Minisita, ae te i ifo o la e foi e mouth guard atu lana tama lea na ave le Afioga i le Minisita mo Fesootaiga. O le mea la lea, se i silasila lau Afioga i le Minisita mo Fesootaiga....

FOFOGA FETALAI: Malie le sui usufono o lo o saunoa, se i tulai mai le faauilavea i le Afioga i le Minisita mo Aoga, Taaloga ma Aganuu.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Afioga Hon Loau Sola Keneti Sio (Minisita mo Aoga, Taaloga ma Aganuu): Lau Afioga i le Fofoga Fetalai o le mea e fia faasao. Leai ona talu ai o lea e saunoa le sui a usufono ia ma taua ai maua nei lea sa, ia sa ma i ai i le fusuaga lona lua, ia ae ma te le i o la i totonu o le maea ia ona o tulaga e faaeteete, o lea ua uma le fusuaga muamua sa ma i ai i totonu o le maea. O le fusuaga lona tolu la lea e fai i Peretania, o lea foi o le a ma toe i ai i totonu o le maea.

Ma le agaga faaaloalo.

Afioga PAU SEFO TAUMATA PAU: Faafetai. O le mea sili o lea ua faufautua i ai e le faapea, e ala ona ou fai atu ona o le fusuaga muamua o Niu Sila lava e faatoa toe lavea ae Samoa, a o le fusuaga lona lua o la e tau lava o le Samoa, Sefo Parker Samoa ae le o Joseph Parker, aua o Joseph o Niu Sila, ae sau a Sefo Lupesoliai Sefo Parker. Faafetai tele mo le....

Lau Afioga vaai ae o le ta pou lea e i uta i Tapueleele e le o maua se TV i ina faamolemole, e numera tasi lava oe aua le popole fua e aoga telefoni feaveai ina ia lava le fesootaiga ae o le faatamala lava o matua, o matua lea e tupu ai le faaoga tele o telefoni ona o le ave o seleni ina ia faafaigofie le fesootaiga, ae ua le maua le mea foi lele, Buy ma ai ma ai ma ai lea e i tua, aua e valaau atu loa i le telefoni, o fea lea e te i ai? ae vaai atu, o la e tu le pasi ae oso i lalo. O le faalavelave la lena ua faamoemoe i le telefoni e fesootai ai, ae ua le faia le mea e faafaigofie ma taumafai e uunai ai tamaiti ina ia maua le usitai, aua a maua le usitai, tasi lava lua, a o le mea lea e i ai, o fea? Ia lale e oso i lalo o le pasi i le isi aiga lale taamilo ae i tua aumai lau ipuvai. O le mea la lea, leaga ua uma lou taimi, e talitonu lava o lo o fia faafogafoga le Maota aemaise foi lou itumalo ma Samoa atoa.

Ona muliai lea ona faafetai atu i lau Afioga i le Minisita o Tupe, malo, malo le fai o le faiva. E le gata foi i lea, ae faapea foi le Faauluuluga o le Matagaluega ma le ofisa a le Matagaluega, malo le faigaluega maea, aua o le mea lava nei e tatou te faitioina o le Tala o le Tupe, ae leai, e laitiiti le tusi lea, ae matua hard to hard lea e i ai le mea lea, manaia, matautia. Ia saga faamanuia le Atua i lou tulai mai, ae tautuana ia le matou itumalo ia fai uma lava mea na. O lena ua e iloa ua na o le matou itumalo lava i Salafai o lo o faatau le talo.

O le mea la lea, o le a foi se faamatalaga ua siisii ona o le naunautai lava ina ia faafogofoga mai si ou itumalo e momoli ma faamanatu ni mea o manaomia. O le mea la lea, e pau lea o se vaega ua mafai ona ou avatua, ae ia manuia lau Afioga, manuia le Afioga i le Palemia, le Sui Palemia ae faapea foi la outou Kapeneta, aemaise foi o le saofaiga i tua i Minisita Lagolago e faapea foi tamaitai nei ma sui usufono uma o lau vaega, ae ia manuia le Nofoa, soifua.

FOFOGA FETALAI: Malo, malo faafetai saunoa i le sui usufono mamalu, e logo i tino matagi lelei e ala i fautuaga ma sao foi e pei ona tuuina mai, ia lau Afioga foi i le saienitisi o lo o faafogofoga mai le itumalo.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ou te manatu masalo o le avanoa lenei i le Taitaifono o le Komiti o Tupe, e maitau atu ua maea lea itu o le Malo lea itu o le Palemene. Masalo toe o le saunoaga a le Afioga i le Taitaifono o le Komiti o Tupe Maua ma Tupe Totogi.

Ou te tapa ma le faaaloalo lau Afioga i le sui usufono mo Alataua Sisifo. Malie le Taitaifono o lea e i ai sui usufono ia e fia tulai mai e saunoa ona tamuli ai lea o lau Afioga i le Taitaifono o le Komiti. Se i tulai mai le sui usufono mo Falelatai ma Samatau.

Afioga TAEFU LEMI (Falelatai ma Samatau): Malo faafetai i lau Afioga i le Fofoga Fetalai, malo foi le usufono i le paia o le Maota.

E faatalofa i lenei taeao i le Afioga i le Taitai o le Malo, le Kapeneta ma Minisita Lagolago, aemaise foi o sui usufono mamalu o lena itu o le malu. Ia e leai e i ai le manatu e fai foi ni nai motugaafa aua le tapuaiga o le itumalo.

E tulai atu e fai au ma sui usufono o le matou vaega nei e taumafai atu se faamatalaga. E lelei lena itu o le Maota sa saunoa i le aso ananafi ma lenei taeao. Aua o le tu ma le aganuu a Samoa e fealoai e avafatafata le saofaiga i le Maota Fono. Faafetai sa outou saunoa o alo lelei atu le Kapeneta i a outou saunoaga. Ae peitai o lenei taeao ma le matou tulai atu, ia ua tuafale mai le Kapeneta i lo matou faamoemoe. Ia ona manatu lea, ia e leai ia tau ia ina matou aiaiuli i le latou saasaaga, a o leo laitiiti foi le ioe, ia atonu e faigata ona lagona mai i ina, ia a o faigofie ona matou lagonaina. E momoli atu ai le agaga faafetai i lau Afioga i le Fofoga Fetalai, e tusa ai o le tauavagameaina o le Fono Aoao Faitulafono a le Palemene o Samoa.

E faatalofa foi i le tapuaiga a Samoa i ona tulaga faalupe i Lana Afioga Mamalu, O Le Ao o le Malo, o Sui Usufono o le Fono a Sui Tofia, ia Samoa aoao i la outou faafofoga, o Aiga ma Tama, o Tama foi ma Aiga, le Usoga a Tumua ma Pule, Ituau ma Alataua, ia ae a Aiga i le Tai ma le Vaa o Fonoti.

E faatalofa isi ou itumalo i la outou faafofoga, o outou sa ma faiga e nuunuu atu. E i ai le agaga o lenei taeao, ia e momoli le faafetai. E faafetai faapitoa i lo tatou nuu i le paia o le Falefitu o le aiga Tauaana, nuu e tausi Faavae, tautua nuu, tautua Malo e tautua le Ekalesia a le Atua. Ua outou tautiga ma faaaeleelea i le tautuaina o le tatou Malo o ala fua o taiala ma faavae na faataoto e o tatou tuua mai anamua, e tau lava ina tatou soifua ma solisoli muliaao i ai. O le mea lea faamalo atu le faatoatoa, faamalo le faapalepale i le tatou nuu i le paia o lo outou aiga Tauaana ma latou Tama, Tuimalealiiifano o le Tama Aiga, le tama sa faia le tautua tuavae i le Malo o Samoa mai le vavau e oo mai i lenei taimi, Tuimalealiiifano Suatipatipa I, Sualauvi I, Siuaana ma Suatipatipa II, Sualauvi II, fai pea le tatou tautua, tautua leleoa, tautua tuavae, tautua toto i le Malo o Samoa. O lea lava e olo le fua ma fai le tautua a lo ta Malo. O le mea lea, o la outou tapuaiga o le aiga Tauaana ma la tou Tama, ia alo maia e faaauau le tatou tautua.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Faafetai ua maua le filemu o le Alii, faafetai i lau Susuga i le Toeaina Faatonu ma lau Susuga Tautiagi Senara, ia aemaise foi o le paia i le Auaigaluega Totofi a le Atua o lo o tauasuina le Ipuvai o le Ola i totonu o le tatou itumalo. Faafetai Samatau ia la outou fatuaiga tausii e te tausii vaatele aua Aiga, e momoli atu ai le faafetai tele i lenei aso.

Lau Afioga i le Fofoga Fetalai, ia e leai o le a agai i le faamoemoe o lenei aso. Ou te manatua lava le saunoaga a le Afioga i le Palemia i sina taimi puupuu na ia tauaveina ai le tofi o le Minisita o Tupe i lena Paeaiga ua mavae atu, fai mai lana saunoaga, leai e faigofie lava le valaauina, ua na o ni nai faaopoopo lava ma nai toese e faatino i le faamoemoe o le Minisita o Tupe.

Ona i ai lea o le lagona lau Afioga i le Fofoga Fetalai, o le a ou le agai i le faaopoopo ma le toese, ia a o le agaga o lo o tapena ai le faamoemoe o le Tala Faatatau o le Tupe.

Lau Afioga i le Fofoga Fetalai, o le faamoemoe a Paulo i lana Tusi i le Ekalesia i Korinito, e tolu lava mea, *faatuatua, faamoemoe ma le alofa, o na mea e tolu, a o le sili o na mea, o le alofa lea*. Ma o lena le agaga le Fofoga Fetalai, e tau tuliloa ai le faamoemoe o le tatou Palemene e tauaasoaso a le tatou fasi seleni o maua, ia tau ai ma afifi i le alofa. Ona faapea lea lau Afioga i le Fofoga Fetalai, afai ou te faafetai i galuega lelei ma galuega e tele ua faia e lo tatou Malo, ia ona ou manatu lea ou te le fia faia le tatalo a le toeaina foi lenei, e uma lenei aso ia ma ao foi le po a nanei, ia e le lanu lou alofa ise matou faamatalaga. O le a matou tuualalo faaoololomaau ma faufautua i lo tatou Malo, aua le faaso lea ua taatia i lumamea.

Lau Afioga i le Minisita ma le Kapeneta i lona aotelega, ia e momoli lava le faafetai e tusa ai o le faaso. E i ai fuafuaga faataoto a lo tatou Malo, ia pau lava le mea o le tatalo ia faataunuu ma le manuia le auala e agai atu i le malae vaalele e agai atu i le uafu i Mulifanua ma agai atu i Falelatai, ia faafetai o lea i ai nai fuafuaga. Faafetai i le four lane lale ua maea ua taunuu atu i Saina, ia ma le faamoemoe e toe faaauau lea galuega lelei, e ui ina faaauau i ni lane se lua, ia ae faafetai o lena e i ai lena fuafuaga. Ae pau lava le tuualalo, ua tele le tatou malae vaalele ua faatino lea galuega. Ia o le uafu i Mulifanua i le agai atu i le motu i Salafai. Afai e taunuu le vaa e tasi i le malae vaalele, e 2 i le 3 itula e tataua ona e i ai ai i le malaevaalele e siaki ai au pepa e te malaga ai, mulimuli ane tau affio atu le paia o le atunuu e faatali vaa, e ese le pisi o le ala lea lau Afioga i le tatou Minisita o nafa ma lea vaega. O le tatalo la, ia sei tautuana le faatinoga o le 2 lane lea o lo o faataoto nei, tapena lelei, nai bus stops ma mea faapena, i ai ni nai vaega e over take lanes ia e faatopetope ai le taavale ia ua talafeagai ona alu, ia ae tuu foi si toeaina ia o alu alu lemu ia e fai pea ia lona finagalo. Ae o le agaga lea i le tatou Malo ma le paia i le Kapeneta, ina ia lelei ona faatino le galuega lea, e umi tele le auala lea, ia afai e poloka ona o le pisi tele o le malaevaalele aemaise le uafu i Mulifanua, ia ae pei o le ala lea e tau tuualalo ai ma tau faaoololo maau i le tatou Malo ina ia lava tapena nai ia vaega.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le Road Maintenance po o le teuteuga o le auala, ona o lenei vaitau o le timu, e pau loa se timu ona vave lea ona faaetonu, aemaise foi o le pisi o le faaaogaina ma le mamafa o lo o faaaoga ai le auala. Ia e tatalo pea ona ua mautu ia tatou konekarate foi ia e faatinoia ia lea vaega, o le tatalo ona o le tele lava o mea, ua taatia i le paaga ia le faatinoga. A o le monitoring ma le supervision, ia e pei o mea na e lelei pea ona agai i ai ia tatou Matagaluega, ia le road maintenance ia e faatasi ona oo atu i le masina, ia a ua i ai lava aiaiga faataotooto lau Afioga i le Minisita, e lelei pea ona fai ma fai ia tatou asiasiga ma tulaga faapena ina ia iloa le tino mai o le tatou vaega.

E i ai le vaega latou te moaina tafatafa ala, ia tasi lea vala lau Afioga, aua afai e mamao i tua, ia o mea e tatau ona moa faalua, ae pe tasi lava le oo atu, faapena ona avatu ai le talosaga, o nisi o taimi e fesiligia foi le road shoulders foi lea po o le a lona lautele, toe toe lava a laititi se vaega o le auala e faatino ai lea galuega. Ia e pei o nai vala ia e faatatau i le malaga mai tua i Apia nei, e silasila pea i ai lau Afioga i le Minisita e ala i le monitoring foi nei ma le supervision o tatou konekarate ia e faatinoia ia auala.

Ia le itu i le lapisi, ia e faafetai ua saunoa le Maota, ma ua faamau i a tatou faamaumauga le faatauina o le mama o Samoa. O le matou foi lea tuualalo, o le laiseneina o mea nei o pasi, ua tatau ona i ai ma ni aiaiga faaopoopo ina ia mataitu ma asiasia tulaga e lafoai ai lapisi a falepasi taitasi. Aua o le tulaga lea e i ai, o le malaga mulimuli a le pasi, ia ona faatafa loa lea i sina vaivao i totonu o le itumalo, ae salu ai le lapisi vaeane le paia o le Maota. O le tatalo la, sei silasila i nai vala ia, e tatau foi i falepasi ona taunuu atu le pasi i le malaga mulimuli, lau mai i lalo le lapisi, salu le pasi, tuu i le taga lapisi ma faaee i luga o le fata lapisi, ona mautinoia o se matafaiaioi e tatau ona fitoitonu i ai latou e ana pasi. Ia o lenei faafitauli le paia e o le tatou Palemene, e le na o se afioaga, e aofia ai uma Samoa i le faatamala o nisi o tatou falepasi ia ma isi o taavale lau pasese ia e faatinoia ia vaega. E lagona ai lava le faanoanoa, ia ona e mataga ai o tatou tafatafa ala, ia e i ai foi nai vaega o nofoaga faasao o le Malo, ia e ui lava o lo o i ai Matagaluega e fitoitonu i ai, ia ae e le o taimi uma e mataitu ai e Matagaluega, ia e tele lava ina lafoai ai ia lapisi i nisi o taimi, ia ae ua maitauina e ala i le fonu a le Komiti o le faufautua o matou mafuta ma talatalanoa, ia e i ai lava taimi e alu atu lava le taavale a papalagi, eva ai i ina ma toe tae lelei lava le lapisi na lafoai ai e isi tagata ia sa o latou faaaogaina lea vaega. O le mea lea e tatalo atu ai, aua o le mama ma le matagofie o tatou aai, ia o le galuega e fai faatasi uma lava e tatou uma, o le tatalo lea e uiga i lea vaega o le tumama ma tulaga faapena.

O le lapisi lea a tatou lea e ave i le loli lapisi, ia ou te talitonu lava se i vagana lava pepa iila ma mea o plastics ma tulaga faapena e tuu i taga lapisi, o isi uma lapisi e pei o le vao ua uma ona moa, o le lauulu ma le laufai vaeane le faafofoga mai o Samoa ma le Palemene, ia o mea lava na e tuu i lalo o le pupu fai, e ola lauusi ai le fai, o fetalaisa faaSamoa lena ua leva ona outou soifua ma o tatou ola mai ai.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le tatalo, ia alofa mai le Atua i le faatinoga o le tatou galuega e taumafai nei, ina ia mama Samoa.

Lau Afioga i le Minisita mo Faatoaga ma Faigafaiva, ia malo le galue, faafetai foi le faatoatoa i le taumafaiga o lea vaega, faigata ma anagata o le atinae o Samoa. Tasi lava le isi vala e mafai ai ona tali atu, lelei pea le oo i ai, aua ua le masino le faamai e aafia ai o tatou faatoaga. O mea nei o vailaau fana vao, ia tatou te le i masani ai, ia o le faifaatoaga lava ia a tatou e tatau ona toe tuu e faavaoa, ia nai masina mulimuli ane, toe lalafu ma toto. Ia, peitai ua malosi tele le faaaogaina e nisi o le vailaau fana vao, ia vaeane le maota, o le tatalo lava i lea vaega, tele foi nisi leiloa po o le a le mea e saga aumai umi ai nei vailaau ma le faaaogaina pea, ia ma ono lamatia ai a tatou faatoaga ma le palapala e toto ai ia tatou faatoaga. O le ala lea o le tatalo atu pea i lau Afioga, a le mafai ona taofi, tuu i ai i luga se tiute, e faigata ai ona faaoga.

Ia lau Afioga i le Fofoga Fetalai e i ai lava le manatu e tele nai vaega ia ae faafetai lena e le faaitiitia lau Afioga i le Minisita ona o galuega, sei tautuana ane le auala e tuaoi ai Falelatai ma Faleaseela, ia ua uma ona talosaga atu i lau Afioga sei silasila ane, ia e sopolia ai Samoa i lea auala ia pe afai e toe faatino lelei ina ia faafaigofie le faafioai o le mamalu o le atunuu, si o matou pitonuu i Samatau ia i ai se vaega ia o le auala, matou te le taua o se auala galue leaga o le aai fou i Tulivae, o eleele ua faamatuina atu i lo matou afioaga, ia lale ua nofoia, ia peitai e lei faatinoina le auala e taamilo i le aai fou. O le tatalo lea lau Afioga, e lagolago lava i nisi o finagalo sa faaalua pe afai o utiuti le tatou faasoa, alofa i le toatele o le itumalo, ia ma le tele o ala galue e fia faatino pe fai se isi faiga e teu ai ia ala galue, ia ona faasolo lemu atu lea o le valitaina ma tulaga faapena, a ia vave ona tofusua ai Samoa i lau fesoasoani.

Ia o le faatomatau lea lau Afioga i le Fofoga Fetalai, ia manuia le tatou fonofono usu a Samoa. Ia manuia foi le tapuaiga a si ou itumalo. Soifua.

FOFOGA FETALAI: Malo, faafetai. Ia tapa le sui usufono mo Anoamaa Sasae, tulai mai.

Afioga ALAIASA MUAGUTUTI'A MOEFAAUO MALAGAITUTOGIAI SEPULONA MOANANU (Anoamaa Sasae): Ua maitauina i lenei vaega o le aso, e faapena ona saausi saunoaga a sui usufono. E taua foi nei Fonotaga e lipoi ai le tamaoaiga o Samoa. Ia e le fia nofonofu loa foi, e fia fai sina sao ia Manuvao e faaleo ai foi se manatu o lenei itumalo, manatu foi e le umi.

Ae talitonu o lea ua atoa tino o le tama na moe i le ala, i le paia sautuafafafa o Samoa aua le afio o lau Afioga i le Nofoa, tainane foi le afio o le Palemia ma le Kapeneta, aemaise sui usufono mamalu o le Palemene.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ia e momoli le faafetai i le tatou Tala o le Tupe, pau lea o se agaga, e tagisia e Lauulu sia vaa ia goto, e le uma manaoga. O le mea foi lea na tatou omai i lea mea o le faipule, e sulu mai i ai le atunuu. Ia o ai la o le a sulu i ai ma ave i ai manaoga? Ia e aumai ia tatou, o le mea foi lea onosai, faapalepale, fai mea la e tagi mai ai le atunuu.

Ia se tapuaiga a si ou itumalo, ia o lo o lelei lava ona polo faasoa le tamaoaga, leai se mea e atugalu ai, aua e tele lava foliga e faamatala ai le tamaoaga, pei o siitia o pasene ma mea faapena, ae a tatou vaavaai i le 1980, sa toatuga ai le atunuu, se i oo mai i le taimi lenei e faatusatusa i le taimi lenei, ia e fua i le vaai i le lelei lea ua i ai lea ua alu i luma. E le toe fia taua ma le toe fia oo i ai i ia pagatia, i mea sa i ai le atunuu, o lo o taavili lava.

O lea foi ua aumai le tala o le Faletupe Tutotonu, e lava ma totoe le faasoa. Ia o le mea lea e momoli atu ai le faafetai, ia tautuana nai manaoga o si itumalo, alofagia, ia a maua nai auala galue, ia viia le Alii, faafetai.

Ia lau Afioga i le Minisita, ia e faapena so matou lagona e pei ona fai atu e le umi. Lau Afioga foi i le Minisita o Tupe, ia o le tala a le Tusi, *‘e le o aumaia e le Atua le agaga e fefe ai, na o le agaga o lo o i ai le malosia ma le alofa ia atoa ma le soifua laulelei.’*

E te vaai mamao atu lava a e nofo nei i fonotaga a nuu, e te vaai mamao atu lava i le afifi po o le a le mea la e faavae ai se mea e aumai. E te iloa atu lava o se mea e faavae i le alofa, ma se mea e faavae i se mea e le lelei. E saili ai se manuia o se tagata, aumai i auala faapiopio. E te maitaua lelei lava. O nei aso maitauina i le tatou Tala o le Tupe, faafetai mai le la itu o le Maota, avatu foi so matou lagona, o i ina e iloa ai, o le mea mai le Atua. O lo o afifi ai le alofa i le atunuu, nei ma a taeao.

Ia lalafa atu i la outou faasoa, ma la tou tofa, o manaoga lava lea o lou itumalo e le uma, ia ae pule lava la outou saofaiga, ia ma ia tulaga. Taua e isi sui ia Minisita Lagolago e o e faiaoga, ia e le ni faiaoga ia Minisita Lagolago, o paia o sui mamalu ua tofia mai e le atunuu, e o mai e aumai le tofa e lauliliu ai le faigamalo. E eseese lava le Public Service ese le Executive, e tataua ona silafia lelei ma e le tataua ona toe soona fai ni lafoga faapea i totonu o le tatou Maota. Ia a fia faiaoga la na ia, ia ona alu lea o na ia e faiaoga i lona itumalo.

Ia o le matou soso atu lea, e tasi lava le itu agai malosia o lo o faia le malo i le Tala o le Tupe, ia aua o lea ua leai se Itu agai ae nao le nusipepa. Tatou vaai atu, pue mai le ata o lea, faamatala mai, mea ia e pei ona fai mai le peresetene fou o Amerika, e i ai a isi mea e tau o fake news. Aua o mea ia, e felaveai tala, ia ma faasese ai mafaufau o tagata. O le mea foi lea i le atunuu faafofoga mai, leai se mea e atugalu ai o lo o lelei le tamaoaga o Samoa. O lo o lelei ma alu i luma ma o lo o amata lava ona faufau malie lo tatou sa e pei ona malie e lei fausia Roma i se aso se tasi. Ia ae faasola ia manatu, i nuu le aina, ia o le matou tala lea ma le agaga faaaloalo. Agalelei mai le Atua, ia maua le tofa i le Afioga i le Taitai o le Malo, aemaise o le Kapeneta, ia maua se soifua laulelei i sui mamalu o le Palemene, aemaise lau Afioga i le Nofoa, Afioga i le Taitaifono, ia faapea foi le paia o le tapuaiga o lenei Maota, ia aemaise Samoa o tapuai mai, manuia le Fono.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

FOFOGA FETALAI: Malo faafetai, ia ae o le mea tonu lea o le lauga faatumua. Malo faafetai ou te le selu atu i le saunoaga a le sui usufono mamalu mo Anoomaa Sasae. Ia malo e itiiti a le alamea, paupau ia ae oo i Lepea, pei o lea muagagana, faafetai.

Ia tulai mai le sui usufono mo Faasaleleaga Nu.4, lea sa muamua tulai mai.

Afioga PESETA VAIFOU TEVAGAENA (Faasaleleaga Nu.4): E momoli le faafetai ma le faamalo i lau Afioga i le Fofoga Fetalai. Avea foi lenei avanoa e faafeiloai atu ai i lau Afioga i le Taitai o le tatou Malo, lau Afioga i le Palemia ia faapea foi lau Afioga i le Sui Palemia, le mamalu o le aiga Minisita o le Kapeneta, ia Minisita Lagolago, ia faapea le mamalu o le la itu o le malu. E faafeiloai atu foi i le paia maualuga i Faauluuluga o Matagaluega taitasi ma Tumaoti o le tatou Malo, ia faapea foi le laulau tusitusi a le Palemene, le faafofogaaga a le tatou atunuu, faamalo i la outou tapuaiga.

Lau Afioga i le Fofoga Fetalai, faafetai ua maua foi lenei avanoa e taumafai atu ai ia se sao o si ou itumalo, e molimoli atu ai le agaga fiafia ma le agaga faafetai, ona o lea ua maitau le matagofie ma le siitia o le Tala o le Tupe i lenei tausaga pe a fuafua i le Tausaga Faaletupe i le 2016/2017.

Na ou manatua ai o le upu foi lea o le poto o Solomona, *‘e i ai le taimi tatou te fananau ai, e i ai foi le taimi e oti ai’*. E i ai le taimi tatou te toto ai, e i ai foi le taimi tatou te selesele ai, o le taimi e fiafia ai, ma le taimi e faanoanoa ai.

Lau Afioga i le Fofoga Fetalai, o le aso lenei o le aso e tatou te fiafia ai, ona o lea ua tatou vaavaai atu i le Tala o le Tupe i le la tausaga sa toto, o lea ua tatou selesele le matagofie, faafetai i lau Afioga i le Minisita o Tupe, faafetai foi i le Ofisa Sili o Pulega lau fetalaiga Lavea, aemaise o Matagaluega uma lava o lo o i lalo o le Faalapotopotoga o Tupe i la outou tapenaga o le Tala o le Tupe i lenei tausaga. O lea ua molimau ma molimauina e le Palemene le tele o le siitiaga o le Tala Faaopoopo o le Tupe Maua i lenei tausaga. Ia e le tau selu atu lenei itumalo i lau Afioga i le Minisita o Tupe, o lau matafaioi lea, faafetai i le taleni ua avatu e le Atua i lau Afioga, e le masalosalo foi lenei itumalo, ona ua lava lou tomai faaletupe ua leva foi ona e galue ma e auauna i le Malo.

Lau Afioga i le Minisita mo Aoga, Taaloga ma Aganuu, ia na o sina tuualalo lava, ui lava e le o maua mai, e le mafai ona tuua se manatu e fia faaalua ona momoli ai le agaga faafetai i tulaga foi ia ua i ai a tatou aoga faa-Matata eseese. O lea vaavaai i le alualu i luma o le aoaoina o alo ma fanau o le tatou atunuu. Ae pau lava lea o se vaega e toe fia talosagaina ina ia atoatoa ai le tomai o le tamaitiiti aoga, o tulaga foi ia o le puipuiiga o le saogalemua o ia foi matata o le a latou galulue ai, ina ia mafai ona i ai se tasi e aoaoina i latou e faatinoina o galuega tetele e puipuia lona saogalemua. Aua o le tele o nei galuega, ua lava le atamai ma le poto faaaoaoina, ae peitai, o le faatinoina e le o lava i ai le iloa o nai nei tamaiti. O le mea lea, e tatalo atu lava i le Afioga i le Minisita aemaise foi le Matagaluega, se i silasila ane i lea vaega.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Lau Afioga i le Minisita mo Galuega, Felauaiga ma Atinae Eseese, ia e momoli atu lava le faafetai i lau Afioga ona o nisi foi o talosaga sa tuuina atu, e pei lava foi ona e silafia si ou nuu lea o Lano, ia lua mala faalenatura ua afaina ai lava si ou nuu lea i le auala laupapa. Ona a silasila lau Afioga, o la ua tele ina fau mai le oneone paepae i le itu i uta, e mafua mai i le decile o le auala laupapa o lo o i ai i le taimi nei, ua le mafai ona alu ese le oneone lea ua mau ai lava i uta. O le ala lea a pa mai ia vai tetele nei le Maliolio ona vave ai lea ona oso ai i luga. Ae ou te faafetai i le Atua, e ui lava ina tele ni nai fale ua faaleagaina, ae faafetai i le Atua e le i i ai se isi o si ou nuu lea na afaina. O le mea lea silasila ifo i lea tulaga i se auala e mafai ai ona foia lea faafitauli, aemaise foi o nai auala galue e pei ona tuuina atu i lau Afioga isi ou nuu o Asaga, o Puapua, Lano. E i ai se tulaga foi lea e tau talosaga atu ai i lau Afioga, e a pe a toe silasila i a tatou auala galue, se faiga e sefe ai le tupe a lo tatou Malo, ae ua lava lava tau lava o le teu agai i uta, ioe. Ia e avatu pea lau talosaga i lou itumalo, o le a ou tautala pea i lou itumalo. Aua a fua nei i le tupe faaalua i le auala galue e tasi, o se mea o le \$800,000 ona e taugata tele le ta.

Ae ou te talitonu, a tuu mai le avanoa lea e tau lava ina teu i uta, ia e faasao ai ia taavale. E tolu nuu o lou itumalo, ae a aumai le \$800,000 lea, o la e i ai le mauga a si o matou nuu e faigofie ai lava e maua uma ai lava mea tanu auala ma mea faapena, atonu e faaitiitia ai foi ni tau o konekarate o le a latou faia pe a faapea e fai i le tulaga lea, ae aua le faataina. Aua o le mea moni lava, e le o lavea le polokalame foi lea o auala galue i le maintenance. O shoulders ia e lavea i lalo o le maintenance, o shoulder foi ia o main road ma aualatetele, a o auala galue e le o maintain la e tatou. O lona uiga, e matagofie lava pe a faapea e lava lava le...pe a faapea e tau ane i ai se tofa o lau Afioga i sia tulaga aua se auala o si ou itumalo, ia ua lava lava lea. O la ua matagofie lava, o la foi ua galulue le toatele i le auala foi sa fesoasoani i ai lo tatou Malo i le Paeaiga ua tuanai atu.

Ia lau Afioga i le Minisita mo Faatoaga ma Faigafaiva, e momoli atu le faafetai tele i lau Afioga, ma e talitonu lava, e tele lava foi nai nisi o talosaga na tuuina atu. O le tulaga o lo o i ai le talo isi ou itumalo i lau Afioga, ia se i e afio atu se i e silasila i ai, e tele le talo, e tele foi ia faafitauli o tulai mai, ona o tulaga lava lea o le fia maua o se avanoa e auina atu ai talo i fafo. O le talosaga, ae a pe a faa...ina ia faamalasia le aufaifaatoaga ae uunaia lava le talo lea le numera 1 ma le numera 2, aua o lea ua tele faafitauli ia ua tatou maua mai fafo, o le tele o isi tagata ia ua ave a latou talo, ia ua avatu ai ma talo foi ia eseese, ioe, ae a alu lava na o le tatou talo numera 1 ma le numera 2, ia ou te talitonu o le a leai lava se faaletonu. O le mea lea e tatalo atu ai i lau Afioga, ina ia faamalasia ia lea tulaga.

Lau Afioga i le Minisita mo Punaoa Faalenatura ma le Siosiomaga, ia se i alofa ane lava i le matou taligalu sa ou talosaga mai lava i lea foi Paeaiga, ae a silasila lau Afioga ia o la ua leai lava le falesa o le Ekalesia Mamona mai lea tulaga sa i ai.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Na afaina loa le malumalu lea o si ou nuu i le lolovai foi lea i le Paeaiga na tea nei, ia o la ua mei i uta, o le talosaga o la ua avatu ia ata o lea foi vaega o le laufanua ua aafia, se i silasila ane lau Afioga i lenei Tala o le Tupe pe a talafeagai pe a lava lau faasoa.

Ia lau Afioga i le Fofoga Fetalai, o nai motugaafa na o si ou itumalo e momoli atu ai le agaga faafetai i lau Afioga i le Minisita o Tupe, ia ma si mea lava lea e tasi lau Afioga i le Minisita o Tupe, faafetai o lea ua matagofie foi le vaavaai atu i le tatou taulaga i Salelologa. Aua e talitonu lava tatou nei mai Salafai, o lou naunau lava ina ia faaatoatoa le tatou taulaga, faafetai o la ua i ai fuafuaga mamao a lo tatou Malo, o le a faatuina le Iunivesite e faapea foi ma le aoga lea faa-Matata Eseeese. O lea e tatalo atu ai i lau Afioga i le Minisita, semamanu o lea ua e seei mai le nofoa, o lenei ua ia te oe le fatu o le tupe lava e lufilufi i ai lau faasoa, ioe, aua o le taimi lenei e tele lava le manao o si tatou motu i Salafai, ia ae mamao lava ona o lea lava e tau aau mai lava i inei i Tumua nei i mea e moomia. O le mea lea e tatalo atu ai i lau Afioga, se i silasila ifo lava i lou avanoa, e faatino manaoga o si o tatou motu i Salafai.

Lau Afioga i le Fofoga Fetalai, ia pau lea o nai manatu o lenei itumalo. Ia manuia tele le Fonousu a le atunuu.

FOFOGA FETALAI: Faafetai. Malo saunao i le sui usufono mamalu. Ou te tapa ma le faaaloalo le sui usufono mamalu mo Faleata Sasae.

Afioga SALAUSA JOHN AH CHING (Faleata Sasae): Ou te tulai i le ava ma le faaaloalo, faafetai tele mo le avanoa i lau Afioga i le Fofoga Fetalai. E faatalofa atu foi i le faafofoga a lo tatou atunuu i Lana Afioga Mamalu, O Le Ao o le Malo e faapea foi Sui Usufono o le Fono a Sui Tofia, ae tainane le atunuu o lo o faafofoga mai. E faapea foi si ou itumalo o Faleata Sasae.

Ae ua ou tulai atu i lenei aso o lenei o lo o alaala atu le Taitai o lenei itu le Afioga i le Palemia, le Kapeneta, faapea ia Minisita Lagolago o lenei itu o lo tatou Maota. Sa i ai le manatu e le tulai le sui usufono o Faleata Sasae e fai se tautalaga i lenei aso, ae ua faalogologo atu ma le totoa i le tele o manaoga o lo o mananao i ai ia alii ma tamaitai sui usufono o lenei itu o le Maota. O le Tala o le Tupe lea ua tuuina atu e le Kapeneta ma le Minisita o Tupe, ia atoa ai foi ma le lagolago a Minisita Lagolago, ia o le tulaga lenei o lo o i ai le Tala o le Tupe a lo tatou Malo. Pau le mea e faafiafiaina ai, e tasi lava le mea e tulaia i ai la outou silasila o le tupe faaagaaga, le tupe faaagaaga lea o lo o tulai mai e \$4.2 miliona. Masalo e manaia le fua lea tatou te fua i ai, po o le tulaga o lo o i ai le tupe a lo tatou Malo. Aua a oo ina tutupu mai faalavelave faafuasei, o i e fua i ai lo tatou malosi e soifua ai lo tatou atunuu, pe fia ni masina. E ui lava la ina pau laititi, a o lea e sefe, saogalemu. O i ina e faafetai ai i lo tatou Malo ma lenei itu o le Maota ma le fuafuaina o tupe faaalu, aua le galueiina o le tatou Malo ma atinae.

22 IUNI 2017

Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua

Ua lagona foi le agaga alofa i le tele o faafitauli o lo o saunoa i ai lena itu o le Maota i manaoga. E sau se taimi ona tali atu lea o le Afioga i le Minisita mo le Soifua Maloloina. Ae o lenei vaitau, ese le pisi o le ma Matagaluega ma le Afioga i le Minisita...

Afioga Sulamanaia Fetaiai Tauiiili Tuivasa (Vaimauga Sasae): Lau Afioga i le Fofoga Fetalai, pe maua se avanoa e fai atu ai se tala a lenei itu. Ona o lea e maitau i lenei itula o le aso, e faalogologo lava ma le totoa i saunoaga a lea itu o le Maota.

FOFOGA FETALAI: Tulai mai le sui usufono mo Vaimauga Sasae.

Afioga Sulamanaia Fetaiai Tauiiili Tuivasa: E i ai le talitonuga o lenei itu, faapea ita ai ua tali le Malo i saunoaga a Minisita Lagolago. E pei o lea sa maitau atu i lenei aso sa faapea o le a faga uma lenei itu i le saunoaga a le Komiti po o le Taitaifono o le Komiti o Tupe. A o lea e maitau atu pei o lea ua saunoa mai le sui usufono lea ma agai mai iinei, o lea lava ua toe talanoa latou e faafetai ai i le latou lava Tala o le Tupe. Ona i ai lea o le manatu lau Afioga i le Fofoga Fetalai, pei o popolega na o lenei itu, e le tatau lava, o le latou Tala uma lava o le Tupe, o le Minisita ma lana Minisita Lagolago. O lenei ua maitau i lenei itula o le aso, ia o lea ua saunoa le susuga i le fomai ma tuuina mai le tele o manaoga o lenei itu, e sao lelei, aua o le itu lenei o lea e lagolagosua atu i la outou Tala o le Tupe. Ia ae tau lagona ai le faanoanoa i lenei itula o le aso, ia o lea foi ua toe saunoa lava latou, ae o le latou lava Tala o le Tupe ia le la itu. Ma le agaga faafetai.

FOFOGA FETALAI: Malo, faafetai i le faauilavea a le sui usufono mo Vaimauga Sasae. Ma o itu foi na o lo o i ai le popolega o le Nofoa, Afioga e, i Minisita Lagolago, ia e faapena foi le talitonuga. O le faamalieina lava o le tatou aiatatau i tatou sui usufono faa-Palemene. A o le manatu foi o le Nofoa, ia a tuu atu le avanoa, ia ua lava ia le 5 minute o le sui usufono e saunoa ai e pei o mea masani, ia ae faapena, silasila foi i saunoaga a...

Afioga SALAUSA JOHN AH CHING: Lau Afioga i le Fofoga Fetalai, o le ala tonu lava lea ua ala ai ona ou tulai atu, pei ona tau talai atu, e tele manaoga, a o le ma galuega fai toalua ma le Afioga i le Minisita, ese le tele o galuega ma tiute fai. O le mea la lea, e avatu ai le fesoasoani, o le ala lena o lou tulai atu e avatu le fesoasoani i lena itu. A outou afifio mai i le Afioga i le Minisita ae ua tuai ona tali atu ona o le pisi tele, ona outou agai mai lea ia te au. O le tagata lava la e muamua mai ia te au, o le tagata foi lena e muamua i lau lisi e faasolo agai i le Afioga i le Minisita. O le ala lea o lou tutulai atu e avatu le fesoasoani.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Afioga Sulamanaia Fetaiai Tauilili Tuivasa: Lau Afioga i le Fofoga Fetalai o lea faatoa maua atu le... o lona uiga la e tatau ona aveese le Minisita Lagolago, a o le Failautusi a le Minisita.

FOFOGA FETALAI: Ia atonu e aoga foi le tulai mai o le Minisita Lagolago mo le Soifua Maloloina e faapupula ai nisi o tiute. O le mea tonu lea e igoa o le galulue faatasi ma soosootauau o le Minisita ma le Minisita Lagolago. Ae se i e Minisita Lagolago foi lau Afioga i le sui usufono mo Vaimauga Sasae, ia ona e silafia lea, o le galuega vavalalata o lo o fai nei e le Minisita mo le Soifua Maloloina. Ia ae sao foi le faauilavea, ae saunoa ia faapuupuu mai lau saunoaga.

Afioga SALAUSA JOHN AH CHING: Faafetai, o le matou tiute tonu lea, o le Minisita Lagolago e lagolago i le galuega a lau Minisita, a o lona ua ou fai atu, o le tagata lava e muamua mai ia te au, o le tagata foi lona e muamua lona suafa ma le itumalo i le lisi ou te tuuina atu i le Afioga i le Minisita, ae faafetai tele mo le avanoa lau Afioga i le Fofoga Fetalai.

FOFOGA FETALAI: Se i tulai mai le Palemia e fesoasoani i le mataupu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai o mea faapea e galulue faatasi, aua e fomai foi lana Minisita, a fia tui penisini foi le tagata e le tau alu i Motootua ae agai uma lava i i.

FOFOGA FETALAI: Masalo ua manino lea vaega e le tau o foi e vaai se fomai Motootua o le fomai foi le Minisita Lagolago, ae ia teu la le amio i te i ua tui sese e le Minisita Lagolago pe a... Ia, aua e fai lava i luga o le amio ia lelei. Faaiu mai le saunoaga a lau Afioga i le Minisita Lagolago o le Soifua Maloloina.

Afioga SALAUSA JOHN AH CHING: Faafetai o le mea sili o lona ua avatu se fesoasoani. Ma e moni ai lava le saunoaga, a e gasegase, e te le tau alu i uta, e ui sao mai lava iinei ona avatu lea o se tui e vave ai ona e malolo.

Lau Afioga i le Fofoga Fetalai, faafetai tele mo le avanoa, a o le sao lona o le sui usufono mo Faleata Sasae e fesoasoani ai i le tatou Maota i lenei aso. Ia manuia le Fono.

FOFOGA FETALAI: Malo. E manaia foi le saunoaga e faatoafilemu ai le tatou Maota Fono aua le faafofoga mai a Samoa. Ia, masalo o le toe saunoaga lea a lenei Itu o le Maota le sui usufono mo Palauli Sasae.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Afioga TUIFAASISINA MISA LISATI LELEISIUAO PALEMENE (Palauli Sasae): E faatalofa atu i lau Afioga i le Fofoga Fetalai faapea le Afioga i le Palemia ma le Kapeneta, afifio foi Minisita Lagolago faapea lea Itu o le Malu.

Lau Afioga i le Fofoga Fetalai faapea le paia o sui usufono uma o lenei Maota, tainane Samoa faafogafoga mai, ua tulai atu e fai se sao o lenei itumalo o Palauli Sasae i le Tala Faatatau Autu o Tupe 2017/2018. O le paia lava lea i le Faasisina ma Sa Lilomaiava ma le Levaleva ia Sa Faleletaua ma Palauli na potopoto ma oe o le Pule. Ia lou itumalo pele, tapuai maia se i taumafai se tatou faamatalaga.

Lau Afioga i le Fofoga Fetalai, o sa ma faiga o lenei Maota ma Samoa faafogafoga tapuai mai, e i ai le manatu o lea ua taoto a iasa aua o lea ua maea sama lalagi saunoaga ua maea a sui usufono mamalu uma, a o sa foi ma faiga ua taoto fata, ua leai se malosi po o se fia atamai e mafai ona fou le papa aegata pe toe asa le vaosa. E talitonu le taofi, o le auga o aute o le Tala o le Tupe 2017/2018, agavaa tutusa ma le talafeagai. Ma o lo o sosolo lava lenei sini autu o taiala mo atinae tetele a le Malo. Uunai atinae ma faatupulaia agavaa mo tagata uma. Ma o le agaga autu lea ina ia fai saofaga uma ai tatou le o lo o agavaa i le faatupeina o atinae o le atunuu. O lea e momoli atu ai le faafetai ma le faamalo i lau Afioga i le Minisita o Tupe lau Afioga Sili Epa, le Faauluuluga o le Matagaluega o Tupe ma Matagaluega taitasi a le Malo i le faatupeina ma le tapenaina ma le tuufaatasiga o le Tala o le Tupe. O lea la i lenei aso matagofie, faamalo le tautua, e matua lagolagoina e Palauli Sasae le Tala o le Tupe 2017/2018.

Ia, le mamalu e o le Kapeneta, o lena ua i lumamea manaoga o lenei itumalo. O lea e valuvalusia ai aa o le fau, e toe faamanatu atu ma toe tuitui atu, aua o le tuitui e tatalaina mai.

Matagaluega o le Palemia, e momoli atu le faafetai mo le polokalame o galuega faavaitaimi aua le sailiga o galuega a tama fanau a Samoa. O lena ua i le faauluuluga o le Matagaluega talosaga sa tuuina atu i aso ua mavae, ma e talitonu le faamoemoe o se taimi lata mai e tali mai ai.

Matagaluega o Punaoa Faalenatura ma le Siosiomaga, lau Afioga i le Minisita, faafetai mo galuega faaauau aua le suiga o le tau i afioaga ma alaalfaga. E famanatu atu le talosaga a si ou nuu i Faala, o lea ua toe lava o Faala o lo o totoe o lo matou itumalo ua maea ona fausia taligalu o Vailoa ma Vaitoomuli. O lea foi ua maua e feoloolo nai seleni o lo o i totonu o le Matagaluega i lalo o le polokalame o le tetee atu i le suiga o le tau, ae a pe a fa au, tuu atu loa i ai le pitonuu lea o Faala ona ua fai si oooo tele o le sami i totonu o le matou nuu.

Lau Afioga i le Minisita mo Aoga, Taaloga ma Aganuu, masalo o lena ua uma ona e asia le kolisi faaitumalo a lenei itumalo. E talitonu o lena ua i totonu o lau polokalame mo lenei Paeaiga. Mo le silafia e lau Afioga, o le kolisi faaitumalo a Palauli o lo o i totonu o Vailoa, e fa alaalfaga faapalota o lo o i ai i totonu e toafa foi sui usufono o i ai i totonu, ae 19 nuu o lo o i ai i totonu o lenei kolisi. E tuu atu pea i autafa aua se fuafuaga o lo o i ai.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ia, lau Afioga i le Fofoga Fetalai, o lea ua amatalia le atinae o le eletise i le malosi faafouina i Vailoa Palauli, o lea e momoli ai le faafetai i lou itumalo i le paia o Faasisina ma Alo o Lilomaiava, le Levaleva ia Safaleletaua ma Palauli na potopoto mo le lagolagosua i atinae a le Malo. Ma e talitonu le agaga o le tatou sao foi lea i le tamaoaiga o Samoa. Ae tatalo atu i lau Afioga i le Minisita, tautuana le tatou auala e agai i nei atinae tetele a le Malo. E talitonu lava o auala galue nei ma auala o lenei itumalo ia tuu atu i ou autafa.

Matagaluega o Faatoaga; faafetai i lau Afioga i le Minisita mo le aloaiaina o le sosaiete mo le tatou motu i Salafai. Pau lava lea lau Afioga, silasila ifo i lau faasoa i le faʻa foi lea Isaraelu, e maitauina ua goto uma le faasoa iinei i Upolu ae o lo o matamata fua lava Salafai. Se i tagai ane aua po o le a lava le faaletonu o le faasoa ae amuli, o Salafai lava e tulai mai pe a faapea e leai se fofoga taumafa o le atunuu. E tuu atu i lau Afioga i le Minisita mo Tagata Tafafao Maimoa Mai faafetai i lau Afioga, faapea foi le tamaitai pule ma le aufaigaluega, o lea ua lautogia le afioaga nei i nai fesoasoani mai lalo o le atinae o le climate resilience, e i ai le afu aau ma le beach fales i Aganoa.

Ia lau Afioga i le Fofoga Fetalai, o lena ua maea atu nai mataupu a lenei itumalo, taatia atu i ou autafa faapea lau Afioga i le Palemia ma le Kapeneta aua lau pule faasoasoa i lenei tausaga tau faaiu o le tupe.

I le tapuaiga a si ou itumalo Palauli Sasae, aua Faasisina ma Sa Lilomaiava ma le Levaleva ia Safaleletaua ma Palauli na Potopoto ma oe o le Pule, faafetai tapuai, faafetai tatalo. Ia manuia le tapuaiga a Samoa i mauga tetele seia oo mai i se aupito itiiti, ia manuia le Fonousu a Samoa. Soifua ma ia manuia.

FOFOGA FETALAI: Malo faafetai mo le saunoaga. Ma ou te manatu o lea ua oo mai le faasologa i le Afioga i le Taitaifono o le... Se i tulai mai le sui usufono mo Faleata Sisifo. Malie lau Afioga i le Taitaifono, masalo toe pau lea o le sui usufono e fia saunoa ona tali loa lea o lau Afioga i le Taitaifono.

Tofa LEALAILEPULE RIMONI AIAFI (Faleata Sisifo): Leai, e pei lava foi ona ou fai atu ananafi, e moni lava e malie i a tatou faamatalaga ae leai o sui usufono nei o sui usufono mamalu o itumalo, o sui usufono o le Palemene o Samoa, e le o ni ogalaau na tafefea mai le Vaisigano. Afai fono a Samoa, leai o la e fia faafofoga mai itumalo po o a ni o matou manatu. A o le a le mea na maimau ai le taimi na palota mai ai matou i totonu o le Palemene? Na omai e faaleo finagalo o itumalo ma avatu foi nai motugaafa aua le tatou Faigamalo, aua e moni e Minisita Lagolago ae le nonofo i totonu o fono a le Kapeneta, e le iloa e matou mea ia e tutupu. Na pau lava le mea lea e malamalama ai au ia, na o le maua matafaioi ma le Matagaluega ma lau Minisita. O lea la, lau Afioga i le Fofoga Fetalai, faafetai mo le avanoa. E pei lava ona tatou masani ai, so o se Fono lava o le Tala o le Tupe, e tatau lava ona lauga uma sui usufono, finagalo o itumalo.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Faafetai mo le avanoa i lau Afioga. E faatalofa atu ai i le paia o le Fonousu a Samoa aemaise le faafofogaaga mai a Samoa mai ona mauga tetele seia oo i mauga iti, malo le tapuai mai.

Lau Afioga i le Minisita mo Galuega, pei lava ona ta talanoa i le Fono amata, ua ta masani foi i lenei mea o le Fono, e pei lava ona maua i faamatalaga, ua se tai taliga foi, o mea lava e tasi, o atinae e tasi, o manaoga foi e tasi, lea la sa fai lau tusi i le tausaga na tea nei ina ua amata le Paeaiga ma momoli atu i lau Afioga. Pau lava lena o mea lea ou te manao e fai i le lima tausaga lenei, pe tau ane ai lou finagalo, o lena ua avatu le lisi e le tele se lisi, o lea ua tasi le tausaga, o lea o le a toe fai le kopi o le tusi lava lea e tasi ma momoli atu i lau Afioga pe a uma lau lauga. E le toe tau faamanatua, ae pau lava le mea i lau Afioga, tasi le auala i Toamua na ou sau ou lauga ai, e le tau toe avatua, o lena ua avatu le tusi ia te oe. O Vaitele, leaga o mea o general maintenance, o auala, lea ua maua sa lauga se tasi i auala o Falelauniu, faafetai i le Malo ina ia faatino ia e tatou le vaega lea. Na pau lau fautuaga mo le agai i luma, i le tele o sub divisions lea e omai nei, e oo lava i sub divisions a tagata e ona latou fanua, e pei lava e tataua ona faamamafa e lau Afioga ina ia fai e latou auala, aua o lea e totogi e tagata taitoatasi fanua, including ma tau o le faiga o utilities nei o auala ma moli, ae a le uma toe tagi mai i le Malo e o atu e fai. Ae faafetai i le finagalo malamalama o le Malo, o le a faatino ia auala pei ona talanoa atu. Na pau o le mea, e toe faamanatu i lau afioga auala ia i... Faafetai.

Lau Afioga i le Minisita o le SLC, e tele pulou o le tamaloa lea vaeane lau Afioga i le Minisita, ae ona o lou itumalo i le auala lea i uta i Fiaga, lea e tele ai faatoaga ma tulaga faapena, ona o lea ua maitauina ua siisii i luga le tau o lisi o fanua nei, a o auala nei, e tele le faaletonu lea e i ai, ma auala uma lava e o i faatoaga. Faamolemole, afai ua siitia le sau o le lisi, ua tataua ona tagai ifo lau Afioga aua le faatino ae tau ina sua e fesoasoani i le auala ma le feoi ai o nai tagata faifaatoaga.

Lau Afioga i le Minisita mo Aoga, Taaloga ma Aganuu, ia ua alu lenei aso o vivii oe e tagata, ua tataua ona e alu e fai le a ma le a, ia manatua foi, o le taimi o lakapi oe, o taaalo i le jersey lima uumi ma totini e sau tau i tuli, na o le taifa ai o sikoa. O le taimi lenei, ua sui, ua technology mea uma. Ia ae faafetai i lou tulai mai. O lau fautuaga i lau Afioga, manatua o lea na avatu foi lau tusi i lau Afioga ina ua amata le aoga, e tasi lava le faleaoga lea e talosagaina i Vaitele, o lena ua e silafia e le o po se lilo i lau Afioga, o le faatupulaia o le faitauaofai o le itumalo atoa lenei. O lea foi la o le a toe momoli atu lau tusi i lau Afioga, o le faamanatu mo le agai i luma.

Na pau le mea lea ou te fautuaina i lau Afioga, o mea o faiaoga foi nei, manaia le polokalame lea na fai nei i mea o saienitisi foi nei science, a o le mea la lea ua tulai mai, pei a uma ua maua faailoga ona o ese lea ma aoga lea sa faiaoga ai a ua o e saili nisi avanoa e sili atu, a le o i le NUS po ua o i aoga foi nei private. A ia manatua, o nai aoga nei na ala foi ona aumai tua i itumalo ma isi vaega o le atunuu, ina ia toe foi atu e faiaoga i totonu o aoga nei.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Pe le tagai ane lau Afioga i se aiaiga foi lea po o se bond se i taumafai ona toe foi i tua i aoga ia na aumai ai, ae le o le maua loa o le faailoga, ua saili se mea e agai i ai, a lea e moomia le toe foi i tua e tusa ai ma le mean a tuuina mai e le Matagaluega.

O le vaega lea o le SQA lau Afioga, lea ua ou vaai atu i le Tala o le Tupe ua tele tupe e alu ai, i tausaga taitasi. Se i toe tagai ifo lau Afioga i galuega faatino a le Matagaluega lea po o talafeagai lava. O mea nei o Regulatory Bodies, e vaai Tulafono, e le tatau ona oo i ituaiga size ituaiga tetele faapenei. A tagai i isi vaega ia e faia isi regulations isi mea faapena i isi Matagaluega, a toatele lava e tai 10, 12 ae pei ua tele tele i lau lava talanoa, e pei ua out of control. Ae manatua, e na o aoga foi ia e post school foi lele o vaega matutua. Sa faapea foi e tatau ona amata mai i lalo i Pre School, Primary School aua o mea na lea e faapea e fai e Matagaluega o Aoga. Pei e manaia le toe tagai lau Afioga, a ou vaai atu i le paketi, toetiiti a tutusa le tupe lea e ave i le SQA ma le tupe la e ave i le NUS. Ae pei e manaia le toe tagai i le vaega lea, po o le a tonu le, po o le toe fetuunai po o le a tonu lava le aoga tonu na faatino ai lea vaega. Po o tino mai ni a latou galuega sa faatuina.

Lau Afioga i le Minisita o Tupe, ia e leai, faafetai lava o lea e tatou te omai e faasoasoa ia tatou tupe, lava tupe faafetai i le tulaga o i ai le tatou Tala o le Tupe. Pau lava le mea lea ou te fesili ai i lau Afioga, o le mea lea o le levy lea e faaopopo i luga o le paoa, EPC ma luga o le Telecommunications. O le popolega o lou sui, ina ne i te i ua aafia ai le tau o le eletise. Afai e faaopopo le levy lea i luga, ae tele se aafia e toe alu ai luga le tau o le iunite, o le popolega lena o lou sui usufono. Aua e le iloa po o ai la e pasi ai e le EPC ma fai telefoni ia le tau lea. Pe o le a toe pasi mai foi ia tatou o le autogi pili, ia e tatau ona tagai lelei i ai i le vaega lea, ina ia aua ne i, ona o le mea lea sa aumai ona na e lauga lau Afioga i le tatou uluai fono talu ai, matou patipatia lau lauga na fai ma e folafola mai o le a alu i lalo le tau o le eletise. O le a alu i lalo le tau o le eletise, ia o lea la e teu loto pea i o matou mafaufau ma loto, nei tei ua ese le mea na e saunoa i ai le finagalo o lau Afioga, ese le mea e ono tulai mai, ona o lea ua ou vaai atu, pei e i ai tau faaopopo ia e faaopopo i luga o mea nei. Ae o le tau lea e faaopopo i le Telecommunication, malo faafetai. O le a tagai foi i ai le Matagaluega i se tulaga o ia vaega.

O le isi vaega ia e ono saunoa nisi o sui, aemaise lea ou te iloa lea ou te nofo i lou itumalo, i le mea lea o le unfair competition, i mea ia o tau o oloa. O le mea e ofo ai nisi o sui ma lou tagata, o le tau o nisi tau o nisi oloa, o le oloa e tasi ae matua taugofie lava i le isi faleoloa, ae taugata i le isi faleoloa. E tasi le faataitaiga e pei o le pusamoa, a faapea e 5 faleoloa e tofu lava latou ma le tau. O le tala la a le au faioloa, o le tele lava o mea nei, e tasi lava le supplier e aumai ai. E le malamalama tele foi latou pe faafefea ona maualalo tele le tau o le isi faleoloa ia latou, i le tele lava o mea. E le gata i apainu, ma mea faapena, o lona uiga, e i ai le faaletonu lea e i ai i le va lea i le taimi na aumai ai i totonu.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Pe le tagai ane i ai le tatou Matagaluega, ia ma le isi mea, o mea nei o Wholesalers, pe tatau ona vaavaai lelei, ua matua tele wholesale ia tei ua ta faalogologo i ai, o le sau o lea van, pikiapu, o le wholesale mai fea ma fea. Pe le tatau ona set lelei ni criterias ma ni standards e mafai ona faatu sau wholesale, aua e le fair ma le talafeagai i ai latou o fai faalelei wholesale ia ma totogi pisinisi laisene ma mea e fai ai, i lo le isi vaega ia ua fai mai i o latou aiga ma tua i fale ma vaega faapena, o le mea lena lea ua tupu ai le tulaga lea e i ai nei, ma ua le iloa e le aufaioloa, le mea o le a sulu i ai, i mea lea e tulai mai. Atonu o se vaega lea e galulue faatasi ai le MCIL ma le Afioga i le Minisita mo Tupe Maua i vaega ia, ona o le faatelega o le unfair competition lea ua i ai nei.

E le gata i lea, faafetai o lea ua launch mai le mea lea o le full standard o le safety o leni vaiaso. O le mea lea ua maitauina nei, o le mea lea sa e le fou foi lea vaega, mea ia tau tuu apa ia e aumai nei, eleni, pisupo ma isi meaai. Ua matua tele le popole o lou mafaufau, i tulaga o isi mea ia e aumai i totonu o le tatou atunuu. Sei toe tagai lelei po o le a le faiga o nei mea. E le gata i lea, o mea foi ia lea e faatau atu lea e maua mai faalavelave ona toe o lea toe faatau atu i fale toe faatau mai, pe leai se aiaiga o nei mea, lona uiga o isi pusaapa e 3 a 4, 5 ia tausaga e taamilomilo ai, ae le o faaaogaina, e oo la i le taimi e faaaoga ai, ia ua tele le faaletonu.

Ia lau Afioga i le Minisita mo Galuega, Felauaiga ma Atinae Eeseese, ia na ou talanoa atu muamua, faafetai atu o lea ua tuu atu lau tusi i lau Afioga, pau le mea lea, o le mea lea e faaleleia faifaipea o le tatou auala. I lou lava talitonuga, e leai se excuse i leni taimi, ua leva ona faataatitia ia au i le tulaga e i ai aemaise ai galuega faifaipea aua e i ai lava kamupani e tofu lava latou ma le magaala ma ogaauala, ina ia vavevave ane e faaleleia ia tatou auala i le taimi e faaletonu ai. O nisi auala e fia masina o faapena e le oo i ai le faaleleia, e pei o le omo lea i Alamagoto, ua 2 nei masina o i ai lena omo tele toetiti lavevea ai ni taavale. Ae o le talitonuga, e i ai le kamupani o lo o vaai lena vaega o le auala.

O le isi mea, e fia fai lava sau tala i le auala laupapa lea i Leone, ua maea lea galuega, ae o le mea e ofo ai lou loto, aua o lea na faapea mai e aumai le kamupani mai fafo e faia. O le mea lea ua ou ofo ai, po o le a le mea na aumai ai leni kamupani mai fafo, ae o leni tamai auala laupapa e mafai e so o se kamupani Samoa ona fau. Ua tele atu auala laupapa ua tatou faia nai lo leni mea, afai o le World Bank, ia lena ua taatia atu i ou tafatafa, e tatau ona ave i ai se tatou tusi malosi, aua o le mea lea e o mai ma latou criterias maualuluga lea, ona le qualify lea o tatou tagata, e le mafai foi la ona build le capacity, e faaleleia o tatou kamupani Samoa, pe a faapea e faapea ona fai. A lea ua i ai le atamai, ua i ai masini ma so o se mea, e faatino e o tatou tagata. Ae faafetai ua maea lea ala laupapa, a sau nei lau taavale, e tau le ofi ai, ma le faaaloalo lava.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ia ona faaiu lea o sau faamatalaga i le ma Matagaluega, i le tou silafia, o le taimi lava lenei o le mea o le Digital Era, o le Digital Economy, ua le mafai ona toe alofia e i tatou. Ia ma e tataua ona tuu i ai le lagolago a le tatou malo, i tulaga o mea ia ua tuuina mai totonu. Ua tele foi faafitauli, e tele foi faafitauli lea e galulue agai i ai, ae pau lava lau fautuaga ia i le maua lava Matagaluega, ina ia aua ne i toe lauga se isi i lenei mea o le leitio. O le leitio, o le uo a tagata uma, aemaise lava tagata matutua ae le ola le leitio i lo latou itumalo. E tataua ona oo atu ia Tesema ua ola uma leitio.

Lau Afioga i le Minisita mo Tupe Maua, lea ia te au le faamaumauga o Tupe Maua foi ia mai tausaga taitasi. Ua alualu i luma le tele o tupe maua, faafetai i lau Afioga ma le Matagaluega. Ou te talitonu, a fai mo masini ia e pue ai ata o containers pei se x-ray foi lea, ua atili ai ona maua tupe maua o le tatou malo. O le uiga o lau faamatalaga lau Afioga, o le tele o le tupe lea e leiloa i vaega taitasi ia, ia e agai i ai e taumafai e tau punipuni ia pu nei, ia e maua ia le tupe faaopopo e tele atu i lo tupe o lo o i ai nei. Ae lea ua faasilia le tupe lea ua maua le target lea ua faasilia ia tupe maua, o lona uiga, e i ai au lafoga ia e tau fai mai, ia e mafaufau lelei pe ono fai pe taatia ia. E manaia ia au galuega lelei ia e fai, pe toe tuu i lalo tausaga o le taavale. E tasi lena mea lelei tele mo tatou ma le tatou Malo.

Lau Afioga i le Fofoga Fetalai, faafetai mo le avanoa. Manuia tele le Fonousu a Samoa, manuia lou itumalo faatali mai, ia ua e maua au i luga o le twitter ia ma le mea o le facebook ia pe a i ai se mea e finagalo ai. Ia faafetai.

FOFOGA FETALAI: Malo faafetai, ia manaia tele fuafuaga foi a le sui usufono, e pei ona saunoa, e fetai lava lou taimi ma le tatou malologa. O le mea la lea, ia leai e i ai foi le manatu o le Nofoa, o se le mafaufau o le Nofoa pe a tauanau sui usufono e saunoa. Ia ae peitai e faailoa i lou tulai mai ia ona faapena lea ona tuuina atu le avanoa ne i tuuaia le Nofoa ia ae faapena. E i ai le manatu o le a tulai mai e fia saunoa, o le a amata ai le tatou galuega pe a tatou toe amata i le itula e 3:00 i le aoauli.

O le mea la lea, ou te faasilasila atu, o le a faataatiaese ia galuega a le Fono Aoa seia aulia le itula e 3 i le afiafi.

Na faataatiaese Taulumaga a le Fono Aoa i le itula e 12:57 i le aoauli ma toe faaauau i le itula e 3:00 i le aoauli.

Na toe faaauau Felafolafoaiga i le faitauga faalua o le Tulafono Tau Faaofi o le Faatatauina o Tupe 2017/2018.

FOFOGA FETALAI: Ou te faasilasila atu ua toe amatalia Taulumaga ma Fonotaga a le Palemene. Ua ou manatu ua maua foi se isi malosi faaopopo i le paia o taitai o le atunuu e faaauau ai le tatou galuega.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

E faia le malologa ua faapena ona faaiu mai le saunoaga a le sui usufono mamalu mo Faleata Sisifo. Ma o lea ua tulai mai le sui usufono mo Vaimauga Sisifo Nu.1. Ou te tapa ma le faaaloalo le Afioga i le sui usufono mamalu mo Vaimauga Sisifo Nu.1 e tulai mai e saunoa e tusa ai o la tatou galuega.

Tofa LENATAI VICTOR FAAFOI TAMAPUA (Vaimauga Sisifo Nu.1): Faafetai i lau Afioga i le Fofoga Fetalai e tusa ai foi ma le avanoa. Ae muamua ona ou faamalulu atu e tusa ai ma lau saunoaga ae le i malolo le tatou Fonotaga. Ona o fetuunaiga lava o le matou pito nei, o lea sa lafo ai le faaaloalo i le sui usufono lea sa saunoa mulimuli. Ona o le faatauanau mai ma faapea mai o ona eleele o lea e fai ai le tatou Fonousu. Ae ui i lea, faafetai i lau Afioga mo le avanoa o lenei itumalo.

O lea ou te faatalofa atu ai i lau Afioga ma sui usufono uma o Samoa. E faatalofa atu foi i le faafofogaaga a le paia o lo tatou atunuu, o paia e tumau pea e oo i le gataaga. E faatalofa atu foi i Faauluuluga o Matagaluega aemaise foi e ua mafai ona tatou aofaga potopoto i lenei itula o le aso. O le faatalofa faapitoa i le itumalo pele o Vaimauga Sisifo Nu.1. i le Afio i le Matua ia Tofaeono, Afio Asi, Patu ma A iga e tolu. Afio le Usoalii ma Aiga Alaalatai Tamapua ma Manogiamanu ma le nofo a ituaiga ia Fuata, faapea Ataga ma Sa-Ataga.

Lau Afioga i le Fofoga Fetalai, e tolu lava vaega e fia talanoa ai lou nei sui usufono. O le vaega muamua e momoli atu lau faamalo i le Afioga i le Minisita le Ofisa Sili o Pulega o le Matagaluega o Tupe i le tuufaataasia ma le tapenaina o lenei galuega tele. E ia te au le ava tele e fai ai au ma sui usufono o si o matou itumalo e faaleo atu ai lo matou lagolagoina o le Tala Faatatau o le Tupe 2017/2018.

O le vaega lua o le agaga faafetai lau Afioga i le Fofoga Fetalai, e fia molimoli atu le agaga faafetai i le Matagaluega o Leoleo ma le LTA i le galuega o lo o faia i le taeao ma le aoauli i aso taitasi ina ia faamautinoaina le saogalemu o le mamalu o le atunuu o lo o ulufale ma ulufafo o lenei itumalo ona o aoaoga ma galuega. Faamalo faafetai i Matagaluega ia e lua. Faafetai foi i lo tatou Malo ona o galuega o lo o faaauau pea aua le faalelei o nofoaga sa faaleagaina e le afa o Evani i le 2012 aemaise le toe faamautuina o le ala e tafe mai ai le vaitafe mai Ueligitone Magiagi seia oo mai i Lelata faasolo mai i Apia. Malo faafetai mo le galuega, malo le onosai.

Faafetai atu foi i le Minisita mo Galuega, Felauaiga ma Atinae Eseeese i le faasoa o lea ua oo mai i si o matou itumalo le toe faaleleia o le auala lea e tau o le Faipule Road i Faatoia, faafetai tele ma le agaga fiafia o si o matou nuu o Faatoia ona ua leva ona tigaina i le faaletonu o lea auala. Ae faafetai i lo tatou Malo o lea ua faaoo mai le faamanuiaga ia i matou.

Lau Afioga i le Fofoga Fetalai o le vaega 3 o le faamanatu. O lo o i ai i totonu o fuafuaga mamao po o le CIM Plan a lo tatou Malo le taligalu i Moataa. E mai le 1997, toe iloilo lea o lea fuafuaga i le 2006, e talitonu foi o lo o faapena ona toe iloilo i le tausaga nei. O lea ua 20 ai tausaga talu ona taatia lea fuafuaga.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

A o lo o i ai i totonu o lea fuafuaga ia le taligalu o Moataa. E i ai le talosaga a lou nei sui usufono, pe a faapea o lo o fai pea tapenaga i le tulaga lea, ae a faapea e le o lava se seleni o lo o i ai, o le tatalo a lou nei sui usufono, ae a pe a fai se impact assessment o le siosiomaga po o se EIA, po o se social safeguard feasibility study e talitonu ai lou nei sui usufono, e fesoasoani i se lipoti o le a maua mai e limataitaiina ai le tatou Malo i se faaiuga tatau mo le saogalemu o si o matou nuu i Moataa.

O le vaega lua o alavai i Vaipuna, lau Afioga o luma tonu o le falesa EFKS i Vaipuna, po o le a le tetele o timuga pe itiiti foi, e toa lava le vai i luma tonu lava o le falesa lea ma se vaega o Vaipuna, e atoa le vaiaso o faapena ona toa ai pea le vai. O lea e tatalo atu ai ma le agaga maualalo i se fesoasoani mo lea tulaga. O lo o i ai foi le vaega lea i totonu o le fuafuaga mamao lea e pei ona taua.

Ma le auala galue lea e agai atu i le faatanoa vai o le tatou Malo i Magiagi. O lo o faaaoga pea lea auala e Matagaluega o le tatou Malo e pei o le Faalapotopotoga EPC ma le Suavai aua foi le faaaogaina o le faatanoa lea. O lo o ua toatele foi aiga o lo o nofoia vaega ia o le eleele, o le vaega foi lea o le nuu lau Afioga i le Fofoga Fetalai, o lea ua earmark e le tatou Matagaluega o le Siosiomaga, o se vaega e fai ma sulufaiga pe a oo mai ni mala faalenatura i lo tatou atunuu. E manaomia la le faalelei o lea auala ia faigofie ai le agai atu i uta ma toe agai mai i tai i taimi e manaomia ai se fesoasoani.

Lau Afioga i le Fofoga Fetalai, faafetai tele mo le avanoa. E talitonu e pau lea o le vaega sa fia faaleo atu e lou nei sui usufono. Ae ia agalelei lo tatou Tama o i le lagi i Taualaumaga uma o lo o totee o le tatou Fonotaga.

FOFOGA FETALAI: Faafetai saunoa, ua manaia le faafofoga i le tapuai mai a le itumalo aua le saunoaga a le sui usufono mamalu. Tapa le sui usufono mo Faasaleleaga Nu.3.

Afioga TOFA FOLENI LIO TAMA GALU (Faasaleleaga Nu.3): Faafetai i lau Afioga i le Fofoga Fetalai, o lenei foi itula e lagona pea le faafetai i le Atua ona o lea foi sa feagai ma nai malologa. O lea e vaavaai atu o lo o maua pea le soifua laulelei i lau Afioga aemaise o le Palemia ma le Kapeneta ma le Fonousu a Samoa. O le mea lea e viia pea le Atua i Lona agalelei aua Lana taitaiga i le Fonousu a Samoa a o feagai foi le atunuu ma lana tapuaiga.

Ou te faafeiloai atu i lau Afioga i le Fofoga Fetalai faapea foi le Failautusi o le Fono ma le aufaigaluega o lo o galulue i le Fono Aoao malo le galulue. E faafeiloai atu foi i lau Afioga i le Palemia ma le Kapeneta, e momoli atu le faamalo, malo le galulue i le tele o feau o feagai ma a outou Afioga. E faafeiloai atu foi i Ofisa Sili o Matagaluega e o lo o tapuai mai aua Samoa ma ona atinae.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

I lena itu o le Fonotaga i le nofo a Komiti o le Palemene sui usufono mamalu o le Fono, malo foi le galulue, faapea foi a outou Afioga i Minisita Lagolago, o tatou lava e lagolago i Afioga i Minisita aua le tele o feau ma galuega. E avea lenei taimi e faafeiloai atu ai i le tapuaiga mamalu, i Lana Afioga Mamalu, O Le Ao o le Malo ma le Masiofo faapea foi le mamalu o Sui Usufono o le Fono a Sui Tofia ma outou faletua, tainane foi le tapuaiga mamalu a Samoa. E le toe oo se leo i le tapuaiga a Samoa aua o Samoa ua uma ona tofi, e leai lava se isi e faaopoopo pe toese mamalu o le atunuu. Ae nuunuu ia Tumua ma Pule aua o le galuega tausila.

Ae avea lenei taimi e faafeiloai atu ai i si ou itumalo pele, Faasaleleaga Nu.3 mai Siufaga seia paia Saipipi. E faafeiloai atu i le paia o le Taulagi afifio le toaono o Alii o Faga, alaalatai foi lo outou toafa o tulafale ma tagata matutua faapea le Faleaana ma Salemuliaga, malo le tapuai. E faafeiloai atu foi i le nofo a Faafeagaiga, o outou lava e tatalo ma tuu mai la outou lagolago aua se manuia o le Palemene faapea le tapuaiga a Samoa. Faafeiloai atu i si o matou nuu o Saasaai aua lea itu o le aiga Taulagi Tea ma Vaafusuaga, alaalatai le Matuafetalai ia Segi ma le Puleileuu ma Salemuliaga, faamalo i galuega malo i feau o lenei lava tausaga. E faapea le tapuaiga a le nofo a Faafeagaiga, o outou o lo o tatalo mo se manuia o Samoa aemaise le Palemia ma le Kapeneta ma le Faigamalo. E avea lenei taimi e faafeiloai aloaia atu ai i si o matou nuu i Saipipi, aua le afio o le Taulagi i lau afioga i le sao ma le aiga sa Tofa ma le Maopu, afio foi le alo o Vaafusuaga ma le Usoalii, alaalatai le Falefitu ma Matatafaiga ma Salemuliaga, malo lava i si ou nuu le tapuai mai, faapea foi le tapuaiga mamalu i le Susuga i le toaina lau Susuga Kaleve Leifi ma le Afaigaluega paia a le Atua o lo o outou nonomanu aua se manuia o Samoa aemaise foi o lo outou tofi o lea ua pale mai i le faalagamaea a le atunuu.

Ou te talitonu e le umi foi se lauga a lenei itumalo, e pau lava le mea muamua e momoli atu le agaga faafetai i le Afioga i le Minisita o Tupe mo le Tala manino, Tala e matagofie, o lou vaavaai i lenei Tala o lea lava ua faamalieina lou sui usufono faapea lenei itumalo i le faasoasoa ma le lufilufiina aua Samoa ma lona atinae. E tele a tatou atinae e tele foi manaoga o le atunuu, ae malo le faasoasoa atamai. E tasi lea mea e taua i le faasoa, po o le a le tele o tupe ae a le lelei le faasoa ona le lelei foi lea. O le mea lea e faafetai i lau Afioga i le Minisita o Tupe. E momoli foi le faafetai i le alii o lea itu ia Lavea ma le pulega ma le afaigaluega a la outou Matagaluega o Tupe, aua e le faigofie le galuega, o le fatu lea o Samoa o mea tau seleni. O le mea lea faafetai. O le tatalo lava ia maua pea le malosila e faaauau ai le galuega aua lenei Paeiga ma le Malo o Samoa ma ona atinae. O le mea lea e faafetai i lau Afioga i le Minisita.

E le tele ni manaoga o lenei itumalo. Ou te iloa na lauga ai foi i lena tausaga. I lau Afioga i le Minisita mo Galuega, Felauaiga ma Atinae Eseeese po o lau Afioga foi Unasa, o lo taua lava itumalo e lua lava mea taua, o auala galue ma tulaga lea i taligalu. Aua o lenei itumalo mai Faga i Saipipi e ese le maaleale, e lata mai le galu, e aafia le gataifale lena lava e silasila i ai.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le tatalo la, se i silasila ane i auala galue. E amata atu i Siufaga, e ese foi le galulue o si o matou nuu o Siufaga. A outou agai atu i le itu, e fai o tauia, o meamata, o mea o fualaau, e ese le galulue, aua e galulue i le sami faapea foi le lauuta. O le mea lea, o auala galue lava e moomia. O le mea lea, ua tele tagata o le tatou itumalo ua agai i uta, sosola i uta, ia o mea lava nei o mala, aua a agi mai le afa, a sau le Tsunami, o uta lava. O le mea lea, o le talosaga lena, o auala galue i Siufaga ma le afioaga i Faga. A lelei foi le tamaoaiga, aemaise le vaega lea ua nonofo ai le tele o tagata. E faapena foi i Saasaai, ua tele tagata ua nonofo i uta, a o le faalavelave, e le o lelei auala. O le isi foi vaega, o le suavai, e fia moomia lava le suavai i uta e soifua ai ma ola ai le tele o tagata o si o matou nuu lenei o Saasaai. O le mea lea lau Afioga i le Minisita mo Galuega, o auala galue ona ua nonofo ai le tele o tagata ma le suavai taumafa.

Ona oo mai lea i le afioaga i Saipipi, ou te iloa e le tau faamatalaina atu mala faalenatura e lavea tele ai le afioaga lenei o Saipipi, le mea lava lea o le lolovai. O le tausaga lea ia Mati, lea lava sa silasila i ai, sau lava le vai to uma totonu o le nuu tafia i tai, motu le auala, ae sa silasila lava i ai lau Afioga. E le na pau lena, na faapena foi i le 2005, 2003, 1991. O lona uiga e faaaauu pea ona o le vai lenei e tafe mai o i Samalaeulu ma Patamea ona sau lea o le alavai alu i le Maliolio, ae sau le isi alavai faalava mai uta i Vaiaata, ona le tafe lea i Vaiaata ma Tapueleele ae afaina ai le itu lenei o Faasaleleaga. O le mea la lea, o le auala galue lea i Saipipi, e matua moomia lava e taua.

O le talosaga i lau Afioga, o le auala lenei o Saipipi e tau i Vaiola, o le kolisi lenei o Vaiola, tasi lenei kolisi tele i Savaii, e toatele alo ma fanau o lea ua aoga i Vaiola mai le Itu o Tane ma Asau, Faasaleleaga ma Palauli, ae tasi lava le auala e o ai, na o le auala lea i Safotulafai, o le manaia ia o lena auala. Ae afai la le auala lea i Saipipi faa-main road, lona uiga e tele se fesoasoani mo alo ma fanau aoga, e le gata i Vaiola, ae o le nuu lea o Tapueleele ma Vaiaata. O le mea lea o le talosaga a lenei itumalo, e taua tele le auala lea, e faaoga foi as a main road e agai ai i uta i mea nei o afa ma Tsunami, e taua tele. Ia, o le talosaga lena i tatou auala, aemaise le auala lea ua taua ma isi foi auala i si o matou nuu o Saipipi, e tele foi tagata ua agai i uta. O le mea lea lau Afioga i le Minisita mo Galuega, o le talosaga lava lena a si o ta itumalo, o auala galue ma le suavai i uta ina ia lelei ma tua i ai le aufaigaluega, aemaise e galulue.

Lau Afioga i le Minisita mo Galuega, na ona ou talosagaina, o lea ua tele finagalo i le uafu i Salelologa, ae o lau talosaga, o se isi vaa laupasese, e tasi lava le vaa lea e fealuai nei, o le Lady Samoa III. Sa vaaia nei i le fonotaga lea a le EFKS, e le lava a tatou vaa. E tele taavale na tutu i le ao ma le po. O lona uiga, ana i ai se isi vaa faapena, pei o le Lady Samoa II lea sa i ai, e faigofie lava. O le me lea mo femalagaaiga i Savaii, tou te silasila lava i ai i le faafitauli lea. O lea ou te faalogo atu e alu le Lady Samoa e toe ave le galuega i Tutuila, lona uiga e toe fia maua se isi a tatou vaa.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le isi lena galuega e taua tele mo le tatou uafu aemaise lava le femalagaai o si o matou motu i Savaii, ae le gata i lea, o le Malo i le mamalu o le Kapeneta lea e o atu i Savaii mo nisi o fuafuaga, e moomia lava ni vaa lelei e pei o le Lady Samoa III lea e i ai nei aua le feoaiga a le atunuu i le va o Mulifanua ma Salelologa. Lau Afioga, e pei o nai mea na e talosaga atu ai.

Ona oo mai lea i le Minisita mo le Punaoa Faalenatura ma le Siosiomaga lau Afioga i le Sui Palemia, o le talosaga foi lea, o lea ua avatu mea o taligalu ma talivai. O le alu atu lava lea i Siufaga tau i Saipipi, e matua moomia lava ni taligalu lelei ona e tafia lava i le galu. O lea lava e silasila i ai, o le mananaia ia o isi beach fale lea e i Faga, a o si ona lave lena e leai ni taligalu. O le mea lea e talosaga atu ai i lau Afioga i le Tamaitai Minisita, o lagona lava na o lenei itumalo. Ua uma foi ona faaoo mai tatou taligalu.

O le isi vaega, o mea o talivai, le mea lea o le lolovai lea sa tupu i Saipipi ma Saasaai, ona e leai ni proper drainage. E pei e pa mai loa le vai mai uta i Vaiaata, ona sue mai loa lea e le vai ia lona ala e alu i ai. O le faalavelave lena o lea e tupu nei, ma o lea lava e tupu. O lona uiga, e leai ni proper drainage foi lele po o ni alavai ina ia alu lelei ai le vai. Ua ou vaai i le galuega lea sa fai i Avao, e ese le manaia o lena galuega, pe ana maua la se galuega faapena i le matou nuu ona e tatau lava i le vai ona sau sao alu i le sami. E pei o nai mea na e talosaga atu ai lenei itumalo, ae malo e tele galuega, a o lena lava e i ai le faasoa tatau, aemaise lava le itumalo lenei e maaleale tele. E lelei lava isi itumalo. A tau loa Amoa ma le Faasaleleaga, o le maaleale ia o lenei itumalo.

Ona oo mai lea i le Minisita mo le Soifua Maloloina, faafetai mo le galuega i Tuasivi. O lena ua solosolo manuia lava galuega. Na pau lava lea o le mea o le fale maliu, ua lauga ai foi i le mea lea o le fale maliu, lea foi ua tu ai i talaane le cable, ia ua pipii faatasi ua le lava, e leai se afaina o le cable, a o le fale maliu lea e le o atoatoa lava. Ia ae talosaga atu, afai o le a sifi uma tatou mea nei i Salelologa, manaia foi e pei o lenei taimi, ae na o sina vaega lava e toe faaleleia o le tatou fale maliu lea i Tuasivi aua lava le mamalu o le atunuu ua tumalo ma tulaga faapena. Ae faafetai i lau Afioga, faafetai ua lelei lava le auunaga a le Soifua Maloloina i Savaii, e le gata i Tuasivi, a o isi foi lala o Savaii, o lena ua matou faafetai atu. Na pau lava lea o le mea o fomai ma le au tausimai ina ia faaleleia atili pea lea vaega o le auunaga.

O le Minisita mo Aoga, Taaloga ma Aganuu, faafetai i lau Afioga Loau, e momoli atu lau faafetai tele, o lea foi ua saunoa faafetai i le toe faafaigaluega o asiasi aoga. E ese le taua o le tofi lea. Ua ala ona tele mea e tutupu mai ma faafitauli, ona ua leai ni asiasi aoga. O asiasi aoga sa faalupe o tama o itumalo, o a mea e tutupu i afioaga, o ia lea e tau maia i le ofisa. O a foi ni faafitauli o faiaoga, o ia lava lea e tu i le va o le ofisa ma le community. O lea la e faalogo atu e tele aoga lea e tailua faiaoga, ae ana i ai asiasi aoga, o ia lea e silasila i le staffing ma vaai i le reshuffle o faiaoga. O le mea lea faafetai, faafetai o lea ua toe fai le post taua lea mo le Matagaluega o Aoga. E le gata la i le silasila i totonu o itumalo i faiaoga, o tamaiti aoga, a o le va ma Komiti e taua ai tele le tofi asiasi aoga.

22 IUNI 2017

**Tulafono Tau Faaoifi o le Faatatauina o Tupe 2017/2018
– felafolafoaiga i luga o le faitauga faalua**

O le isi tiute o le asiase aoga, o ia o le monitor toe review le curriculum, o a lava curriculum e avatu i le Ofisa, o ia lava lea e gafa ma totonu o vasega e vaavaai ma silasila po o o lelei galuega a nai faiaoga. O le vaega lea i aoga amata, e i ai foi le lagolago. O tatou aoga po o Pre School, e tatau lava ona faaleleia atili. O le amataga lea o se aoga, o le Pre School, Primary School ona faasolo atu loa lea i kolisi. Ou te talitonu o lea ua faauma foi se lagona o lenei itumalo, a o le i faauma se lagona, e momoli atu le faafetai tele i lau Afioga, faafetai foi i le Palemia ma le Kapeneta aemaise le Fono aua finagalo ma tulaga o lenei fonotaga. Tau ina ia agalelei le Atua, mafuta pea le Atua i le tatou Fono ia iu manuia. Ma lou faaloalo, faafetai.

FOFOGA FETALAI: Malo faafetai, ua lelei ma matagofie le faafofoga a le itumalo aemaise foi le tapuaiga a le Malo ma Samoa i le fautuaga i le saunoaga a le sui usufono mamalu. Malo faafetai le tofa. Ou te le iloa pe fia saunoa le sui usufono. Masalo o le sui usufono mulimuli lea o le sui usufono mo Aiga i le Tai, tulai maia lau Afioga e saunoa.

Susuga MULIPOLA LEIATAUA LAKI (Aiga i le Tai): Faafetai i lau Afioga i le Fofoga Fetalai mo le avanoa. Ua ou tulai atu ma le agaga faaloalo e fia faaali foi se manatu o Aiga i le Tai e ala i le tatou Fonousu. O lea ua taliu mai le paia o le Maota, maea palega auau foi le taliga o le sua i lau Afioga i le Fofoga Fetalai faapea foi le Afioga i le Palemia, le paia i le Kapeneta ma le mamalu o lenei Maota, ua maua se faasiliga malosi aua le faaauauina o le tatou Fonousu. E manatu foi o lea ua taula motusia sa o le talalelei mai le taeao e ala i le faapolo ma le faasagi sa saunoa i ai lau Afioga i le Taitai o le Maota aua lo tatou vatapuia ma lo tatou Tapaau Sili i le Lagi. O lea foi ua maea saunoa nisi o Tootouli ma uli lologo foi o tautai tila o le vasa sa... aua le tatou Tala Faatatau o Tupe i lenei aso.

Ae avea lenei avanoa e faatalofa atu ai i le paia faafogafoga mai o le tatou atunuu i Lana Afioga Mamalu, O Le Ao o le Malo i lo outou vaa seetolu i le paia i Sui Usufono o le Fono a Sui Tofia, faapea foi le loaloa o Samoa se i oo lava i se toe tagata. Ia manuia lau faafogogaaga a o alo atu lau Palemene i le sailiga o le tofa ma le moe aua se manuia o Samoa ma ona tagata. O se avanoa foi e faatalofa atu ai i le paia o si ou itumalo o faafogafoga tapuai mai, mai lava i Faimata ma Lalotoa seia paia Luatimu ma Malaetoli, o Atiga ma Falemai, o Anamai ma Falemanono. O maota tauave ia o lou itumalo aua le Susu o le Toafa o Alii, le Tapunuu ma lau Susuga Tuilaepa. Susu Alo o Malietoa, usoalii ma Pouli, faapea Taimalelagi, Sau ma Tooa, ae a lau tapuaiga Futi ma Auapaau e te tausivaatele aua Aiga i le Tai. E le gata foi i lea o le faafogoga tapuai mai o le paia o auuuna a le Atua o lo o nonomanu aua se manuia o le itumalo aemaise Samoa ma lau faafogogaaga.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

E manatu foi i lenei vaega o le aso, e talii ae popoe, e faanoinoi foi se lagona i lau Afioga i le Taitai o le Maota e faapena foi le ufitia o le ao pogisa i le paia o le afioaga ia Luafaitu i le susu o Taupau ma Mulipola, pola puipui e Auapaau. E avatu ai faamaisega, a o faafogafoga mai i le valaau paia a le Atua i le usugafono i lau fetalaiga Auapaau, ia maua le mafanafana i le paia i le aiga alii, maua le lototele, aua o le Atua lava na aumai, na te toe aveese.

E agai tonu se faamatalaga i lenei vaega o le aso i le auga o aute i le tatou Tala o le Tupe, sa faatuatuai lava se lagona a o se manatu, aua o le Tala o le Tupe e fitoitonu i lenei Matagaluega i le afio atu o le Afioga i le Minisita, le Susuga i le Tupufia. Peitai e i ai tala e masani ona musumusu mai toeaia ma loomatutua, sole, aua le taia i fale, a malu i fale, ia malu i fafo. E faapena se lagona i lenei taeao, e leai e le tau faamamaluina, a o le agaga o le faafetai e momoli atu i lau Afioga i le Minisita, lau fetalaiga i le Alii o le Itu ma le mamalu o le Pulega i o outou faiva alofilima aua e le faigofie lo outou fitaituga aua le tapenaina o le tatou Tala Autu o le Tupe, lea ua folasia i malae, ua malie foi le faalogologo i lenei taeao e pei o upu e fai i le mauga i Salafai, ua faamalo le tapena, faamalo le faatoatoa. Malo galue. Ia e talia atoatoa e lenei itumalo tulaga o le Tala o le Tupe. A ua faatuatuai lava se lagona, ua maitau foi i le tele o talosaga a le Maota, e musumusu atu i le Afioga i le Tupufia, e pei lava e tatau ona ou faatuatuai ia ae toe tapena se isi tatou Tala o le Tupe, ua uma le tatou paketi i talosaga a le aualii la e i o matua tele. Ia o le a le afaina, o le a faasoa lava i le faasoa a le tama selesese lima lelei, e lufilufi, e oooo foi le faasoa. Faafetai i lenei taeao, o upu e fai i Salafai, e le galo Afia i si ona vao.

O le agaga lena e momoli atu le faafetai tele i lau Afioga i le Minisita mo Tagata Tafafao Maimoa Mai, aemaise foi o le Afioga i le Tamaitai Pule ia Papalii ma le Pulega, i nai faamanuiaga e ala i le tatou galuega sa fitaituga i ai i le faleui se i tulou, aemaise foi o le Afioga i le Palemia o le Taitaifono o le Beautification Committee ua afua ai ona faatino lea galuega, o lale ua tua i ai le afioaga, ua tua le itumalo, ua tua Samoa ma e femalagaai aua le faaleleia o le tatou siosiomaga pei ona tatou laulauvivilu ai ae a le soifua maloloina lelei la e ua tua i ai le itumalo ma e fegasoloai. Faamalo fai o le faiva, e ese le matagofie o lea maota tulou le Maota nei. E ese le manaia o faiga a le Afioga i le Minisita ma le Ofisa, maua foi nai taimi asiasi atu aua le faaleleia atili o le turisi. Lau Afioga, toe lava o tai i si motu manaia loa ma matagofie lea faamoemoe. O sina fale e tua i ai le motu aua lava le faaleleia o le tatou vaega o tagata tafafao maimoa mai fafo.

E le itiiti foi le agaga faafetai i lenei vaega o le aso i le Minisita mo Galuega, Felauaiga ma Atinae Eeseese e tauala atu ai le faafetai ona o nisi foi o galuega faatino a le tatou Pulega o le Suavai aemaise foi le Faalapotopotoga o le Malosi Faaetise, e ui lava o galuega faaauau, ae peitai e talitonu lava le agaga o lau tuumumusu ua mafua ai.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Faafetai mo galuega lelei, ia i ai pea le agalelei o le Atua, ua taumasuasua lau faasoa i lenei taeao i le tele o talosaga, ua tau popoe ai foi Aiga i le Tai aua ua fai sina malosi o le debate a Puleono i Salafai, ua le auau le faasoa i Puleono i Salafai faapea foi Upolu, ae tutasi lava Aiga i le Tai e leai se isi e lagolagoina pe a tulai. Ia, fai lau faasoa lau Afioga i le Minisita.

E manatu foi i lenei aso e le faaumiumia se faamatalaga ua vela le fala. Lau Afioga i le Fofoga Fetalai ma le mamalu o lenei Maota, e le itiiti foi le agaga faafetai i le Afioga i le Taitai ma le Kapeneta, aemaise foi o le Faigamalo, i le tele o galuega lelei ua faatino aua lava le agai i luma o le manuia lautele o nai o tatou tagata. Ona manatu lea o le a foi le leo o Aiga i le Tai, faagata i i se faamatalaga, aua e po le aso lenei o toe tolaulau le anoanoai o talosaga na avatu i le amataga. E i ai le talitonuga o lea ua fale ia Satuiamaa, mavae ia i le mavaega a Sina ma Tuiletai, a ta mavae a e tofa i le po, ia tofa i malae ae fale i le fale o le Atua. Manuia lau Afioga i le Fofoga Fetalai, manuia lau Afioga i le Palemia ma le Kapeneta ma le mamalu o lenei Maota, manuia le faafofoga tapuai mai a si ou itumalo. Soifua.

FOFOGA FETALAI: Malo faafetai. Ia ma o le avanoa lenei ou te tapa lau Afioga i le Tamaitai sui usufono le Taitaifono o le Komiti o Tupe, le sui usufono mo Alataua i Sisifo e saunoa.

Afioga ALIIMALEMANU ALOFA TUUAU (Alataua Sisifo): Faafetai mo lou avanoa i lau Afioga i le Fofoga Fetalai o le Maota ma sui usufono uma o le Palemene ma Samoa o faatasi mai, faapea foi Samoa faafofoga tapuai mai, aemaise lava le faafofoga tapuai mai a lou itumalo o Alataua Sisifo. O le Atua Soifua mo le Palemene o Samoa, ia faapea lenei avanoa ou te tulai atu ai lava ma le ava se i fai se sao o Alataua Sisifo i le Tala o le Tupe 2017/2018, avatu ai ma fautuaga a le Komiti o Tupe Maua ma Tupe Totogi, o lea ua i totonu o le Lipoti. I saunoaga a sui usufono mamalu agai i le Tala Faatatau o le Tupe, sa fesiligia ai nisi o mataupu ua tatau ma onomea ona avatu i ai se faamalamalama a le Komiti o Tupe e ala atu i le Taitaifono. E muamua ona fia faailoa atu le itu taua lea mo le malamalamaaga a nisi o sui usufono o le Palemene. O Tala Faatatau o Tupe, ua na o se fuafuaga, o le plan po o se estimate, o le guide, e limataitaiina ai le faaaogaina o tupe faaalu ma tupe e maua mai. E tele saunoaga ma manatu faalia i tupe faasili e \$45miliona lea sa taua soo i le aso ananafi, le e faapea e \$23.4miliona mai le Tala Faatatau o le tupe o le tausaga o le a mavae atu nei, ma le \$21.3miliona mai le Tala Faatatau o le Tupe 2017/2018. O le mea mautinoa, e leai ni tatou tupe faasili faapea o i ai, ona o lo o faafofoga mai le atunuu ne i fesiligia po o le a le mea ua le faaaoga ai nei tupe faasili e fai ai auala ma faleaoga. Mo le silafia e nisi o sui usufono o lenei Palemene, seiloga lava e oo mai i le Palemene faamatalaga o tupe a le Malo po o actuals_mo tausaga faaletupe na taua, ona faatoa iloa tonu ai lea, pe na ausia ae pe fia tonu foi ni tupe faasili na mafai ona ausia.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Mo se faaitaiga ona o lea e gata Tala o Tupe a le Malo na tuuina mai ia Iuni 2016/2015. O le tupe faatatauina o le budget ia Iuni 2015, e \$4.5miliona. Peitai, in ua maua mai faamatalaga o tupe mo le tausaga lea 2015 actuals, na faamauiina ai tupe faasili e \$7.8miliona. O le fuainumera tonu la lena e tau e tatou o le tupe faasili, le \$7.8miliona.

Sa fesiligia le auiliiliina o le \$49.6miliona lea e faaagaaga mo atinae tetele ma le \$58.4miliona faameaalofa faapea ma le \$52miliona mo nogatupe. O le \$49.6 miliona mo galuega tetele e \$26.7miliona le vaegatupe mo galuega a le Matagaluega o Galuega, Felauaiga ma Atinae Eseeese ma le Pulega o Felauaiga i le Laualelele. E \$2miliona mo le malosiaga tau eletise, \$10.6miliona mo le Pulega o le Suavai ma le \$7.7miliona mo le Matagaluega o Fesootaiga ma le Ofisa o le Pule Faatonu. O le \$58.4miliona lea na fesiligia o tupe faameaalofa mo atinae tetele, e \$20.8miliona mo le poloketi e tapena ai le suiga o le tau. E \$20.1miliona mo le poloketi o vaalele sivili, \$8.1miliona e faaleleia ma faamalosi ai auala tetele, ma le \$9.4miliona mo le faaleleia ma faamalosi auala laupapa tetele o le atunuu. A o le \$52miliona lea na fesiligia mai nogatupe i lalo o tuutuuga mama, e mo le faaleleia o le malae vaalele ma le poloketi o le faalauaitetele o le atinae o le malae vaalele.

Sa i ai se fesili mo se tupe mo se taavale fuimu e gafatia fale tetele o lo o i ai nei pe a oo ina tupu se mu, o lo o i le lipoti a le Komiti i le itulau 64, 65 lena ua i ai le \$24,783 ua faatatauina mo se ituaiga taavale fuimu lea e 30 mita le maualuga mo lea auunaga. Sa fesiligia foi le maualuga o pasene o nonogatupe mai le Samoa Housing Corporation. O pasene mai nonogatupe o lo o i ai nei a le Samoa Housing Corporation, e 8% pe a faapea lena o la e i ai se aseta e faamau ai le nonogatupe po o le mokesi. O le 17% lea sa taua, e mo nonogatupe foi nei e leai ni aseta e faamau ai, lea e faaoga ai personal guarantees mo securities. E ala ona maualuluga tului o faaunegatupe nei, ona o le risk po o le tulaga pagatia e ono oo i ai le faletupe pe a le totogia le loan, ona e leai ni securities e mafai ona faatau pe a faaletonu le nonogatupe.

Sa fesiligia le pasene e maua mai i se saofaga fou i luga o tau o fesootaiga tau telefoni feaveai, ma na maua i sailiiliga a le Komiti, e tasi le pasene lea e fuafua e faaee i luga o voice calls.

O se tasi o fesili po o a ni atinae tetele o lo o aumai i le Tala o le Tupe. Afai na faitau lelei le tusi lea o le saunoaga a le Minisita o Tupe, o lena e lisi ai i ina atinae tetele ua fuafua mo le Tala o le Tupe 2017/2018, e aofia ai le malae vaalele, o le uafu i Matautu, atinae tau fesootaiga, Maota Fono o le Palemene, falepuipui fou ma isi ma isi ma isi.

Sa fesiligia foi le Pulega o Tusi Pasi a Samoa e fia faailoa atu e le o siitia le Tala o le Tupe a le auunaga lea, o lea ua faaititia le Tala o le Tupe fua i le 2016/2017 ma ua uma foi ona fuafuaina e le Komiti le fai lelei mai o galuega fuafua e fai i ai le Tupe ua fuafua atu. O le fesili i le aafiaga i le levy po o le faaititia o le CSOs lea e ave i le EPC ma le Samoa Water Authority, sa fesiligia le Pulega o ia faalapotopotoga e le Komiti.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ma e i ai le talitonuga e le tatau ona siitia ai le tariff aua foi o le fesoasoani lea a le Malo lea e tau o le CSOs, e toso ai paipa i nai aiga e vaivai le tamaoaiga. O lea, e toe ao lava e le faalapotopotoga lea le pili o vai ma pili o eletise, ia e kava ai le faaitiitiga lea o le levy. Ia ua lava ea ia fesili lau Afioga i le Fofoga Fetalai, o lea ou te vaai atu ua sauni uma mai Afioga i Minisita e tali atu mea o misi.

Lau Afioga i le Fofoga Fetalai, i le aotelega o summaries o tupe maua ma tupe totogi, o lo o manino ai i ina, e laitiiti lava tatou tupe maua ae tele tatou tupe faaalu. E pei foi ona maua i le Tala Faaletupe ua mavae atu ma isi atu tausaga ua mavae, o lo o faapaleni le faasoa mo tupe faatatau i tausaga taitasi i faaunegatupe mama e faatupe ai galuega tau atinae tetele. Ma o le agaga fiafia lea e fia faaalua ona o le pau o le pasene o tau aofai o nonogatupe a le Malo i le tamaoaiga. Malo i lau Afioga a le Minisita o Tupe, e faataua ai le feau lea e momoli mai i le sini autu o le Tala o le Tupe. I le faia o filifiliga sao ma le tonu aua se lumanai manuia. Ma o ia filifiliga e tatau ona faavae talitonuga mo agavaa tutusa ma talafeagai.

I le saunoaga a le Minisita o Tupe na faataua ai le tatau ona unaia ma faatino loa suiga talafeagai, ina ia siitia auunaga Ofisa a le Malo vave ma lelei ona faatino atinae a le Malo, faapea le uunaia o atinae o pisinisi tumaoti. O le pulea lelei o tupe a le Malo faapea suiga talafeagai mo auunaga o ofisa o le Malo ma le lagolagosua o faiga faavae tau tupe. O se faavae mautu lea e fau ai se tamaoaiga mausali mo le lumanai. O suiga talafeagai mo auunaga o ofisa o le Malo ma le lagolagosua o faiga faavae tau tupe, a ogatasi lelei lava ma fautuaga ma le faamamafa a le Komiti tupe na ave i Matagaluega ma Faalapotopotoga uma a le Malo. Ina ia faataua le faataatia manino ma le lelei le tapenaina o galuega fuafua po o work plans mo tausaga taitasi, e faapea ma fua faatatau i le faatinoina o ia galuega performance indicators po o performance measures ina ia ogatasi ma tupe na faatatauina e faatino ai ia matafaioi.

E talitonu le Komiti a lelei ona fuafua galuega ma taiala e fua ai galuega faatino, o le a faafaigofie ona fua galuega faatino ma matatia na ausia e Matagaluega ma Faalapotopotoga uma a le Malo. E taua tele lenei vaega e fesoasoani ai i galuega a le au Suetusi, i le susesueina e le gata i le faaoga tatau o tupe i lalo o faiga faavae ae faapea foi pe o a ni galuega faatino ma matatia na mafai ona ausia i tupe na faatatauina mo lenei galuega. O le matau a le Komiti i le tapenaina o tala o tupe a Matagaluega, e ave lava le faamamafa ina ia maua mai sa la latou vaega tupe, ae o lo o i ai nisi galuega taua e fia faaleleia atili. O galuega ia e pei ona taua ia work plans ma e matau atu ina ua amata ona tatou see atu i le performance budgeting lea lava e sii mai lava mai lea tausaga mai lea tausaga ia galuega fuafua e nisi o Matagaluega, e ui ua tetele vaegatupe ua faamatuu atu. E taua le vaai lelei o tupe i lalo o faiga faavae lea e taua ai le faatino o financial audit. Ae faapena foi ona tutusa lelei ma le taua o le i ai o ni faailoga po o faamaoniga o le suiga o auunaga i se tulaga agai i luma fua i tupe na tuuina atu po o performance audits.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le uiga o lau tala, e mafai ona ave se vaega tupe a se Matagaluega pe \$26miliona galuega fai, ia uma le tausaga lipoti mai le suetusi na faaoga lelei lava le \$26miliona lea e le Matagaluega e ala i le tausiga lelei o tusi. Ma e le i sili atu foi se tupe faalua i lo tupe na faatatau i ai, manaia tele. A o le fesili a lou sui usufono faaitaitai, o a la ni galuega ausia a le Matagaluega? O a ni auunaga na iloa ai o lo o siitia le auunaga or was in business as usual? Na ausia matatia mo galuega na fuafua lea na fua i ai tupe na tuuina atu? O le manatu lea e fia avatu, o le faataua galuega ma matatia e ausia fua i tupe nei e faatatau atu i Matagaluega ma Faalapotopotoga a le Malo. E tatau i nei galuega fuafua po o work plans ona link ia a tatou national development codes po o taiala mo le atinae o Samoa ma link atu ai foi ma millennium development codes lea tatou te vaavaai soo i ai i le Televisi, ina ia tasi ai lava le auala e uia e taunuu uma ai i taunuuua ua fuafuaina. Ae o le aotelega o le manatu, o le agaga lea o le faafetai i Matagaluega uma a le Malo i le tali mai i fautuaga a le Komiti na tuuina atu i le tausaga ua tuanai. E matauina le siisiitia pea i luma o le tapenaina o Tala Faatatau o le Tupe e ui lava o lo o i ai pea le avanoa mo le faaleleia atili o lea auunaga ma le tapenaina o le Tala o le Tupe. Lau Afioga i le Minisita o Tupe faafetai tele lava, e faaleo foi le faafetai i le afioga i le Ofisa Sili lau afioga Lavea ma le aufaigaluega a le Matagaluega o Tupe mo le galuega fita mo le tau faasoasoina o a tatou vaega tupe utiuti mo le Tala Faaatatau o le Tupe 2017/2018. O lau faafetai faapitoa ina ua le siitia le VAGST ona e aafia tele ai e maualalo lo latou tamaoiga faapea ma le faamama avega ia i latou e maualalo totogi i le va o le \$12,000 i le \$15,000. E fia faaleo foi le faafetai i lau afioga i le Minisita o Tupe Maua ma le Matagaluega e pei ona faaleoina e nisi o sui usufono, i le mafai ona ausia le matatia o tupe maua e pei ona faatatauina i lenei tausaga. O lea ua iloa nei i i, e mafai lava e le aufaigaluega ona ao mai i totonu o le masina le \$46miliona e pei ona i ai le latou target i masina taitasi. Ou te manatu la, ai ana tuu i ai le luitau e \$50miliona i le masina, ou te talitonu lava e fiu e mafai ona maua. Ae talosia ia i le ola ma le malosi le isi Tala o le Tupe i le lumanai. Malo lava.

A o faagasolo galuega lelei a le Matagaluega i le uunaia i le aoina o lafoga tuua se i tagai ane lava lau Afioga i le Minisita i le Lipoti a le Suetusi Sili, i le faamatalaga o le tupe i le 2015, o lo o taua ai le \$16miliona o aitalafu tuua e le o mafai ona faamaoniaina ma faamautuina e ono tuu ai i totonu o le finance system a le Malo. Se i silasila pe ua faatino ia fuafuaga, ia e fai foi ma nisi ai faaopoopo o lau Afioga ma le Matagaluega mo lenei tausaga faaletupe.

Lau Afioga i le Fofoga Fetalai ma lenei Maota, a o le i tuuina atu se manaoga o lenei itumalo. E toe fia fai lava lau tala lea mo le vaaiga lautele i le soifuaga ua tatou i ai nei. O Samoa o le atunuu faamanuiaina, e tele taimi e galo ai ia i tatou o Samoa o le atunuu faamanuiaina ona e tupu pea le manao, ma le soifua faatusatusa. Ae a tatou vaai i le Televisi i le soifua sauaina ma le matelaina i fafo, ona tatou molimauina lea o vavega o le alofatunua o lo tatou Atua o faailoga na o Samoa o le atunuu faamanuiaina.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ua matauina le agai pea i luma o le atinaeina o le atunuu e ui o lo o saosasoa lava isi itu a o lo o agaigai mai pea i luma ia nisi tulaga mo le faaleleia atili o le tamaoaga ma le atinaeina o le atunuu. O le tatou tiute lea o tatou o taitai o le Malo, o le silasila i auala e manuia ma maua ai se atunuu manuia ma le saogalemu i ona tulaga uma e manaomia.

Lau Afioga i le Fofoga Fetalai, ua manino le saunoaga a le Minisita o Tupe i le autu o le Tala o le Tupe, *Agavaa Tutusa ma Talafeagai*. O lea e faapunafanau i le faamamafa i le tupe le manatu lea e tatau ona uunai ma faatino loa suiga talafeagai ina ia siitia auaunaga a Ofisa o le Malo vave ma lelei ona faatino atinae a le Malo, faapea le uunaia o le atinae o pisinisi tumaoti. O i lea e taoto ai le talitonuga o lea itumalo e toe faamanatu ai nai manaoga o lenei itumalo, ona lafo atu lea i le faasoasoa a le tatou Malo.

O manaoga foi o lenei itumalo e agavaa tutusa uma i ai tagata, e le gata i le matou itumalo ae faapea foi le atunuu lautele. Ma e talafeagai lelei lava ma le soifua lelei ma le manuia o ona tagata. Lau Afioga i le Fofoga Fetalai e auala atu i le Nofoa le toe faamanatu o nai talosaga lava e lua o Alataua Sisifo lea na tuuina atu i le tausaga talu ai i Afioga i Minisita o le Kapeneta ma le Pulega a Malo. Lau Afioga i le Minisita mo Aoga, Taaloga ma Aganuu, e le i soona fai atua lau tala lea na fai atu talu ai, le taimi a o e taalo i le Manu Samoa ma le umi ona i ai o le talita i le SCOPA i lou vaitaimi se i vaeatu lava ou paia. Sa fai lava lau tala ma lou mautinoa, ma sa i ai ma le feau taua na avatu ai ina ia avea ma faaamalosiua i tama taaalo a le Manu Samoa. Ua sao lelei lava lau tala e saosasoa nei le faatinoina o mataupu tuua a le Matagaluega o Aoga, e pei o le saosasoa o lau tamoe ma le taalo malosi i ou foi taimi. Malo faafetai i lau Afioga faapea le Afioga i le Minisita Lagolago, o lea ua mautu le afioaga e fau ai lo matou faleaoga faaitumalo ma Falealupo. Ia alo ane laia i ou faiua manaia e faauma le ta galuega i lenei tausaga.

I lau vaavaai lautele i faleaoga faaitumalo lea faatoa uma ona fausia faleaoga e po o le fitu tausaga talu ai se i oo mai i le lua tausaga i tua, o le tetele ia ma le mananaia o faleaoga faaitumalo fausaga faaonaponei, faapea ma potu computers ma faatotoga uma i computers faleaoga faaitumalo. A o le mea la e tupu e pefua ai lava computers e le faaaogaina e le toatele o le itumalo. Ma e matauina pe na o se tolu i le fa potuaoga e faaaoga. E talitonu o le tetele o nei faleaoga faaitumalo e fua i proposals e tuuina atu e lau Matagaluega. O le fautuaga e manaia ae fua potuaoga ma le tele o le tupe e ave e fai ai le faleaoga i le aofai o tamaiti aoga. Ma o se faataitaiga afai e 400 tamaiti aoga o le matou itumalo, ua lava se \$5.2miliona e alu i lona faleaoga ae afai e 500 tamaiti e tatau ona tele atu potuaoga ma sili atu pe \$3.5miliona e alu ai. O le uiga o le fautuaga ina ia laugatasia uma itumalo i le faasoa ma agavaa tutusa ma talafeagai. O na e iina le faautautaga poto i lau Afioga e faasoa ai ma le talafeagai.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Lau Afioga i le Minisita mo Galuega, Felauaiga ma Atinae Eseeese, talofa i lau tau faasoasoa i le tele o manaoga o le matou itu, ia toa lou loto. O lea e matau atu e i ai le \$8miliona e faaagaaga mo auala i Savaii. Ae na ona faaloolomaau atu pea, se i e tagai ane lava i auala galue a si ou nuu o Falelima faapea Neiafu, e le manaomia se ta, e pau lava le mea o le sua ina ia sao taavale i uta i mea e i ai faatoaga. Sa saunoa mai nisi o Minisita o le Kapeneta ia te au talu ai nei, i le latou asiasiga i Savaii fai mai, se matua leaga tele auala o la outou itumalo Aliimalemanu, mai Tufutafoe i Neiafu, sa ou tali i Minisita ae a la pe a outou faaleo atu i le Afioga i le Minisita mo Galuega e faamaonia ai le leaga o auala o le matou itumalo. Na ona faamanatu atu faapena faamolemole.

Lau Afioga i le Minisita mo Fesootaiga, Faamatalaga ma Fesootaiga Vavave Faaneionapo ma lou soatau, e le i i ai se tupe na manaomia i le matou manaoga i le tausaga na tea nei, pau le mea e fia momoli atu le faafetai tele lava. O la ua ola le alaleo leitio i tua i lo matou nuu, talosia o la e maua lelei mai le saunoaga a le latou sui usufono i lenei taimi. O lo o matou usitaia pea lau saunoaga e ki ki pea a matou televise e ki ki lava ola. E talitonu lava o le mea lena e oo i ai le faaiuga o le tausaga, malo faafetai. Lau Afioga i le Minisita mo le Soifua Maloloina, sa siisii le leo i le avatuina o le manao o lenei itumalo aua vai e fia maua e le falemai o Sataua lea e autovaa atu uma i ai lo matou itumalo. Faafetai tele lava i lau Afioga ma le auaunaga faasoifua maloloina, ua le o toe i ai sea tulaga i lo matou itumalo. Ua mafai ona maua ia vai pe a uma ona tusi mai talavai e alii ma tamaitai fomai faafetai.

Ia faafetai mulimuli i le Minisita mo Tina ma Tamaitai, Atinae o Nu'u, Afioga ma Agafesootai. Faafetai mo le afea o lenei itumalo mo le polokalame mo le tau atinaeina o nuu ma ina ia i ai ma se sao o le faipule i ia faaiuga. Malo le galue.

Ia lau Afioga i le Fofoga Fetalai, ia ua taoto atu se lafo vale o lenei itumalo, i manaoga e toe faamanatu, e patino lava ia Alataua Sisifo. Ia lafo atu ia i aao faasoa lelei o le Kapeneta, o laau na fili tofi e faatino le finagalo o Samoa, ona i ai lea o le toafi, o le a foi le leo o Alataua Sisifo. O le a se upu ua le taugamalie i le faafofogaaga a o se manatu foi ua faapaia fofoga, e le gata o lou sui usufono a o le matou Komiti Tupe, tofomalie ma uta malie.

Ia alofagia e le Atua lau Afioga i le Fofoga Fetalai, ia maua lou malosi i so o se tulaga moomia aua tiute o lou valaauina, ia maua lau tofa ia aua le faatautaiga o le Maota o Samoa.

Lau Afioga i le Palemia, ia saga utupupuina e le Atua fulu o le segaula i lou malosi, ia saga foai le tofa poto aua lou too taumua i le sa folau o Samoa. A outou Afioga i Minisita o le Kapeneta, ia maua foi lo outou malosi ma le tofa mai i le Atua e fesoasoani i outou tiute e le faigofie. Ia agalelei foi le Atua i le malosi ma finagalo o Minisita Lagolago aua outou tiute lagolagosua.

Ia maua foi se malosi o lenei itu o le Maota, lea ua lafo mai ai le faatuatuaga e agaia le Malo, i Taitaifono ma Sui Taitaifono ia faapea sui usufono o Komiti Faa-Palemene, sili le latou tofa ma le soifua faaleagaga e tautoaluaina ai faiva ma tiute o le valaauina.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ia agalelei foi le Atua i Faauluuluga o Matagaluega ma Faalapotopotoga a le Malo ia ma o latou sui o lo o tatou mafuta i lenei afiafi. Ia le tapuaiga a Samoa ma e ua i ai tofiga a le Atua, ia mai lava i Ana Aufaigaluega tofofi e oo lava i fuaga lalovaoa, agalelei le Atua. O a ni mala o fou mai, tau ina ta ma faapoi ae folau i lagima le sa o Samoa. Si ou itumalo o Alataua Sisifo, o le a se vaivai, tofamalie ma uta malie, agalelei pea le Atua i lo tatou itumalo. Ia faamuli ai le faafetai i le Tamaitai Failautusi ma le Ofisa o lo o tautuaina le Palemene, o le matou tala lea ma le faaaloalo. Manuia tele lau Afioga i le Fofoga Fetalai, ma sui usufono mamalu uma o lenei Maota, faapea Samoa faafofoga tapuai mai, manuia le taaloga a le Manu Samoa. Soifua.

FOFOGA FETALAI: Malo faafetai saunoa i lau Afioga i le sui usufono o le Alataua Sisifo, ia o le Taitaifono o le Komiti o Tupe. Ia lele ua logo le Naiatea, ua logo foi le Naiama, ua sausu fiaele foi le manu nai Utufiu e pei o lea muagagana, aua ua logo i tino matagi lelei, o lea foi ua maua ai o le taulafoga, aua o lele ua mafai ona tali ma faamalamalama nisi o mea sa laga ma fesiligia e sui usufono mamalu.

Ia ua ou manatu, ia malo faafetai le fai o le faiva, e pei lava o le fetalaiga ia Ulumu ma Lefaoaseu. Ua mama foi se galuega a le Malo e tusa ai ma mea sa laga foi e le Palemene. Ia ma o le avanoa lenei e tuu atu i le Taitai o le Malo mo le faasologa o saunoaga a lau Afioga ma le mamalu o le Kapeneta.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te tulai atu ma le faaaloalo e momoli atu le faamalo i sui usufono uma o le tatou Maota na sausaunoa e faaalua ai foi o outou finagalo i le Tala Faatatau o le Tupe, ae o le faaiuga o le saunoaga a le Taitaifono o le Komiti o Tupe, lea sa faamanuia mai i le tatou au.

Ia ma o le ta tonu o le 2:00 nei, sa ou alu ai ou te matamata i faataitaiga o le siva a le aoga a Maluafou. O latou ia o le a faafiafia i le taimi e malolo ai, ia ma le aufaipese e toafa e latou te usuina le Vii o le tatou Malo, ia ma le Vii foi o Uelese. Sa ou fautuaina a pese, pese lea Agapella, aua le faaaogaina se laau pese, ae matua faasau ia leo, ina ia oo i itu e fa o le lalolagi ia le aufaipese mai Samoa, ona o aso nei ma le saosaoa o fesootaiga, o le a matamata mai ia le lalolagi atoa i le taaloga lenei aemaise ia atunuu uma o Europa, Peretania tele, faasolo ane ai i atunuu uma o Europa faasolo atu ai i Rusia, Saina, Amerika, Asia atoa faapea Aferika, o le a matamata uma mai i le taaloga lea o le a fai i le po taeao. O mea na ua agai i ai le lalolagi, ma o le mafuaaga foi lena, lea e le tau moe ai le Minisita mo Fesootaiga ma va i fafo, fesootaiga nei tau uaealesi, ina ia vave gaoioi ia le tatou laina lea e alu atu i lalo o le sami. Ma e a oo i le taimi e faatu ai masini ia, masini ia e moomia tele e tatou, e ono lagolago mai i ai le UTOS. O lona uiga e le toe faafaigata ni taaloga e faia i inei, so o se taaloga e fai i le po, faasalalau atu i le lalolagi atoa.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ia ma le tulaga lea e oo i le usuina o le Vii o tatou, ia matua 100% pe 200% i le vaavaai mai o tagata, ona o le taimi lea, o lea foi e alu ai le tatou faatosina. O le faatosina i le lalolagi, faatatau ia Samoa, ina ia atili ai ona toatele nisi e asiasi mai, ae tatou vanea iinei a latou taga.

Lau Afioga i le Fofoga Fetalai, o lena ua faafogafoga le Maota i le Tala atoa o le Tupe, \$934miliona le fuafuaga o a tatou atinae uma lava ua faataoto mo le tausaga lenei, ae \$955miliona ia tatou sailiga tupe, e \$615miliona ia le tatou seleni, ia ma foai e \$237miliona, ia ma tatou nonogatupe ia e mama le tului e \$103miliona, maua ai lea o le \$255miliona tala. A toese la tupe maua na mai tupe faaalu fuafua, lea la e i ai le faasiliga e tusa ai ma le \$21miliona e tusa ai ma le Tala Autu o le Tupe.

O le ata atoa lena o le tatou Tala o le Tupe, e toetiiti lava piliona, toe 5 lava miliona ona tatou oo lea i le piliona le iloa pe tatou te oo lava i ai i le tausaga o le a faagasolo i le tulaga o se Tala Faaopopo o le Tupe, ia ona faatoa tatou ausia loa lea o le piliona tala, a o faagasolo le tausaga lenei faaletupe.

O le faatinoga o galuega, e taua tele ai aua e le faapea e \$934miliona e fuafua, e le faapea la o le a faaalu uma, ma e faataunuu uma mea ia. Pei lava ona silafia, e i ai lava upu e faia, o tatou e fuafua, a o le Atua na te faatinoina. Ae pe oo atu i le masina o Tesema agi se afa, oti atoa uma lava le Tala o le Tupe lenei, ia ona toe fuafua foi lea e le tatou Malo. O lona uiga, na ona fuafua, a o le faatinoga, ia o le a tatou silasila i ai a o faagasolo.

O le ala lea na ala ai ona faataoto e le Kapeneta i le tausaga e 1984 ia Faauluuluga uma lava a le Malo, o le taimi lava e faagasolo ai le Tala o le Tupe, nonofo mai i. Ia nonofo mai e faalogologo, faalogologo i lauga a outou i mea e tatau ona fai. E tuai ona matou fai atu, ae la ua malamalama ia Faauluuluga o Matagaluega. O le tofia foi o Faauluuluga o Matagaluega, a ua taoto lava faiga faavae, ina ia tofia mai o ni lauia, latou te faatinoa le Tala o le Tupe lenei.

E le na ma le laina lau Afioga i le Fofoga Fetalai, o le agai i luma ma le solo i tua o le tamaoaiga, e le o tupe e faalagolago i ai, faalagolago i le gaoioi a latou la. O latou ia o le lima taumatau o le Maota lenei i le faatinoga o galuega, ma e selau ma le afe faafitauli e faafeagai ma i tatou a o faagasolo ia mea nei o faagaoioiga o galuega, e le tasi pe lua. Ae o le tiute lena o le Kapeneta, e saili po o le a le toa o i ai, ona faataoto atu lea e le Kapeneta le auala e fofo ai. O le mafuaaga lena o le tatalo e le uma, ia fesoasoani mai le Atua, i le toa 13 lenei lea e nonofo atu, ona o latou tauau e pau i ai ia le mamafa o le galuega.

O lea foi tou te faafogafoga mai, e malaga, malaga i fafo i le tele o taimi aemaise le taimi lenei ma le lalolagi. Ua ese le mea lea ua i ai le lalolagi, ua matautia le lamatia o le soifua o le lalolagi o tagata soifua i aso nei, ona ua tele i latou sulufai ona o le faaletonu o le latou faigamalo.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le mafuaaga lena o le faigofie i ai tatou ona o le motu o lea e siosio e le vasa. Ae o atunuu e i ai Europa, alu atu i Rusia, Saina, o Asia i Sasae, faapea foi ma Aferika e tau lava i Sepania faapea foi Potukale, Peretania, e soo le eleele. E te savalivali atu lava i lalo ma kiki maa, i Aferika i Saute po o fea le mea e agai ai. E soo eleele, faafitauli na o la e faafeagai ma atunuu la, aua e te fiu e toso pa, ae maua lava e tagata auala e moulu ai i lalo.

O le mea foi la e ala ai ona popole pea Triumph, i le tau taofia o le au Mexico, leaga e sosoo eleele atunuu nei. A o tatou, o lea e siomia e le sami, e ono faigata ai ona omai, ae o le mea lea ua tupu, ua sue e atunuu tagata e fia o i atunuu o lo o sau le tala o lo o maua ai le filemu. O le ala foi lena o lea ua faatu aloaia ai iinei i Samoa le Ofisa e feagai ma mea ia o tagata sulufai, aua e le faapea o le a siomia tatou e le sami, ona faapea lea ua saogalemu. La le e oo mai nei, ua fai ma fili ia Ausetalia le anoano o mau vaa, aua e tele le ogasami, tele matafaga, la le na o le lolofi ane o tagata, e mafua ai ona tatou mataala foi ma tatou, aua e le mafai ona tatou iloa tagata e felelei mai vaalele ma omai ai ma tagata e faatupu faalavelave. O le lalolagi lena o tatou i ai, o le lalolagi o le matua tele o faafitauli. O le taimi lena ma fonotaga e faia faava o Malo, o le faafitauli aupito sili lena o le tau, lea e agai uma lava i ai mafaufauga o taitai o le Lalolagi ona ua faigata tele ona toe taofiofi le suiga o le tau. O le fesuiaiga o le tau, o le mafuaaga ona o le vevela, ma o le taunuuga o le vevela, o le liusuavai o le aisa i le pole i matu ma le pole i saute ona siitia ai lea o le alititai, siitia ai le o le sami ma goto ifo ai i lalo eleele tu maualalo. E tupu le mea lena ua leai se Toga, leai se Kiripati leai se Tuvalu, o le tele o tatou eleele ua goto i lalo i le sami, ona tatou agai lea i luga i le mauga. O le ala lena o lea e taua tele ai polokalame a le tatou Malo i auala galue. O le tulaga lena o lea tatou te vaai atu i ai, e ui lava i le vevela i le taimi lena, a o nisi o nei kasa i luga i le lagi mai le taimi o le 1,800 tausaga talu ona amata mai mea nei o atinae o fale fau oloa. O le taimi lena sa le tetele faitauaofai o tagata, o le taimi na i ai Iesu e faapea o le taimi lena na o le 250miliona tagata o le lalolagi. O le taimi lena ua 7.3pilion le aofai o tagata. O lona uiga o le tele foi lena o eleele ua ta i lalo laau, ua leai la ni laau e mitiia kasa ia e taamilo i le vanimoimo ma atili ai ona vevela, ma e oo lava ia tatou, e i ai po e matua le mafai lava ona e moe, e tataua ona e apaapa i le ili e tapili. O le faafitauli lena o lea e feagai nei ma i tatou e ese ai ma tatou foi fuafuaga mamao mo le atinae o Samoa. O lea la ua taoto seleni nei e faagasolo ai tatou fuafuaga, ae tatou te le o mailoa le agai atu i le lumanai i le tele o fesuiaiga o le tau lea e oso ni Tsunami ma ni afa tetele, a o lea tatou te talanoa i le amataga o le tausaga faaletupe o Iulai, lea la e faataoto ai tupe faapenei ae le mafai ona tatou iloa e afua ai ona amatamea le tatou Malo ma amata ona faataoto mai ai mea nei o mafutaga tatalo ina ia fai ma tatou soso pea i le moa o le ala ma tatou apaapa ai i le Atua Silisiliese Na te faapaolo mai Ona aao, ma ua tele taimi ua tatou vaavaai ai i mea tutupu, o afa matuia toetiiti lava aafia ai Samoa ae toe seutu ese lava ma Samoa, o le tatou faafetai lena. Ma o le mafuaaga foi lena o lea e alu ai pea a tatou Vaiaso o Anapogi ma Talosaga i amataga o tausaga uma.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Lau Afioga i le Fofoga Fetalai, o lea ua taoto saunoaga a sui usufono, ma o le tulaga masani o le matou galuega o le amata mai o i le Minisita mo Fesootaiga ona faasolosolo mai ai lea ma le faamoemoe a mafai ona faauma nei tatou, ona tatou agai ai lea i le auiliiliina o le Tala o le Tupe i le aso a taeao. Ia tali na o mea taua ae tuu nisi mea se i tali i lea tausaga. Ia manuia le tatou Fono.

FOFOGA FETALAI: Malo faafetai. Malo saunoa i lau Afioga i le Palemia. Ma o le avanoa leni ou te tapa ma le faaaloalo lau Afioga i le Minisita mo Fesootaiga, Faamatalaga ma Fesootaiga Vavave Faaneionapo, tulai maia e te saunoa e tamua i le aiga Kapeneta.

Afioga Hon AFAMASAGA LEPUIAI RICO TUPAI (Minisita mo Fesootaiga ma Faamatalaga Tekonolosi): Faafetai i lau Afioga i le Fofoga Fetalai. Ou te muai sua le tuli aua le alii o aiga i leni aso i lau Afioga i le Fofoga Fetalai aemaise o le afio o le mamalu o le Fonousu a Samoa, i le afio o lau Afioga i le Palemia ma le Kapeneta aemaise foi sui usufono mamalu uma o le Maota nei. Afio foi Faauluuluga o Matagaluega aemaise le mamalu o le aufaigaluega a le Malo ma Faalapotopotoga ua mafai ona aafia ma tatou potopoto i le aso.

Ou te manatu ou te le toe soona tapoina le fala matasoo o lea foi ua sii le vaatele o le saunoaga a le Palemia e fai ma tomua o le tali a le atoa lanu o le nuanua i saunoaga matagofie ma finagalo momoli mai o le Maota nei, a o se faafogafoga tapuai a le tatou atunuu. I leni itula o le aso, ou te manatu o lea ua taoto ata o taulelei, ua malu foi le taufaanuu i galuega o leni aso, ae faafetai i le Atua o lea ua oo mai le taimi e tali atu ai le Malo i tulaga uma o lo o moomia aua le atinae o si o tatou atunuu.

Tau ia ina amata atu sau faamatalaga e faapenei, i fuafuaga faataatitia alualumamao a le Komiti o faatautaia tulaga tau tekonolosi i totonu o le atunuu po o le national committee o lo o taitaifono ai le Afioga i le Palemia ae ma lagolago i ai ma le Afioga i le Minisita o Tupe ma Faauluuluga o Matagaluega ma kamupani tumaoti o lo oi ai, ua faataatitia ai fuafuaga mo atinae tau tekonolosi. O le tausaga ua mavae i le taimi lava leni sa tatou talanoa ai sa tasi le uaea i lalo o le sami sa faapea ona tatou talanoa ai, ma ou te fiafia e faailoa atu i lo outou mamalu fuafuaga alualumamao a le National ICT Committee ua i ai nei. O le faaiuga i le tausaga nei i le masina o Tesema ua faamoemoe e tatala aloaia ai le Tuisamoa, o le faaiuga o le 2018, o le faamoemoe ua i ai e tatala ai le isi tatou uaea i lalo o le sami e sau mai Tahiti, lavea mai ai le atunuu o Cook Island, lavea mai ai ma le atunuu o Niue, a o lo o faatalanoa foi le atunuu o Tonga ina ia faapena ona faaigoa o le Manatua cable. O lo o faia foi feutanaiga ma le Southern Cross i le latou cable fou o le a fai i le 2019. Afai o le a taunuu i se taunuuga lelei leni fuafuaga, o le faaiuga o le 2019, o le a faapea ona taunuu mai ai le isi a tatou uaea i lalo o le sami. O le uaea lona tolu lea.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O lo o outou silasila ma tagatagai pea i tusitusiga ma faamaumauga o lo o faia ma le Malo i Sasae si o tatou motu i sasae i Amerika Samoa i se tasi o uaea fou e faataatia i le va o Motu e lua, o le a faaigoaina o le Samoa Amerika Samoa lona lua po o le SAS 2. A o lea foi e faagasolo i le taimi nei a tatou talanoaga ma o tatou uso i Tokelau ma le atunuu o Tuvalu e fai ai se isi uaea e tulaui mai lava i Samoa nei e agai atu i Tokelau ona agai lea i Tuvalu. Ma o lo o iai le lagolago a le faletupe o le lalolagi i lea faamoemoe. Ma afai e agai i le motu i Tuvalu, ona tele foi lea o le avanoa e mafai ona tatou oso atu ai ma tatou oso atu i le motu o Kiripati, oso atu i Guam o lo o i ai le fetaulaiga o fesootaiga mai le Atu Asia e oo atu i Amerika. O lona uiga e oo atu i le isi lima tausaga lea e i luma ua avea Samoa o se ogatotonugalemu o fesootaiga i le lalolagi aemaise o le Pasefika.

O le faamoemoe o lo o i ai nei, faaopoopo atunuu o loo faafofoga mai ai ma le sau o le Tuisamoa mai Fiti o lo o lavea mai ai Wallis ma Futuna ma se tasi pito o Fiti. O lona uiga e oo atu i le tausaga 2021, 2022, ua atoa se 12 o atunuu o le Pasefika ma le atu Polenisia e fesootai mai i Samoa nei, e avea ai Samoa ma se totonugalemu o fesootaiga i totonu o le Pasefika ma tatala ai se avanoa tele mo tatou tatou te fesootai ai i le atu Asia o lo o i ai le tele o le tamaoaiga i lenei vaitau, faapea foi le lalolagi i fafo. O lona uiga i le tulai mai o le a matua faatupulaia le tamaoaiga o Samoa i tulaga tau fesootaiga. O le anavatau a le Malo ma lana manulauti i le atinae ina ia maua e Samoa fesootaiga aupito sili ona taugofie, ina ia faaleleia ma siitia tulaga tau fesootaiga ina ia faaatoatoa lona agai i luma i le lumanai o le atunuu, ina ia mafai ona agavaa Samoa aemaise lava i tulaga tau aoaoga ma tulaga tau le soifua maloloina i le tele o faamaumauga ma le tele o aoaoga mai fafo ma le tele o tulaga tau materials e faaaogaina i aoaoga aua le atinae o le mafaufau ma le aoaoina o tatou ma o tatou tagata. E tele foi fuafuaga a le Malo ua i ai. Ma o nei taulaiga uma o uaea i lalo o le sami, o le a faapea ona tulaui uma i uta i Vaivase i le mea ua outou silafia i le aoga a le Kolisi o Samoa, o i o le a fausia ai e le Malo se tasi o fale e taua o le Data Centre. Ma o leni Data Centre, o le a faapea ona tuu ai uma i totonu nisi o applications po o nisi o polokalame aupito sili ona tetele ma taugata, e le gata ina faaaogaina e Samoa, ae o le a faapea ona faasoa atu i nisi atunuu uma lava o le Pasefika o le a faapea ona fesootai mai ia tatou i se tau taugofie, ma o le a avea ai Samoa ma se tasi o atunuu i totonu o le Pasefika o le a fesoasoani ma faapea ona faatupulaia ai le tamaoaiga o nisi o atunuu ma faapea ona faasoa atu le manuia i nisi o atunuu o le Pasefika e laitiiti ifo lo latou tamaoaiga nai lo tatou. Ae tele foi itu e mafai ona fesoasoani mai ai atunuu ia o le Pasefika i le faatupulaia o le tatou tamaoaiga.

O le fale lava lea o le a faapea ona tuu ai i totonu ma se tasi o faamoemoe o le Malo ua i ai nei o le Pacific Renovation Centre. O i, o le a taumafai ai, o le a le laitiiti o le idea a tatou o le a i ai i le taumafaiga a Samoa, o i o le a faatupulaia ai atili ma avea o se atinae tele ma mafai ai ona agavaa tatou e faaaogaina mo atinae i fafo.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le mea ua iloa nei ma ua faamauina, pe tatou te nonofo i Samoa, e mafai lava ona tatou galulue mo atunuu i fafo e tauala atu i le taulaiga o fesootaiga o le a i ai nei. Ma o le faamoemoe lava o le Malo ua i ai nei e amata atu lava i le taunuu mai o le Tuisamoa, ina ia matua faagaioioia fesootaiga i ni tau taugofie. E i ai atunuu o lo o faapea ona tatou tilotilo ma vaavaai foi ma suesue ma sailiili tulaga o fesootaiga na i ai, ua leva ona taatia a latou uaea i lalo o le sami mo fesootaiga, ae oo mai lava i le taimi nei e le o i ai se agai i luma o fesootaiga. Ma o i lea ua agai mai ai tulaga lelei aua le faaleleia o le atinae o fesootaiga ua i ai nei. Ma o le faamoemoe lava ua i ai, ia oo i le taimi e tatala ai le Tuisamoa a ua matua mauualalo le tulaga o fesootaiga a ua alu saosaoa foi. Ma e avea foi lenei avanoa a faafofoga le atunuu i tulaga tau pisinisi uma lava i totonu o Samoa nei, aemaise lava i tulaga tau atinae turisi o lo o faafofoga mai tua, a faapea o faaletonu le tulaga o fesootaiga i lau mataaga, faamolemole faafesootai le Ofisa o le Turisi i Apia mo le tuufaatasia o tulaga uma ua tilotilo i ai le Malo mo le faaleleia, ae le i atoatoa mai ma taunuu mai uaea o fesootaiga.

O tulaga na o lo o faapea ona tilotilo i ai le Malo i lenei taimi. E i ai foi setasi o faamoemoea o lo o faapea ona i ai le naunautaiga o le Malo ina ia faapea ona taunuu i se taimi vave lava i lenei tausaga. E i ai se tasi o vaa o lo o faapea ona faakonekarateina e le Pasefika atoa mo le faia o le maintenance lea i lalo o le sami, ma o lea e taumafai le tatou Malo ma le kamupani a le Samoa Submarine Cable ina ia taula i tai ina ia faapea ona toa i tai i le uafu ma le uafu a tatou. E le gata i lena, o le fausia foi o se fale warehouse i luga o le uafu ina ia faapea ona faaaogaina e lea kamupani. Ma e tele ni faamanuiaga o le a faapea ona agavaa ai tatou mo lea faamoemoe, e le gata i le rental i luga o le uafu ma le totogiina o le tau o le lisiina o lea warehouse, faapea foi ma le taula o le vaa ma lona lisiina, a o services uma foi o lo o faaaogaina e lenei vaa. O le vaa foi lenei, e 60 lona auvaa e i ai i luga o le vaa i taimi uma lava. A o lenei 60 o tagata Filipaina.

O le faamoemoe o le Malo ua i ai nei, a faapea e taunuu lea faamoemoe, ona faapena lea ona tilotilo ina ia tuu tulaga tau submarine cable work i totonu o le silapasi lea, le tatou marine le aoga a le marine i Vaivase ina ia avea o se tasi o faamoemoea, ma le taulaiga o le vaai, mo le isi lua i le tolu tausaga i le lumanai ua mafai ona tatou suia se 30 pe 40 o le aufaigaluega lenei a Filipaina i a tatou lava tama fanau. O le faitotoa lea o le a tatala atu ai i atunuu i fafo e pei ona i ai nei seila o lo o faapea ona faigaluega i luga o vaa, o le a faapea ona tatala atu ai tatou tama fanau i fafo ina ia faapea ona agavaa i galuega faa-uaea i lalo o le sami po o submarine cable work.

FOFOGA FETALAI: Ou te faamalie atu i lau Afioga i le Minisita, ona o lea ua tatou toai taunuu i le tatou malologa masani, o le a faaauu le saunoaga pe a tatou taliu mai i le tatou malologa. O le a faataatiaese Galuega a le Fono Aoa mo lana malologa.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Na faataatiaese Taualumaga a le Fono Aoaio Faitulafono mo lana malologa i le itula e 4:44 i le afiafi ma toe faaauau i le itula e 5:51 i le afiafi.

FOFOGA FETALAI: Ou te faasilasila atu ua toe amatalia Taualumaga ma Fonotaga a le Palemene. Ia manatu foi le Nofoa ua maua le isi malosia faaopoopo e faaauau ai le tatou galuega i le Afioga i le Taitai o le Malo ma le Kapeneta, ia faapea foi sui usufono o le Palemene.

Ia e faia le malologa o saunoa le Afioga i le Minisita mo Fesootaiga, Faamatalaga ma Fesootaiga Vavave Faaneionapo, ma ou te tapa ma le faaaloalo lau Afioga e faaauau lau saunoaga.

Afioga Hon AFAMASAGA LEPUIAI RICO TUPAI: Ia faafetai i lau Afioga i le Fofoga Fetalai, manatu foi ua sao i alo le tautega i lenei aoauli i le paia ma le mamalu o le Fonousu a Samoa.

O le faaumaina o lau faamatalaga i le vaa lea o lo o taumafai le Malo e aumai i Samoa nei, ia o le Kamupani a le TEZ Com mai Amerika o latou ia ua maua le konekarate o le faiga o maintenance o cable i totonu uma o le Pasefika. O le itu taua tele e manaomia ai le vaa lenei, ia a i ai se mea e faaletonu o uaea i lalo o le sami, e sau mai Fiti po o le alu i Tahiti, ia e le umi ona motusia fesootaiga, ia ma e le tele foi se faaletonu o tatou pisinisi o le a i ai, ona o lea o lo o faapea ona toa le vaa iinei, ia ma faamautu i Samoa nei.

Ia o nisi na o fuafuaga tetele alualu mamao o lo o i ai nei, ua faataatitia ma fuafuaga a le malo mo le isi 5 tausaga i le tatou komiti o le ICT Komiti. O fesili sa lagalaga i agaga faaalua o sui usufono mamalu o le Palemene, ia o le tele lava o tou finagalo faaalua o le faafetai i le laugaina i le tatou fonofono ia Iuni i le tausaga ua mavae. Leai e le tau faafetaia galuega a le Malo, o le tulaga lea o lo o faapea ona tulai mai ai ia le Kapeneta aemaise foi i Matagaluega a le Malo i le foe, ina ia faataunuina outou finagalo uma.

E ova i le 70 pasene ia galuega faataunuina e pei ona outou saunoa ai ma faapea foi ona faaalua ai outou finagalo i lenei tausaga, ia ma o lo o faaauau pea galuega a le Malo ina ia faaleleia atili le fesootaiga i luga o televise, ia o leitio i le tele o vaega e le i faapea ona taunuu i ai muamua.

O le mea e tatau ona oo i ai sau faamatalaga ma ou te faafetaia ai le galuega faipaaga a le Malo ma Kamupani Tumaoti o lo o faapea ona galulue faatasi ia tuufaatasia ai ma ua faapea ona faasoa ai ia pou a kamupani fai telefoni, ia ua mafai ona faatagaina ai ia kamupani faasalalau, ia televise ae o leitio ua ia ua faafaigofie ai ona faagasolo ai lea vaega o le galuega, ma e faafetai tele ai lava i le Afioga i le Minisita Lagolago, faapea foi Pule Sili o Matagaluega, e le gata i le Matagaluega o Fesootaiga, ae faapea foi i le Matagaluega o Pule Faatonu, ia ona o le taumafaiga o nei galuega aemaise foi i kamupani uma lava tutoatasi o lo o faapea ona galulue faatasi ma le Malo. O fuafuaga alualu mamao

Tofa Lopaoo Natanielu Mua: Lau Afioga i le Fofoga Fetalai .

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

FOFOGA FETALAI: E faamalulu atu i lau Afioga i le Minisita, o lo o tulai mai le faauilavea, sui usufono mai Vaisigano Nu.1, saunoa le sui usufono.

Tofa Lopao Natanielu Mua: Faafetai lava mo le faalavelave i le saunoaga matagofie a le Afioga i le Minisita, ae na ona fia faamanatu atu lava, leaga o lea ua ou vaai atu o le a faaiuiu le saunoaga. O lea sa fesili atu lou sui usufono i le tulaga lea i le faatupeina o le cable lea o le Tuisamoa, a pasia nei le Tala o le Tupe, ua atoa le 125 miliona le tupe o le a faamatuu atu e le malo i le faamoemoe lea, e pei o le agaga ona o le Tuisamoa cable lea e faagaioi e le kamupani o lo o shareholders ai, Digicel, BlueSky, Samoa Life Insurance Corporations, UTOS ma le NPF ae po o le a le tuutuuga o faia, o le mea lena e fia malamalama ai lou sui usufono, lau Afioga i le Fofoga Fetalai, ou te faamalulu atu ai i le Afioga i le Minisita, pe i ai sina faamalamalama i le itu lea, ma le faaloalo.

FOFOGA FETALAI: Malo. Lau Afioga i le Minisita tulai mai.

Afioga Hon AFAMASAGA LEPUIAI RICO TUPAI: Ia e leai lau Afioga o lea ua ou oo tonu lava i ai lau faamatalaga i le vaega lea. O galuega uma lava lea ma fuafuaga alualu mamao a le malo ua i ai nei i le tatou fesootaiga i uaea o fesootaiga ua aumai, ia ua mafai ona faataunuuna ona o le kamupani lea a le Samoa Submarine Cable e galulue faatasi ma le Malo. O Samoa Submarine Cable, o se tasi lea Public Private Partnership ua faapea ona tulaga ese lona tulai mai, e le gata i le Pasefika, ae o le lalolagi ma tulaga tau fesootaiga i lalo o le sami, ua tilotilo i ai ona o le tulaga lelei o lo o i ai.

O le tupe o lo o faagaioi ai ia galuega nei, o le tupe fesoasoani mai fafo mai o tatou paaga, o le ADB faapea foi le Faletupe o le lalolagi, ma o lenei tupe o lo o faapea ona aumai faa grant i le malo, ia o lea la ua faamatuu atu e le malo i le kamupani o le Submarine Cable i se pasene e 1 pasene e loan atu ai i kamupani ia mo lona faagaioia ai galuega uma lava a le Malo.

E leai se tupe a le Malo mai totonu o le Tala Faatatau o le Tupe o faaalu i le galuega lenei, seivagana aiaiga ua faataatitia, aua o le Kamupani lenei a le Submarine Cable, ia e ono ia Matagaluega a le Malo, Faalapotopotoga a le Malo, ma Kamupani Tumaoti, o lo o faipaaga ai. O le UTOS, NPF, o le Samoa Life Insurance, o le Kamupani a le CSL, o le Kamupani a le Bluesky ma le Kamupani a le Digicel. Ia o kamupani uma nei e 6, o lo o faipaaga ai i totonu ma lo latou sao e 8 miliona, ina ia tuufaatasi ma le tupe lea ua faamatuu atu e le Malo, i le pasene ina ia mafai ona toe faafoi mai i le Malo ia pe a uma le 5 tausaga ma lana faiga feagaiga ma o le ala lea lau Afiogaí .

FOFOGA FETALAI: Ia se i tulai mai le faauilavea, Salega i Sasae.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Tofa Olo Fiti Afoa Vaai: Lau Afioga i le Fofoga Fetalai, leai e faamuamua atu pea lau faamalo, i le silasila mamao i le Afioga i le Minisita, i le tulaga o lo o i ai ia le faataunuina o lea atinae taua. Ia atonu ua i ai se galuega a lau Minisita Lagolago o fesoasoani atu ai i lau Afioga? Ou te talitonu lava e nao lau Afioga lea e gafa ma le vaega lea. Na pau lava si faafesili, lea o lo o ou faalogologo atu, o lo o shareholder ai ia tatou service providers, i le cable lea.

Ia e manatua foi lau Afioga i le Fofoga Fetalai, e pei o tatou players lea o le atinae lea, o kamupani telefoni ia latou te faaaogaina le tatou malae lea, ia ae laufali pea le tatou malo. Ia e pei o le mea lea na i ai muamua, a o tatou faaaogaina ia satellite systems, e pei o lea na oo mai ai loa le Digicel ma le Bluesky. O le tele foi ia o vevesiga sa fai i le taufaoina o le gateway. Ia o le tatou cable la lea ua i ai nei, sa tatau lava ona 100 pasene ona own e le tatou Malo, ina ia tatou collect ai le sau i fafo ma le alu totonu o le faaaogaina o le cable. Ia e pei o le tulaga lena sa tau avatu ai se lagona vaivai i nei toe tulai mai foi nisi faafitauli i tua, ona ua shareholder isi a tatou players ma le agaga faaaloalo, faafetai.

FOFOGA FETALAI: Tulai mai le Afioga i le Minisita.

Afioga Hon AFAMASAGA LEPUAI RICO TUPAI: Ia faafetai le fesili a le sui mamalu, o itu uma ia ua uma ona faataatitia e le Malo ia puipuga. E 3 ia ituaiga feagaiga ua uma ona sainia e le Malo ma kamupani uma o lo o faapea ona aafia ai, ia ma o lo o matua puipua ai le faiga faaalatua, puipua ai le faiga foi lea glood, ia ma o le galuega o lo o faapea ona mataituina ai le faagaioiga o nei mea ia faataunuina ai ma ia mautinoa ai le manuia o le atunuu lautele, ia ma aua nei i ai ni faiga faapena. O le matafaioi lea ua tuuina atu i le Pulega o Faatonu, i lalo foi o ni feagaiga ua sainia ina ia silasila totoa ma ua faapena foi ona, o le kamupani e pei ona outou faafofoga mai, o le kamupani o le kamupani, a faaopopo i ai share o le UTOS, share o le NPF, ma share o le Samoa Life ia tuu i ai ma isi share o le Malo la i totonu o le CSL, ma le Bluesky, ia ma faapea foi le Digicel, ia o lona uiga, e uma ifoga, 75 i le 80 pasene le kamupani lena, o share a le Malo. Ia ae o le agaga lava lena o le Malo, ia sili gaioi ma sili ona lelei ona faagaioi ia atinae faapenei, pe a tuu i tua i le Private Sector.

Ia ma o tulaga uma lava e o faapea ona faaalua pe afai e i ai se popolega, ia ua matua lelei ona malu puipua, ia ma o nei foi aiaiga ma sainiga feagaiga faapea ona faia, ia sa faapea ona silasila totoa ma ave i ai ia le faamalumaluga a tatou paaga mai fafo, le Faletupe o le Lalolagi ia faapea foi le Faletupe o Atinae o Asia, ana le faamalieina, e le mafai ona faamatuu mai ia le seleni mo le faagaioiga o lena atinae. Ia o le seleni lena e tou te silasila i ai i totonu o taatia atu, ona o lea lava e faaauau le galuega mai le la tausaga faaletupe e oo atu i le agai i luma, ona e lei uma le galuega o lea lava e faagaioi e pei ona fesiligia e sui usufono mamalu.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ia a o tupe e maua mai, o lea e tou te faafofoga ma i le taumfaiga o lo o taumafai ai nei, ina ia faapea ona fesootei atu i lea atunuu, lea atunuu ia ma lea atunuu. Ia o iina e faapena ona tatou tilotilo i ai i tupe maua ia aua i le manuia lautele o le kamupani o le manuia foi lea o tatou ao avea ai foi Samoa ma faamanuiaga i atunuu tu tuaoi ia ma o tatou uso o lo o faapea ona latalata mai ia tatou. Ia o se faamatalaga auiliili lea o nei atinae ia ma le agai i luma o le Maloí .

Afioga Faumuina Asi Pauli Wayne Fong: Lau Afioga i le Fofoga Fetalaií .

FOFOGA FETALAI: Malie lau Afioga i le Minisita, se i tulai mai le faauilavea, o se mea e fia faasao, fia faamalamalama.

Afioga Faumuina Asi Pauli Wayne Fong: Leai o le mea sa laga i lauí .

FOFOGA FETALAI: Saunoa le sui usufono.

Afioga Faumuina Asi Pauli Wayne Fong: Lau Afioga e faigofie lava lau fesili sa fai atu, i le tulaga i le speed, po o i ai se fuafuaga a le Matagaluega i le taofiga o le sau i totonu o tulaga leaga po o tulaga faalelelei lea sa ou talanoa atu ai, a ua lava na o mea lelei e aumai i totonu, po o i ai se fuafuaga e taofi ai le isi vaega lea e faaeteete ai lo tatou atunuu. Pau lava lea o le fesili lau Afioga i le Minisita.

FOFOGA FETALAI: Faafetai, e moni le sui usufono, se i tulai le Afioga i le Minisita.

Afioga Hon AFAMASAGA LEPUIAI RICO TUPAI: Ia o lea ua ou oo tonu mai lava i le mea lea e saunoa ai le sui usufono mamalu. Ia o nei atinae uma, ia e lagona lava le ootia ma le alofa, i le tele o saunoaga a sui mamalu sa faapea ona saunoa i le aso ananafi e oo mai lava i le aso nei, ia ma e iloa ai lo outou lagona ina ia faapea ona malupuipuia si o tatou atunuu, ia aemaise lava i fanau i lenei foi vaitau o fesooteaiga ma le faigata ua i ai nei.

O le taimi lenei, o le isi poloketi aupito sili ona tele a le malo ua i ai nei, o le cyber security. Ia o lo o faatulaga nei le puipuga o upega tafailagi, ma le malo o Ausetalia o lo o aumai le latou fesoasoani ma le tele o nisi paaga mai fafo, ina ia faapea ona galulue faatasi. A o le i taunuu mai laina nei, ia ua faapea ona ia faapea ona malupuipuia tatou i le tele i tulaga faaletonu i luga o laina ia ma tulaga tau fesooteaiga i le vateatea. Ia ao le taimi lava lenei i lona faagaioiga, ia o lea ua saina feagaiga le Malo ma kamupani fai telefoni ia ma kamupani o lo o faapea ona faagaioia le initaneti, ina ia faapea ona puipuia lava e i latou i totonu o latou Matagaluega ma latou Ofisa ia ma latou point of connections ae lei oo mai le initaneti i totonu o le atunuu, o lona uiga, o la ua i ai filters ua faatulaga.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ma afai o lo o outou faalogologo i le leitio ma outou silasila i le TV i a latou faasalalaua, ia ma tele o faalauiloa o lo o alu atu ai, ia o le galuega lena a le Pule Faatonu ma le tatou Malo e tauala atu i le Matagaluega o Fesootaiga, ia ma Matagaluega uma lava a le Malo e pei o le Ofisa o Leoleo, o le Ofisa o le Loia Sili, Ofisa o Tina ma Tamaitai, e tele ia faalapotopotoga ia ma le Komiti faafoe o lo o i ai nei a le Malo, ua taumafai ina ia silasila totoa i tulaga uma aua ia le puipuiga o Samoa mai ia tulaga faapenei. Ia e le na ma laina foi, e tutusa lelei o outou finagalo ia ma le naunautaiga ina ia puipuia si o tatou atunuu mai nei mea uma. Ae le mafai lava ona aveesea mai ai se tulaga i le tatou tilotilo ia ma ia faatulaga Samoa i le agai i luma aua le manuia lautele o fanau ia ma le manuia o si o tatou atunuu, i tupulaga lalovaoa ia aua le agai i luma o le lumanai o Samoa.

A o fea tatou te mananao e faatu ai Samoa i totonu o le Pasefika ma le lalolagi lenei, o le naunautaiga o Samoa, o le naunautaiga o le Malo, ina ia avea Samoa, o le atunuu e taimua i totonu o le Pasefika i tulaga tau fesootaiga ia ma tulaga tau atinae faatekonolosi, ina ia faapea ona avea Samoa ma atunuu e aupito i sili ona fesiligia, ia ma faapea ona agai mai ai le Pasefika atoatoa i ni tulaga manaomia, aua le faaleleia o atinae tau tekonolosi ia ma ia tu maualuga si o tatou atunuu i tulaga faapenei aua le manuia lautele. O le mea ua faamaonia i totonu o le lalolagi, ma le tamaoaiga i le lalolagi o lo o i ai nei, a tele initaneti i totonu o le atunuu, e faapena foi ona alu i luga lona tamaoaiga. 10% e alu ai i totonu o le atunuu ae faapena ona 3% e agai i luma lona tamaoaiga i tulaga tau GDP. Ia o le tulaga lena o le naunautaiga o le Malo o lo o i ai nei, ae le o aveesea ai le tulaga o le silasila totoa e pei o finagalo faaalua o sui usufono mamalu, ina ia faapena ona puipuia upega tafailagi i fesootaiga. Ae o faia le galuega lena a le Malo, ia ao faafofoga foi le tatou atunuu i le tatou fonotaga i le aso, o le matou lava tuualalo ma le matou talosaga i le atunuu, ia fai pea lo tatou tiute faamatua, i le va ma fanau, ina ia amata mai i le puipuiga o mea nei faapenei. E le tau silafia e le matua pe faapefea ona faaoga le telefoni, ae tau lava a fai mea faigofie, pe ta le 10:00 ae fai i le tamaititi e tuu le telefoni i luga o le laulau ae alu e moe, ia ona faigofie lea ona fai puipuiga faapena ona fai e le matua, tusa pe le silafia e le matua tulaga tau i le initaneti, ae ua lava nai puipuiga na e amata ai ina ia fesootai pea matua ma fanau i totonu lava o aiga ina ia faagasolo atu galuega a le Malo ma lona puipuiga. E tele foi ia nisi maliiega ma atunuu i fafo ua faapea ona sainia e Samoa i le taimi nei o lo o galulue ai le Loia Sili ma lona ofisa ina ia faapea ona agavaa ai Samoa i le tele o capacity building ia ma le tau atinae o tatou lava ia iloa, aua o nei mea uma o mea fou ina ia faapea ona silafia ma faapea ona tapena lelei ai tatou ina ia puipuia si o tatou aua le agai mai o fesootaiga ma le faaleleia atili.

Lau Afioaga i le Fofoga Fetalai ma le mamalu o le Maota, ia o le tele lava na o finagalo sa faaalua, ma e faafetai lava i le paia o le Maota nei ona o lo outou finagalo malamalama aemaise foi ia le tuualalo mai aua ia le taumafaiga o atinae tau fesootaiga.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le mea moni e pei ona ou faamatala atu, a faapea e taunuu nei mea uma, o le a faapea ona siitia le tulaga ua i ai Samoa, ma ia taumafai ina ia aaoaina si o tatou atunuu e le gata o fanau aoga, ae maua foi le avanoa e toe aaoaina ai i latou ua leva ona le toe aoga, aemaise foi ia i latou ua matutua. O le taunuu mai foi o le uaea o fesootaiga, ia o le a faapena foi ona taumafai le Malo, e le gata i fesootaiga ma le Ofisa o Aoga ina ia galulue faatasi, ae faapea foi le soifua maloloina, ina ia faafaigofie ma fesoasoani ai i le l lava o faiaoga, le l lava o fomai, ina ia faaogaina nei laina o fesootaiga, aemaise le tatou Samoa National Broadband o lo o i ai nei ina ia faaleleia atili, ina ia taumafai e fai atu vasega i totonu o le taulaga a o lo o faapea ona aoga mai alo ma fanau o lo o i tua, ina ia faafaigofie ma faataunuu i tua faamatalaga o fesootaiga aua lava le agai i luma o fanau i lo latou atamamai.

E avea ia lenei itula lau Afioga i le Fofoga Fetalai e tau lava ina ua ou pai atu isi ou itumalo ma lana tapuai mai ma faafogafoga mai a o tatou alofaiva foi i le tatou Fonotaga aemaise i tulaga uma lava i tiute ma faiva o lo o faapea ona alo i ai le Malo. E faafetai tele lava isi ou itumalo i le nofo a Faafeagaiga, ae faapea foi i tupu ma tamalii, tulatoa foi, o faleupolu tofia, aemaise saoa, tina ma tamaitai, tupulaga talavou e oo lava i fanauiti, si ou itumalo pele mai lava i Fasitootai, Vailuutai, Faleatiu, Satapuala ma Satuimalufilufi, faafetai tele lava i le Atua mo la outou tapuaiga. A o le agaga ia tatou faapea ona tatou tui pea mulipapaga ma ia tapuaia faiva o le Malo, o nei atinae uma o lo o outou faafogafoga mai i ai, o tatou lava na ona fuafua a o le Atua e Na te faatupu ma faaatoatoa ia ma faataunuu nei mea uma i le manuia.

Lau Afioga i le Fofoga Fetalai, o se tulaga lena tau fesootaiga ma atinae a lo tatou Malo tau tekonolosi aua le manuia o Samoa mo le agai i luma, faafetai tele lava mo le avanoa.

FOFOGA FETALAI: Malo faafetai saunoa i lau Afioga i le Minisita mo Fesootaiga, Faamatalaga ma Fesootaiga Vavave Faaneionapo, ia ua manino ma malamalama itu uma e le gata i le Palemene a o le faafogafoga tapuai mai a le atunuu. Malo faafetai, ia o ou mama na.

Ou te tapa ma le faaaloalo lau Afioga i le Minisita mo Faamasinoga ma Pulega Tau Faamasinoga mo lau saunoaga.

Afioga Hon FAAOLESA KATOPAU T. AINUU (Minisita mo Faamasinoga ma Pulega Tau Faamasinoga): Lau Afioga i le Fofoga Fetalai, faafetai mo lou avanoa. Ma ou te faafeiloai aloaia lau Afioga i lenei itula o le afiafi, e faapena foi ona ou faatulou i le paia ma le mamalu o le Palemene, le afio o lau Afioga i le Taitai o le Malo le Afioga i le Palemia, afio lau Afioga i le Sui Palemia, mamalu i le Kapeneta ma Minisita Lagolago. E faatalofa atu foi i lea itu o le Maota i alii ma tamaitai sui usufono o le Palemene, faapea Faaululuga o Matagaluega ma Faalapotopotoga Tumaoti a lo tatou Malo ua mafai ona tatou auai faatasi, faamalo tauatai, faamalo le onosai.

22 IUNI 2017

**Tulafono Tau Faaofo o le Faatatauina o Tupe 2017/2018
– felafolafoaiga i luga o le faitauga faalua**

E faatalofa atu i le tapuaiga a Lana Afioga Mamalu, O Le Ao o le Malo ma lau Masiofo, Sui Ao ma o latou Masiofo, le tapuaiga mamalu a Samoa. E le galo foi le nofo tatalo a le Auaigaluega faauuina a le Atua i lea fatafaitaulaga ma lea fatafaitaulaga, o lo o nonomanu aua se manuia o Samoa.

E faapitoa sau faamalo i le tapuaiga a si ou itumalo o Vaimauga Sisifo Nu.2, le afio o Tama Alo Sina ia Seumanutafa ma Toomalatai, le Taofia o Fuaifale o Salevalasi ia Tamaseu ma Faualo, afifio i laua Matua ma le paia i Aiga, puipuiamalu le fetalai i le Faletolu ma le Vainalelepa ma Tuisamau. Tainane le tapuaiga a Tanugamanono, Vailima ma Vaoala, le afifio o Usoalii ia Tupuola, Siligatasa ma Faumuina, afifio Matua Alo o Malietoa ma le loaloa o pitonuu uma o si ou itumalo.

Lau Afioga i le Fofoga Fetalai, o lau maitau i saunoaga uma a sui usufono o le Maota i le taimi ua fano, pe a ma le tasi pe lua i lau maitau i ai saunoaga na taua ai le Matagaluega o Faamasinoga, ae leai se saunoaga na afea ai le Ofisa o Faiga Palota, o Matagaluega lea e i lalo o lau vaavaaiga. Aisea? E pau lava lau tali puupuu i lea fesili, ua faamalieina sui a usufono uma o le Maota i se tautua a lenei Matagaluega. Ma e le i soona tofotofia ia taitai o le Matagaluega lenei le Ofisa o Faiga Palota ma le Matagaluega o Faamasinoga. E oto mai lava alii talavou e matua i ai le agavaa, ma ou te faaluaina le saunoaga a le Taitai o le Malo lea na fai aneleila, faapea o lauia, o lauia lava CEOs nei a le Ofisa o Faiga Palota. O le mafuaaga foi lena ua ou koloni ai i le 5:00 i le vaveao i aso uma i le tau suega o se malosia e tulituli ai tama nei ua laiti toe saosaoa i le faatinoga o galuega. O le a le taunuuga? E leai lava ma se isi o lauga i ai. O lea sa ou taua i le taimi ua fano, e lua lava sui usufono sa taua le Matagaluega lenei o Faamasinoga, o le sui usufono muamua mai Aleipata Itupa i Lalo, o le sui usufono lona lua o le sui usufono mai Siumu. Ou te fautuaina le tatou Maota atoa e le gata i sui usufono ia, e mafai ona ou tuu atu le lisi o Minisita ma Matagaluega e i lalo o ia Minisita e faafaigofie ai le mataupu, aua o le fautuaga tuualalo mai le sui usufono mai Aleipata Itupa i Lalo, e faasaga lea i le faamalosi o Tulafono, o le fai lapisi i le taulaga ona o tagata tafafao maimoa mai fafo, lelei le agaga o le fautuaga, ae e le o le Matagaluega lenei e nafa ma le vaavaaiga o ia Tulafono o lapisi i le taulaga, o le Matagaluega lenei e faapitoaugafa i ai lea matafaioi, o le Matagaluega o Leoleo, MNRE ia le Faalapotopotoga o Tagata Tafafao Maimoa mai Fafo. Ae o le a ou tali atu faapea, taatia mai lou...

FOFOGA FETALAI: O lea o le a maua lava i le saunoaga a le Minisita. Tulai mai le sui usufono mai Aleipata Itupa i Lalo.

Afioga Tafua Maluelue Tafua (Aleipata Itupa i Lalo): Malie lau Afioga i le Fofoga Fetalai leai e le faalavelavea lava le saunoaga a le Afioga i le Minisita mo Faamasinoga.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ma le faaalooalo e saolele lau saunoaga, o le agaga o lau tuualalo atu i lau Afioga ma le faaalooalo lava, o le tatou Tulafono foi lea pei lava o lea e tau maua o lau Afioga e amata mai ai le tatou Tulafono introduce i le Palemene, e sao lava la o le MNRE ma le isi vaega lea na e tau maia, a o lea na ou fesili pei ona faafofoga mai na ou taua, na ou fesili i le Komesina Lagolago o Leoleo, po o i ai se tatou tulafono pei o le Tulafono a Niu Sila la e i ai o le Depositing Litter po o le Faaotaota i le Taulaga, e le na o le taulaga la lau Afioga ma le faaalooalo, e tusa o Samoa atoa, Savaii, Manono ma Apolima, so o se tagata lava e tia'i tulou le lapisi i lalo, e tatau ona i ai se faasalaga mo lea vaega. O lau tuualalo atu lea ma le faaalooalo lau Afioga, ae faafetai lava mo lau saunoaga.

FOFOGA FETALAI: Ia tulai mai lau Afioga i le Minisita.

Afioga Hon FAAOLESA KATOPAU T. AINUU: Faafetai mo le faamalamalamaina o lea mataupu. Ae o le tali lava e tasi pei ona ou tau atua, o le a ave se tuualalo i Matagaluega ia e nafa ma le aoina o le lapisi e tau mai se fautuaga i le Kapeneta mo le fausia o se Tulafono ona momoli mai lea ia outou Afioga mo le pasiaina aloaia.

O le faasea a le sui usufono mo Siumu, o le toe tagatagai i solitulafono o feusuaiga le talafeagai. Pe sao lau....ua faatupulaia i lou itumalo....

FOFOGA FETALAI: Leaga o lea ua saunoa le Minisita o le solitulafono lea ua faatupulaia i le itumalo o le sui usufono. Se i tulai mai le sui usufono pe moni?

Afioga Faalogo Iosefa Sopi (Siumu): E faamalulu atu i lau Afioga i le Taitaifono, leai na ona logo atu i le Minisita leai, e le na o Siumu o le atunuu atoa. O le isi itu e le o se faasea na avatu na o se talosaga.

FOFOGA FETALAI: Malo faafetai. Ia tulai maia lau Afioga i le Minisita mo Faamasinoga ma Pulega Tau Faamasinoga.

Afioga Hon FAAOLESA KATOPAU T. AINUU: E faamalulu atu i lou uso a sui usufono. Leai faapea lava au o lou itumalo lea e te atugalua i ai i lea tulaga. Ae faapena foi lou atugaluga pei foi ona tali atu i le sui usufono mo Aleipata Itupa i Lalo. O le faamallosia o Tulafono ma mea faapena, o le matafaioi lea a Leoleo ma le Ofisa o le Loia Sili.

E pei foi ona ou taumafai e tali atu i le taimi ua fano, o le Malo e fausia Tulafono e talafeagai i lea vaitaimi ma lea vaitaimi, ona aumai lea pasia aloaia atu iinei i le Palemene i a outou Afioga. A pasia loa ma avea ma Tulafono, o le isi tiute lea o le Faigamalo, o le faamallosia o Tulafono e pei ona finagalo le Palemene.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Afai ua lape le auaunaga lea, ona auala mai lea o sau tusi, fautuaga e ave sao i le Kapeneta ona faatonuina lea e le Kapeneta o Matagaluega e talafeagai, o latou na e faia suesuega, ia ma toe avatu foi lea i le Kapeneta fau Tulafono, fausia Tulafono aumai i a outou Afioga e pasi atu i i. O le faagasologa lena o le tatou mataupu.

FOFOGA FETALAI: Faafetai, ua manino lea itu, ae faaauau le saunoaga.

Afioga Hon FAAOLESA KATOPAU T. AINUU: Lau Afioga i le Fofoga Fetalai, ua faaiu lau tali, e lagolagoina malosi e le Vaimauga Sisifo Nu.2 le Tala o le Tupe 2017/2018 pei ona folasia i luma o le Maota nei. Ma le faaaloalo lava, soifua.

FOFOGA FETALAI: Malo faafetai saunoa i lau Afioga i le Minisita. Ma o le taimi lenei ou te tapa ma le faaaloalo lau Afioga i le Minisita mo Aoga, Taaloga ma Aganuu. Tulai maia e te saunoa i nisi o mea sa laga e sui usufono mamalu.

Afioga Hon LOAU SOLA KENETI SIO (Minisita mo Aoga, Taaloga ma Aganuu): Faafetai lava i lau Afioga i le Fofoga Fetalai mo le avanoa e tulai atu ai foi e tali foi nisi o fautuaga ma finagalo faaalua foi o le Maota nei.

Ona manatu lea o le a le toe ta i tua le tili i sa ma faiga o le Maota, aua o lea ua uma ona paelago foi nisi o sui usufono mamalu o le Maota nei, e le toe oo foi i ai se faamatalaga a lou nei sui usufono.

Ou te manatu o lea ua papae tia o le Tautiaga, o lea foi ua fofola lo tatou fala, ia se i togi a le tupe mua o taulafoga. Ou te manatu foi o lea ua seʻa le muliaa o le vaofilifili, tapena ai le alasopo ina ia tau lava i le lagituaiva le malagamaalii. E i ai foi lou talitonuga ua logo faa-Tutuila le Maota nei saunoaga a sui a usufono o le Maota aemaise o le faafofoga a Samoa i le latou tapuaiga, aua le Tala Faatatauina o le Tupe 2017/2018.

Ona manatu lea ia ua le toe faiva a i ipu ae ua faiva i ola le faatautaiga, aua o lele e ala le mafualii i le tapuaiga a Samoa mai lava i ona ao seia oo lava i ona iu. Samoa ua uma ona tofi, manatu lea fana sao ia ma vili tonu le ifi a Maina aua le faafogofoga a Samoa, ia aemaise le Maota nei, i mea na laga e sui a usufono, e auga tonu lava i le Matagaluega o lo o faapena ona ou taitaiina. O le Matagaluega o Aoga, Taaloga ma Aganuu.

O le aso ananafi seia oo mai i le aso, e leai lava se isi o le la itu e le i taua ma afea lenei Matagaluega i a latou saunoaga. Ona ou manatu ai lea, i le taua o le Matagaluega nei i o latou finagalo faaalua, se i momoli mai le feau, ia o le tuualalo, e matimati ai le sa o le Matagaluega aua le agai i luma. E 24 sui usufono sa lauga i lenei Matagaluega, aofia ai ma Minisita Lagolago, e toatele naua, a ou nofo ma tuu i le aotelega, ina ia faafaigofie le galuega.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ou te talitonu foi, na ou lauga ai i le tausaga lea na tea nei, i lenei vaiata ua tatou i ai i le televavave o auala tekonolosi, we are living in the world of technology, e mafai ona tatou faaaogaina e tatou te fesootai ai i imeli aua e avanoa lava lou Ofisa i le 24 7, a ou le i ai, o la e ola le imeli ou te tau atu i ai, ina ia faapena ona tali outou manao.

E amata mai i Pule Aoga faakonekarate, mo le silafia e le sui a usufono na laga, o le 4 ai nei o tausaga talu ona faakonekarate Pule Aoga, ia ai ua tau galo laititi ia te oe, a ua faapena ona faagasolo i ai ia le tatou galuega.

O le isi manatu e aofia uma ai ia sui a usufono, o le 1 lava o faiaoga, yes you are right. E le taitai ona lava a tatou faiaoga, ioe, e tele naua ia mafuaaga e ala ai ona le lava, malaga i Niu Sila ona ua maua e le Quota, o i isi Matagaluega ona o le siitaga o totogi, ua le o toe faiaoga ona ua maua i ni uiga paaa. O mea uma ia ua ala ai ona faaititi ia tatou faiaoga.

O le isi vaega, e nofo i Patamea ae faiaoga i Asau ae nofo le toalua i Salelologa. O faafitauli uma ia o lo o taumafai le Matagaluega e fofu, lea foi e ala ai ona transfer le isi faiaoga i le isi itu, ona o la e i ai lona toalua, ia pe transfer mai i le isi pito, soso atu laititi lava i le isi pito, te i ua tau aafia atu ai lau susuga i le'i .

FOFOGA FETALAI: Ou te faamalulu i lau Afioga i le Minisita mo Aoga, Taaloga ma Aganuu se i fai silasila i isi Minisita.

Afioga Hon LOAU SOLA KENETI SIO: O lea ou te fai atu i lou uso a Minisita e soso atu laititi leaga o lea e feaveai ou lima, te i ua afaina ai.

FOFOGA FETALAI: E moni, faafetai, o le agaga lava o le Minisita ia manino ma malamalama outou finagalo. Ia o lo o i ai le faauilavea.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, na ona fia fesili atu lava, po ua faataga ona fai ni sunglasses i totonu o le Palemene pe leai? Faafetai.

FOFOGA FETALAI: Ia atonu o loo faasa ae o le tulaga e mafai ona faanoi mai, ona e le o lelei le silasila ma tulaga faapena o afaina i gasegase o fofoga. Ia pei lava ona fai atu sei tau mama foi le sausau aua e i ai le upu foi lea faaleaganuu e, *'malu apefoe ae pisia ai fofoga'* ia ai o lena e mafua ai ae ui i lea tulai mail au Afioga e faauau le saunoaga.

Afioga Hon LOAU SOLA KENETI SIO: Faafetai i lau Afioga i le Fofoga Fetalai, ia masalo ua le au mai le vaai a le sui a usufono. O le mata o le long range lea ou te iloa ai mea, ua faaletonu foi ia lata ita vaai.

O le mea la lea lau Afioga i le Fofoga Fetalai, o faafitauli uma nei lea e ala ai ona faaititi a tatou faiaoga. A o lo o i ai ia faiga faalauiloa a le Ofisa, ina ia mafai ona tosina mai ia tatou faiaoga:

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Muamua, siitia o totogi, o totogi aupito i sili lava ia ona lelei i tagata amata o totogi o faiaoga. E uma mai loa lau BEd i gauta, \$25,000 e totogi ai oe. A faapea o oe o se Science Teacher, e te amata i le \$30,000. Ioe, o faiga la ia ina ia faatosina mai alo ma fanau e agai i aoga ma agai e fai le faafaiaoga o latou tomai ma faigaluega ai.

O le isi lea tatou galuega a tatou o sui a usufono, tatou te o i tua i o tatou nuu, musumusu i tina ma tama, e ave a latou fanau e agai i le Ofisa o Aoga, e agai i le faafaiaoga. O aso la, e lua lava galuega e aupito i sili ona amanaia pe a ta vaai i ai o le leoleo ma le faiaoga, ioe e tatau ona toe timata i ai ia le upega ma tatou vaavaai i ai ia tatou, o le tatou galuega e fai faatasi, ina ia tele ni alo ma fanau, e agai e ave le faafaiaoga ma ana galuega. Ia ae o lo o taumafai pea le Matagaluega e fai le faalauiloa, o lo o faagasolo e o lo o i ai a latou tikeri, o lea ua aumai i totonu e faapena ona aoaoina, ia ma faapena ona agai atu aua le galuega faafaiaoga.

O faleaoga toe fia fausia, ia o le tatou galuega fai faatasi ua uma ona saina mo mea e tau o le memorandum of understanding, o le MOU a komiti taitasi ma le Ofisa o Aoga, ina ia faapena ona latou galulue faatasi. A ua latou silafia ua tatau ona fai se faleaoga fou, e aumai le talosaga, ona alu atu foi lea o le asiasiga a le JICA po o le Ofisa o le Tai... po o le Ofisa foi lea o lo o gafa ma le fauina o a tatou faleaoga i le taimi nei. O lona uiga e agai mai ia matou e fai atu ai le tusi e support ai la outou talosaga ia ona ave lea i o i le JICA, e fuafua e latou po o le a se aso e faapena ona fausiaina ai le faleaoga fou.

O Aoga Amata saunoa foi ai le tele o sui usufono, sao lelei outou, vaaiga alualu mamao a le Matagaluega, o lea ua uma ona maea le tatou faiga faavae aua Aoga Amata. E talitonu le Matagaluega o i le fatu, childhood level, o i e amata mai ai. O lea foi ua tiloitlo le tatou Malo, pe faapefea ona faatupe. Ia o le aoga lena o lou nofo i autafa o le Minisita o Tupe ma ou musumusu i ai, o lea foi ua aumai lana tuualalo, se i talia mau aua le tausaga faaletupe, ia atonu e oo atu i ai ua lava tupe e totogi ai faiaoga. E mataulia foi a totogi faiaoga, e tatau ona aoaina lelei faiaoga ia, ina ia aoga ia tatou tupe, quality teachers ina ia faapena ona o atu e aoao alo ma fanau aua e maitauina o le level lea i lalo, e le faigofie o le 3, 4, 5 e le o ni tamaiti faigofie. Ia e tatau ona i ai le agavaa o le faiaoga e agai ai i aoga ia. O lea foi la ua i ai le polokalame ua uma ona faataatia a le NUS ma le USP e o i ai ia tatou faiaoga ia ina ia lava lo latou tomai ae le i amataina le polokalame o Aoga Amata.

O malae taalo, e sao lelei ia sui usufono e pei ona saunoa sui usufono mai Falealili i Sasae ma le sui usufono mai Siumu, e pei o oulua ia sa laga malae taalo. Ia e tatau ona fai, e le o se mea' .e tatau ona faia. Talia mau i le Tala o le Tupe 2020/2021 ia fai loa ma tatou malae taalo.

Tofa Aumua Isaia Lameko: Lau Afioga i le Fofoga Fetalai, o se mea e fia faasao, e le o Falealili i Sasae o Falealili i Sisifo e tu ai le Aoga a le Kolisi o Falealili faamolemole.

FOFOGA FETALAI: Ia tulai mai le Minisita e faaauau le saunoaga.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Afioga Hon LOAU SOLA KENETI SIO: Ia o lea ua maua atu, o i Falealili Sisifo, o le sao lea, ia o le Falealili lava o le Falealili. Sisifo, Sasae o le mea lava e tasi, tasi lava le lua malae taalo.

Tofa Aumua Isaia Lameko: Leai na o se mea e faamalamalama, e ui lava e eseese ia, a o le itumalo lava e tasi ae lea sa laga i lau lauga ia le malae taalo lea o le Kolisi i Falealili, o le Kolisi o Falealili e tu i Poutasi e le tu i Salani, faafetai.

FOFOGA FETALAI: Ia lau Afioga e i le sui usufono mamalu o Falealili ma Falealili, ia aua le faamamafa le mea e faigofie, o Falealili lava o Falealili, saunoa mai lau Afioga i le Minisita.

Afioga Hon LOAU SOLA KENETI SIO: Ia faafetai i le fesoasoani mai a le Nofoa, faamalulu atu isi ou uso a usufono, ia talanoa oulua po o fea e faatu ai le malae o le lua Kolisi.

Afioga Fuimaono Teo Samuelu Teo: Lau Afioga i le Fofoga Fetalaií .

FOFOGA FETALAI: Ia malie lau Afioga i le Minisita, o lo o nanau mai lava le isi sui usufono o Falealili e fia....

Afioga Fuimaono Teo Samuelu Teo: E le feteenai ia le tofa foi i le Afioga i le sui a usufono mai Falealili i Sisifo, peitai o le talosaga na tuuina atu i le la tausaga ma lenei tausaga, o lea ua vaeluaina le itumalo. O se malae taalo e agai i ai lenei itumalo, lea foi sa fai ai feutagaina, o lea la ua tali mai, ia ma le faaaloalo lava. Ia ae o le talosaga lea o le talosaga mo le malae e toe fia faaleleia mo le matou itumalo e toatasi, o se mea e fia faamanino i le Afioga i le Minisita.

FOFOGA FETALAI: Ia faafetai, lea ua manino auofala i le Afioga i le Minisita, tulai maia.

Afioga Hon LOAU SOLA KENETI SIO: Ia masalo ua manino lea tulaga. O laga e nisi o sui usufono le drop off range foi lea o tamaiti, ia ona faapea mai lea po o fea o le a o i ai? Aua ua le ausia le 12, 13, a o fea la o le a o i ai? O lea foi e manaia ia fautuaga na aumai, alu i le faataulelea, ia pe alu i totonu o le mafutaga a tamaitai. Ia o isi ia fuafuaga a tatou nuu i tua o lo o fai, ae mo le taimi nei, silafia e le Maota nei, o lo o i ai fuafuaga o lo o faapena ona faagasolo, o le tolu ai nei o tausaga. E uma nei le polokalame nei ia Setema, o le polokalame foi lea a le Manukau Institute of Technology, o lea ua faapena ona fai paaga ma le tatou Matagaluega ia aemaise ai o le NUS. O i tonu lava lea e agai i ai ia tatou alo ma fanau, ua fitu nei Kolisi ia ua faapena ona i ai i totonu o le polokalame lea.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

E agai la i ai ia tatou alo ma fanau ia ua faapena ona le ausia ia le level lea po o higher education ua le mafai ona ausia e nai alo ma fanau ia. Masalo o le polokalame foi e faaauau, o lo o faatupeina e le NZAT a Niu Sila, ia o lo o faapena la ona i ai le agaga e toe faaauau ai foi ia mo le isi tolu tausaga ma agai atu loa i tua i Kolisi i tua. Ina ia faapena ona faaaoga i ai maua tonu ai lava, o le path way lea e uma loa ia vasega ia, ia le toe kami loa i le school certificate ma le UE ae kami sao atu lava i ina, oso atu loa i totonu i i i le polokalame a le Polytech, ia galuega loa. Ia o le aluga lena o le a alu ai, e le toe kami la i le aualii ia.

Ia Sciene Teachers. O la ua i ai le polokalame e agai uma i ai e toe upskill uma ai ia faiaoga, sau mai i le tipiloma, o la ua o i le degree. O lea faatoa uma nei foi ona fai le isi faauuga, maua ai foi le 50 o tatou faiaoga Science ua faapena ona siitia lo latou tomai mai le Tipiloma ae la ua siitia atu i le Bachelor of Science ia po o le degree la ua oo i ai, o lona uiga ua tele le taua o lo o faataua foi e lo tatou Malo o le tele ia o tupe e alu ai. Na lauga ai foi le Afioga i le Taitai i le tele o le seleni o lo o alu ai i nei polokalame, ia o lo o taumafai lava ina ia upskill ia faiaoga ma oo i le tulaga maualuluga.

O le SQA lea sa taua foi ia e sao, ua uma ona oo i ai ma ua uma ona amia e le Kapeneta i le tulaga o le Matagaluega o lea foi Authority, i le vave ona puta o le latou Ofisa. Ae a latou mea o fai? Ioe, aua o le fesili lena, o lea foi e fesili solo ai lava ia le tatou Palemene. Ae ua uma foi ona avatu le latou tali i le Kapeneta ma ua faamalieina ai le Kapeneta, o la e tele a latou galuega la e fai, e tele ma fausasaga galuega tulou.

School Inspectors e pei ona laga mai e sui usufono, ia o le tulaga lena o le vaai mamao o le Matagaluega ua tataua ona toe aumai i totonu ia Asiasi Aoga i le latou va lea ma faiaoga ma Pule Aoga agai i le Ofisa, ia ua ala ai ona taua le mataupu e pei ona laga foi ma saunoa i ai nisi o sui usufono, i le taua o le tofiga lea o le Inspector, School Inspectors, ina ia faapena ona latou fesootai ma le Matagaluega ia aemaise tua i le community, ia ma le Pule Aoga, e faafaigofie ai foi. O le mea lea e i ai, ua fai e le pule aoga le tele o galuega ma le alu ai ma le pule aoga e fai sana laupapa, a ua fealuai i le va lea ona ua leai se asiasi aoga. O le mea la lea ua toe re-establish ai le tatou post lea aua le taumafaiga o lea tulaga.

Sa fesiligia foi e nisi o sui usufono le va lea o le Polytechnic ma le NUS po o le a le tulaga ua oo i ai i lenei taimi o lea ua 10 tausaga talu ona faaipoipo le toalua lea. A o le a se vaaiga mamao i ai, o lea ua uma ona ma talanoa foi ma le sui usufono na laga e sao lelei o la e ua i ai le toe vaaiga a le tatou NUS, se i toe tilotilo lava ma toe revisit le latou faaipoipoga lea po o ua tataua ona toe tetea pe tataua ona faaipoipo pea. O lo o faagasolo la i le taimi lenei aua se tali mai mo le agai i luma.

Ia, ou te manatu lau Afioga i le Fofoga Fetalai, ou te iloa o le aotelega lena o le taumafai atu a au nei e talitali atu aua manaoga ma mea foi o lo o fia faaleleia a o le aotelega i a outou fautuaga, e talia lelei e lou nei sui usufono a outou fautuaga.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Aumai fautuaga lelei o fautuaga aua le agai i luma o le Matagaluega, ona o i e aupito sili ona tele le tupe a le tatou Malo o lo o agai i ai, ae po o lelei ona faaaoga ina ia fua mai. O le mea la lea, aumaia lo outou finagalo aua le galuega foi ina ia faapena ona aotauina a tatou fanau i se auala talafeagai aua le agai i luma.

Lau Afioga i le Fofoga Fetalai, e pei o nai motugaafa na ua faapea ona taumafai e tali atu ai, a faapea e le faamalieleina, ia fale ia i le fale o le Atua lou finagalo. Ioe, e le i fausia Roma i se aso se tasi.

Ae ao lava ona ou pai foi i si ou itumalo lau Afioga aua na o le pau lenei o le avanoa. O Sagaga East, sole, ua sese foi au. O Sagaga le Falefa, faapea lava au ia o lea ua fai le suiga foi lea o le a tau fai. Ia Sagaga le Falefa e, faafetai i la outou tapuaiga, ioe. Mai lava i mauga tetele seia oo i mauga iti. Ou te le toe apaapa i tua i ou sa ma ou faiga, ae ea ae i Niuvai seia paia Fogaa, o le malae na tofofi ai le atunuu. Ioe. Ia, tatou faia le faiva o le toeaina o le tatou nuu o le patipati taoto ma tapuaia outou faiva. Faafetai i la outou tapuaiga. Ia, o lea e malosi lava le tou sui usufono. A i ai foi ni faaletonu, ia lafo ia i nuu le aina. Ia, se i ou pai lava i si ou nuu o AeLe lau Afioga i le Fofoga Fetalai, AeLe, ia, o le upu e fai i Avele, e le galo oe Avele, e faapena foi oe AeLe, e le galo oe AeLe, ma si ou nuu o Aleisa, ioe. Ua iloa foi o si ou nuu lea pei e tele i tagata foi nei totolua, thank you Aleisa. I love you.

Ona faauma atu ai lea o se faamatalaga, ia manuia tele le Fonousu a le tatou atunuu.

FOFOGA FETALAI: Malo faafetai. E pei lava ona e saunoa ua logo faatutuila le aso aua lau saunoaga i mea sa laga e sui usufono mamalu. Manuia le alofaiva o lau Afioga. Ia ma o lea ua tatou oo mai i le Minisita o Tupe e auga i ai le tulaga o galuega o lenei aso.

Ou te tapa ma le faaaloalo lau Afioga i le Minisita o Tupe.

Afioga Hon SILI EPA TUIOTI (Minisita o Tupe): Faafetai lava i lau Afioga i le Fofoga Fetalai mo le avanoa. Ou te talitonu e le umi tele foi se faamatalaga, o lena ua uma ona saunoa le Afioga i le Palemia i le aotelega o le faataatiaga o le Tala o le Tupe ma fuafuaga agai i luma a le tatou Malo ae pei e tataua ona toe faamanatu le sini autu o le tatou Tala o le Tupe o lo o faagasolo nei, faamalosi le faavae ma tapena mo a taeao. E lua ni vaega taua tele o lenei sini autu.

Muamua, e i ai a tatou galuega taua e ao ona faatino i le taimi lenei, ina ia siitia ma mauaa lo tatou tamaoaiaga ma ia maua ai e o tatou tagata avanoa ma so o se auunaga.

Lona lua, o nei galuega e ao ona faaauu pea lona faatinoga i tausaga nei ma faapena foi i le lumanai. Ia e pei ona outou silafia, o le tatou Tala o le Tupe ua taatia nei i luga o le Laulau a Fono, ua talanoa i nisi o galuega taua lea ua amata ona faatino.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

E pei ona silafia o le tele o le galuega sa fai ua tapena ma o lea ua faata mai totonu o le Tala o le Tupe, o le fetuunaiga lea ma le toe iloilo ina lea o tatou tupe maua. O le tele o le taunuuga o le iloilo o lea ua faataatia atu i totonu o le Tala o le Tupe.

O le isi galuega taua sa faailoa atu, o le tulaga lea o le toe tagatagai i le faaleleia atili lea o le auunaga a Matagaluega ma Faalapotopotoga a le Malo ina ia faapena ona vave faatino galuega ia faafaigofie ma faataugofie i le tuuina atu o galuega aemaise o le tali atu i manaoga o le tatou atunuu. Ia o le tausaga nei o le a faagasolo ai le tulaga lena o le public sector reform e toe tagatagai ai i le auivi ma le tulaga foi lea o mandates a Matagaluega ina ia taumafai e lagolagoina le tulaga lea o le whole of government agenda a le Malo ina ia mafai ona ogatasi fuafuaga a le Malo ma vaega ua ave ai le faatauina ma le mafai ona faatino e Matagaluega i se taimi vave ma se taimi lelei. O le taimi nei o lo o i ai tulaga o i ai feteenaiga i Matagaluega ona o lo o i ai latou tiute ma galuega e tatau ona faatino, e pei e foliga mai e le o manino po o fea le tuaoi ma galuega e tatau ona faatinoina, tasi lena mafuaaga ua ala ai ona mafua le tulaga e le o mafai ona fesui ai ma fetufaai faamatalaga ma tulaga e mafai ai ona vave faatino a ua fai lava le malosi o le Matagaluega latou ia. O le a amata faatino la le galuega lena i le tausaga fou. Ae toe fetuunaiga o tatou lafoga ma tiute. O le auga lava o le faamoemoe ina ia faapena ona faateleina ni a tatou tupe maua e mafai ai ona tatou tali atu i manaoga o tatou tagata, o tatou itumalo. O lo o manino lava foi i le tatou Fono i le aso ananafi ma le aso, o le tele lava foi o sui usufono mamalu o le Palemene sa sausaunua sa talosaga lava i le tulaga lea o le faaleleia o auala, o aualatele, o auala galue, ma le tulaga o le suavai, o tulaga o felauaiga, o le eletise. O na galuega uma e mautinoa lava e tele se vaegatupe e manaomia e tatau ai ona faatino. O le tulaga lena ma le mafuaaga tonu foi lena o lea na tagatagai ai i le faatulagaina o tatou tupe maua ina ia mafai ona faateleina se vaegatupe e mafai ai ona tatou tali atu i manaoga nei. Ma o lo o mautinoa foi le taua tele o le tulaga le o le invest o tatou infrastructure, aua o le tasi lena ki i le tulaga o le uunaia o le tamaoaiga o le atunuu i le faatupulaia o le tamaoaiga o le tatou atunuu. E pei foi ona ave le faamuamua e le Malo i le tulaga o aoga ma le soifua maloloina, o le taua tele lena mo tatou i le tulaga o le aoina lelei o fanau ma le tulaga o le maua o le soifua manuia ma le manino o tatou tagata. Ma o lo o manino le faataaiaina o le tatou Tala o le Tupe, le faamuamua ua tuuina atu i ai i nei atinae po o galuega tetele a le tatou Malo.

E pei foi ona silafia i le Tala Faatatau o le Tupe ua faataatia i luga o le Laulau a Fono i le taua o le tulaga alenei o le toe vaavaai i vaega e tatau ona ave i ai le faamuamua a le tatou Malo i tulaga o le faisaofaga uma o tagata uma i le faatupeina o le tatou atinae ua mafua ai ona vaavaai i tulaga foi nei o le toe fesui ai o exemptions i le taimi lena ma isi fesitaiga o tau o auunaga a le Malo ua tele tausaga ua le o toe iloilo ina.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

Ma e i ai le talitonuga, o leni vaitaimi, o se faiga e tatau ona fai fuafua lelei ia aua foi le televave tele a ia fai ia o faatasi le tulaga ua lava tupe e faatupe ai atinae a ia faapena foi ona siitia le tulaga o le quality o le auunaga a Matagaluega ina ia faaoga tatau ma faaoga uma vaegatupe ia ua fuafua mo le tausaga fou faapea foi ma le tulaga o le tele o tatou atinae tetele o lo o fesoasoani mai ai tatou paaga mai fafo, e le gata i paaga o lo o aumai tupe e le toe totogia, a o tatou paaga o le faletupe o le lalolagi ma le faletupe o Asia ma isi o lo o aumai ni a latou tupe nono mai i ni tau mama ina ia faapea ona fesoasoani ia i tatou i le faatinoina o galuega ia. Ma o taimi taua foi nei e tatau ai ona fai tatou galuega nei, a o faasolosolo ina lelei le tamaoiga ma le tulaga o i ai, e ono i ai foi ni tulaga e mafai ai ona faapea ua tatau ona toe see atu tatou i le isi vaega i luga, e ono faafaigata ai ona i ai le access i ni tuutuuga mama ae i ai le talitonuga o le faataatiaga o le Tala o le Tupe i le taimi leni mo le tausaga fou, ua i ai le talitonuga o le a faapena ona fesoasoani ai e tali atu i le tele o manaoga o i ai, aemaise lava i tulaga o aoaoga. O lena ua saunoa le Afioga i le Minisita faapena foi i le Matagaluega o le Soifua Maloloina. E pei ona taua o le tasi vaega taua o lo o tagai i ai le Malo e faatinoina i le tausaga nei, o le tuufaatasia lea o le Matagaluega o le Soifua Maloloina ma le NHS. Atonu o lo o i ai foi nisi vaega faapena i totonu lava o le Malo o lo o i ai ni feteenaiga po o ni mea ia tai tutusa lava galuega e fai e tatau ona faaitiitia tupe e faaalu ai, a ia faaoga tatau ai foi nisi o resources o lo o i totonu aemaise lava o le tomai i totonu o Matagaluega taitasi ina ia faapena ona galulue faatasi e fesoasoani i le vave ona faatinoina o a tatou galuega ia.

Sa i ai ni mataupu sa laga mai e nisi o sui usufono i le tulaga lea o tatou fuel levy i le LTA, o le tulaga o lo o i ai le Tulafono Tau Faaofi i le taimi leni, e ao uma e le Ofisa o le Tupe tatou levy i penisinisi ma suauu ma tulaga faapena, se i vagana lava le fuel levy o lo o faaoga i taavale afi o lo o faaagaaga mo le Matagaluega o le LTA. Mo le silafia, o lo o i ai foi le vaegatupe a le LTA i le taimi leni, i le resitalaina o taavale ma tulaga faapena, ae i ai le talitonuga o lo o lelei lava le faatulagaga i le taimi nei, o lo o fai foi feutanaiga i le va o le Ofisa o le Tupe ma le LTA ina ia faapena ona mautinoa o lo o lava se tupe e avatu e fesoasoani i le faatinoina o tatou auala tetele o lo o taumafai i ai.

Sa i ai se fesili i le tulaga lea o le fesoasoani i le private sector pei ona saunoa i ai se tasi o sui usufono mamalu i le tulaga lea e tatau ona tatou tagatagai i le private sector, ma o lea sa taua e le sui usufono mamalu le tulaga ua avatu ai le faamamaavega ua faaitiitia ai le lafoga e masani ona totogi i oloa foi nei e faatau atu i fafo ma toe aumai i inei le tupe. Ae talu ai ona o lea ua faaitiitia i le 20%, o lona uiga, na o le 13.5% le lafoga o le a totogiina. Ae i ai lava le faanaunauga latou a o faagasolo ma maitauina foi le tulaga o feaatauaiga, e mafai ona toe fetuunai i se taimi o i luma.

22 IUNI 2017

**Tulafono Tau Faaofi o le Faatatauina o Tupe 2017/2018
– felafolafoaiga i luga o le faitauga faalua**

O le faanaunauga lava latou ia, ia ave le faamuamua i le vaega o pisinisi ma le vaega tumaoti, o i latou na e mafai ona faafaigaluegaina le tele o tatou tagata. O latou na o lea ua amata ona invest i tua e fesoasoani i le aufaifaatoaga ma maua galuega. O le talitonuga lava latou ia, e le o se galuega a le Malo le faia pea o galuega o avanoa e faafaigaluega ai tagata, a ia avatu se faatosina e fesoasoani i le private sector ina ia mautinoa o lo o i ai le lagolago a le Malo i faatosina nei. E talitonu o le talitonu o le tatou faamamaavega lea e i ai, na o le 13.5% toeitiiti lava tutusa ma Fiti i le taimi lenei, ae pei ona taua o ituaiga fesoasoani ia e tatau lava ona fai ma vaavaai i ai i tausaga uma. I le tatou tulaga o lo o faatauva ai tatou ma Fiti ma isi atunuu o le Pasefika i maketi ia e i ai nei. E tatau lava ona tausolomua tatou e vaavaai ai i le tulaga lea.

FOFOGA FETALAI: E faamalulu atu i lau Afioga i le Minisita o Tupe. E manatu e tele nisi o tapenaga mo le tali atu i mea sa laga e sui usufono mamalu, ona faapea lea o se manatu o le Nofoa. E lelei ona faamuta le saunoaga mo le aso a taeao.

E talu ai o lea ua tatou toai taunuu i le siui ma le taunuuga o galuega o lenei foi aso fono. Ua i ai le manatu e toe faaauau ia le saunoaga pe a pule alofa le Atua e aulia le aso fono e sosoo ai.

Ae tatou te le i tolopo, ou te tapa le sui usufono mo Falealili Sasae na te faaiuina mai le tatou Fonotaga i se tatalo.

Na tolopo Taualumaga a le Fono Aoao i le itula 6:57 i le afitafi, seia aulia le itula e 9:00 i le taeao o le Aso Faraile, 23 Iuni 2017.